

# JESUCRISTONËN CAISCË UNICAMA USAI 'IA

## Aín Bëru Ñunshin Upí Ñucën Papa Diosan unibë 'iti

**1** <sup>1</sup>Teófilo, 'ën mi a pain buánmicë quiricanu cana Jesusan naínu cuainsama pain 'ixun 'á ñucama a ñuiquin mi cuënëoxuan. <sup>2</sup>An ca naínu cuainsama pain 'ixun Nucën Papa Diosan Bëru Ñunshin Upitan 'aquincë xun an aín bana unicama ñuixunun xuti unicama caísacëxa. Acamax ca aín 'unánmicë uni 'iacëxa. Caístancëxun ca añu cara 'ati 'icë quixun 'unánmiacëxa. <sup>3</sup>Usoquin ñu 'atancëx bamaxbi ca baísquiacëxa. Usai 'itancëxun ca, ax ca asérabi baísquiaxa quixuan an caíscë unicaman 'unánun, 'uxë achúshi 'imainun mecën rabé nētēn nētéax nētéax atumi chiquiracëcëxa. Usai 'iquin ca uisairai cara uni Nucën Papa Diosnan 'iti 'icë quixun atu 'unánmiacëxa.

## *I. JERUSALENUAXA AN NUCËN PAPA DIOSAN BANA CUACË UNICAMA TIMËA (1.4-8.3)*

<sup>4</sup>Naínu cuainsama pain 'ixun ca Jesusan aín 'unánmicë unicama, an uni bana ñuixunun xutia caíscë, a cacëxa:  
—Jerusalénuax cuanxunma pan ca anuxunbi 'ën Papa Diosan cacësabi oquin 'ën mitsu ñuixuncë a pain caín.  
<sup>5</sup>Asérabi ca Juanën uni 'unpaxan nashimiacëxa. Usa 'aínbi ca 'itsama nētē

'icëma 'aínshi Nucën Papa Diosan aín Bëru Ñunshin Upí mitsubëa 'inun xuti 'icën.

## Jesús naínu cuan

<sup>6</sup>Usatancëxun ca bëtsi nētēn abë timéax bucuxun an uni bana ñuixunun xutia caíscë unicaman Jesús cacëxa:

—Nucën 'Ibu, nux cananuna Israelnën rēbúnquí 'ain, nun 'apu 'aíshbi ca nun aintsima 'icën. Usa 'ain 'caramina bēri nun aintsi achúshi nun 'apu 'inun mēnōti 'ain?

<sup>7</sup>Cacëxunbi ca Jesusan atu cacëxa:

—'Ën Papa Diosan ca an sinácësabi oquin uinsaran cara usai 'iti 'icë quixun mēnōcëxa. Uinsaran cara usai 'iti 'icë quixun camina mitsun 'unaniman. <sup>8</sup>Usa 'aínbi camina Nucën Papa Diosan Bëru Ñunshin Upí mitsunu ucëbë aín cushiñu 'icanti 'ain. Aín cushiñu 'ixun camina mitsun 'ën bana unicama ñuixunti 'ain, Jerusalén ëmanu, Judea mecamanu, 'imainun Samaria menu, 'imainun camabi menu cuanquin.

<sup>9</sup>Ësaquin aín 'unánmicë unicama caíshi ca atun ismainunbi manámiquishi naí cuinan mapucëx istécëntimoi nētéacëxa. <sup>10</sup>Usai 'ia manámi bēsuquin isabacëbëbi ca uni rabé tari uxua pañucë atu nēbētsi 'iacëxa. <sup>11</sup>Usa 'ixun ca atu cacëxa:

—Galileanu 'icë unicama, 'añuquin caramina manámia isabatin? Jesús, axa bēri naínu cuancë, 'ënëx ca mitsúnmi

cuania iscësa ësaribicuatsini utëcënuxun 'aia.

**Jesusan caiscë unicaman  
atubë 'inun Matías caísa**

<sup>12</sup>Ësaquian a uni rabëtan cacëx ca Olivete cacë matá anuaxa Jesús naínu cuancë, anuax aín 'unánmicë unicama Jerusalénu riquiancëxa. Olivete anuax Jerusalénu bëbati ca rabë kilómetroxa 'iacëxa. <sup>13</sup>Riquianx Jerusalénu bëbatancëx ca anua atux 'icë xubunu atsíanx manámia 'icë cata itsi anu cëñúruacëxa. Atux ca Pedro, Jacobo, Juan, Andrés, Felipe, Tomás, Bartolomé, Mateo, Alfeonën bëchicë Jacobo, Simón axa aín aintsin rabanen nëcëcë, a 'imainun Jacobonën xucën Judas, acama 'iacëxa. <sup>14</sup>A unicamax ca atúxa 'icësabi oi 'i, Jesusan xucëantu 'imainun aín tita María 'imainun bëtsi xanucamabëribi timéax ami sinani Nucën Papa Diosbë banacëxa.

**Jesusan caiscë unicaman  
atubë 'inun Matías caísa**

<sup>15</sup>Usa 'aish ca anu timéax Jesucristomi sináncë unicama ax ciento veinte xucënsa 'iacëxa. Usa 'ain ca Pedronën atu nëbëtsi niruxun cacëxa: <sup>16</sup>—'Ën xucëantu, ësaquin cana mitsu cain. Nucën Papa Diosan Bëru Ñumshin Upitan sinánmicëxuan Davidnën cuëño bana quicësabi oi ca Judas, an Jesús uni bimicë, ax 'iixa. <sup>17</sup>Judas ax ca nucama-cëñunbia Jesusan aín bana ñuixunun caístancëxun 'unánmicë 'iixa. <sup>18</sup>Usa 'ixunbi ca Jesús unin binun 'aquintancë xun a cupía bicë curíquinën me bitancëxbi, aín 'atima ñu 'acë cupí axbi ñumi natéquiun aín pucucama antácai bamaxa. <sup>19</sup>Usaía 'icë cuaxun ca Jerusalénu 'icë unicaman a me Acéldama caquin anëaxa, ax ca atun banan Imi Me quicë bana 'icën.

<sup>20</sup>Salmos quiricanua cuëño bana axa ësai quicësabi oi ca 'iixa:

Aín xubux ca ëncë 'iti 'icën, anu ca uíxbi 'itima 'icën.

'Imainun ca ësairibi quia:

Bëtsi unin ca an ëncë ñu mëeti 'ati 'icën.

<sup>21</sup>Ënu ca an Jesusan nubë 'ixun ñu 'aia nubëtan iscë uni raíri 'icën. <sup>22</sup>Usa 'aish ca atux Juanëan nashimia 'aísha ax naínu cuantamainun nubë 'iixa. Usa cupí ca a unicama achúshinëxa Jesús ax ca bamatancëx baísquitëcëanxa quixun nun 'acësaribi oquin unicama ñuixunun nubë birananti asábi 'icën.

<sup>23</sup>Pedronën ësokuin cacëxun ca anu 'icë unicaman rabë uni, José, Barsabás caquin anëcë 'icëbia Justo caquinribi anëcë, acëñun Matíasribi caísacëxa.

<sup>24,25</sup>Usoatancëxun abë banaquin ca Pedronën Nucën 'Ibu Dios cacëxa:

—An nubëtan mi ñu 'axunun min caiscë 'aíshbi ca Judas mi ñu 'axuanxmabi aín 'ucha cupí anu ax cuanti anu cuanxa. Usa 'ain camina camabi unían aín nuitunën sináncë ñu 'unáncë 'ixun, min ënë uni rabë uiira caramina Judasnën ñu mëeti 'anun caísa quixun nu ismiti 'ain.

<sup>26</sup>Catancëxun ca uix cara 'iti 'icë isnuxun ñuratsu pain niquin tancëxa, tancëxbi ca Matías 'iacëxa. Usaquian caiscë 'aish ca Jesusan aín bana ñuixunun caiscë uni mëcën rabë 'imainun achúshi, acamabë Matías biranancëxa.

**Nucën Papa Diosan Bëru  
Ñunshin Upí aín unicamanu uá**

**2** <sup>1</sup>Usa 'ain ca Pentecostés cacë nëtë ucëbë Jerusalénu 'icë achúshi xubunu timéax axa Jesucristomi catamëcë unicama buciacëxa. <sup>2</sup>Anu bucuxun ca suñúan upí 'icësaí banacua-tsinia naínuax aia cuacëxa. Cuacëxbi ca

anua bucuçë xubu namé camabi  
tsitsiarati sharati banacëxa. <sup>3</sup>Usai 'ishi  
ca tsi érenrucësa 'aish rêquiabati anu  
'icë unicaman maxcánu cëñúruacëxa.  
<sup>4</sup>Usacëbëshi ca Nucën Papa Diosmi  
cushii aín Bëru Ñumshin Upitan 'imicëx  
anu 'icë unicamax bëtsi bëtsi banan  
banacëxa.

<sup>5</sup>Usa 'ain ca axa Nucën Papa Dios  
cuëencësabi oi 'iisa tancë judíos  
unicama, ax bëtsi bëtsi menuax Judea  
menu uax Jerusalénu tsoócëxa. <sup>6</sup>A  
unicamax ca xubunu bucuçaxa bëtsi bëtsi  
banan axa Jesucristomi catamécë  
unicama banaia cuabiani a xubunu  
timénux riquiáncëxa. Riquiani bëbai  
timëcamë'ëoquin a xubunu 'icë  
unicamaxa banaia, atun banasabi  
camaxunbi cuati ca ratuti sináncasma-  
cëxa. <sup>7</sup>Sináncasmai ca atun bëmánan  
pëqui ratuti canancëxa:

—¿Galilea menuaxa ucë unishima  
cara axa xubunu timéax banacë  
unicama ënëx 'ic? <sup>8</sup>¿Usa 'icëbi caranuna  
bëtsi bëtsi nëtënuax uá 'ixunbi atun  
bana nun banasabi 'icë cuatin? ¿Uisa  
'aish cara usa 'iti 'ic? <sup>9</sup>Nux cananuna  
Partia, Media, Elam, Mesopotamia,  
Judea, Capadocia, Pontus, Asia, a  
mecamanuax ucë 'ain. <sup>10</sup>Imainun  
cananuna Frigia, Panfilia, Egipto,  
'imainun Africa menu 'icë ëma raíri  
Cirene 'ucëa 'icë anuax ucë 'ain,  
'imainun cananuna Roma ëmanu 'icë  
judíos unicama 'imainun raírinëx  
judíosma uni 'ixunbia an usai judíos uni  
'iti Moisésnën cuëneo bana quicësabi  
oquin 'acë 'ain. <sup>11</sup>Imainun cananuna  
Creta cacë nasínu 'icë 'imainun Arabia  
cacë menu 'icë unicama 'ain. Usa 'ixunbi  
cananuna ënë unicaman, uisaira oquin  
cara Nucën Papa Diosan ñu 'aia quixuan  
ñaia nun banan quicësa quia cuatin.

<sup>12</sup>Usai 'icëbë ca camáxbi ratuti  
sináncasmai canancëxa:

—¿Uisa 'aish cara usa 'iti 'ic?

<sup>13</sup>Usaia quicëbëbi ca raírinëx ami cuai  
—ñu bata xëaxbi sapi ca paéncanxa  
—quiax canancëxa.

**Timëcamë'ëocë unicama Pedronën ca**

<sup>14</sup>Canancëbë ca Pedro abë 'icë męcën  
rabé 'imainun achúshi unibë nirui  
munuma banaquin cacëxa:

—Judíos unibu 'imainun Jerusalénu  
'icë unicama, mitsúnmi 'unánun ca 'en  
mitsu camainun cuat. <sup>15</sup>Mitsun  
sináncëxa ënë unicamax paéncë 'ainbi  
ca bari xamárucëma pain 'ain asérabi  
paéncëma 'icën, <sup>16</sup>An Nucën Papa Dios  
quicë bana uni ñuixuncë uni, Joel cacë,  
an cuëneo bana quicësabi oi ca ësai 'ia.  
A banax ca ësai quia:

<sup>17</sup>Nucën 'Ibu Diosan ca caia: Mecama  
cëñúçëma pain 'ain cana  
unicamanu 'en Bëru Ñumshin Upí  
atubë 'inun xuti 'ain. Xucëxun ca  
Israel unicama, xanu 'imainun bëbu,  
anbi 'ëx quia bana uni ñuixunuxun  
'aia. 'Imainun ca bënábu unicaman-  
ribi 'en ismicëxun ñu isnuxun 'aia.  
Caniacëcë unicamanribi ca 'en  
'amicëxun namánuxun 'aia.  
<sup>18</sup>Usaribi oquin cana an 'en bana  
cuacë bëbu 'imainun xanu, abëa  
'inun 'en Bëru Ñumshin upí 'inánu-  
xun 'ain. 'Ináncëxun ca 'ë ñuiquin  
uni ñuixunuxun 'aia. <sup>19,20</sup>Èn 'imicëx  
mecama cëñúti nëtë 'icëma pan 'ain  
cana a isia ratúti ñu nañua  
unicama ismiti 'ain. Usonan cana  
menuaribi unin sináncëma ñu, imi  
'imainun tsi 'imainun tsin cuin,  
acamaribi isminuxun 'ain. 'Imainun  
ca bari bëánquinuxun 'aia. Bari  
bëánquimainun ca 'uxë imisa  
'inuxun 'aia. <sup>21</sup>Usai 'icëbë ca uinu  
'icë unicaman cara aín 'Ibu Dios 'ë  
ñucatia, acamax ca 'ënan 'inux iécë  
'inuxun 'aia.

Usai ca Joelnën cuëneo bana quia.

<sup>22</sup>Usaquin canan ca Pedronën ësaquin-ribi cacëxa:

—Israel unicama, 'ën mitsu camainun ca cuat: Jesús Nazaretnu 'icë, an ca Nucën Papa Diosan 'amicëxun mitsúnmi ismainunbi, ax ca Nucën Papa Diosnuax uá 'icë quixuan unicaman 'unánun, uni itsían 'acëma ñuira 'axa. An 'acë ñucama camina mitsun 'unan. <sup>23</sup>Usoquian ñu 'acëbi camina mitsun unían 'inancëxun bixun 'aisama uni rabécëñun i curúsocënu matásmítancëxun bamamian. Usai ca 'iti 'icë quixuan, ënë nëtë unitisama pain 'ain Nucën Papa Diosan mënfosabi oi ca 'iixa.

<sup>24</sup>Usoquian unin 'acëbi ca Jesús a Nucën Papa Diosan baísqumíaxa, uisatimoía tsónun. Ax asaribi cushiira 'icëa uinu 'icë unínbi ashiquin bamamisama 'icë ca Nucën Papa Diosan aín Bëchicë baísqumíaxa. <sup>25</sup>David ax ca Jesús ñui ësai quiaçëxa:

'Ën cana Nucën 'Ibu 'ëbëbi 'ia isan.

'Ëx racuëti masá nuitununma ca ax 'ën mëqueu 'icën. <sup>26,27</sup>Usa 'ain cana chuámashirua tani cuëeni bana upitainshi banan. 'Ëx bamaxbi anu uni bamatancëx aín bëru ñumshin 'icë, anu 'ën bëru ñumshin 'inun camina ëntima 'ain. Usoquin camina, minan 'icë upí isquin bamacëbi 'ën namicama chëquinun 'ë 'imitima 'ain. Usa cupí cana, bamaxbi cana baísquiti 'ai quixun sinani mimi catamëti cuëenin. <sup>28</sup>Min camina upí nuituñu 'aish chuámashirua tsónun 'ë 'unánmian. Usa 'ixun camina 'ëbë 'ixun chuámashirua tani cuëenun 'ë 'imiti 'ain.

Usai quiquin ca David an Jesús ñuiquin cuëneocëxa.

<sup>29</sup>'Ën xucéantu, aséرابي ca nucën rara, David, bamatancëx me quininu mënfoçë

'iacëxa. Usoquian anu 'acan ax ca bëri nëtënbí anu 'icën. <sup>30</sup>David, ax ca an Nucën Papa Dios quicë bana unicama ñuixuncë 'iacëxa. Usa 'ixun ca paránu-xunma Nucën Papa Diosan —min rëbúnqui achúshinëx ca judíos unicaman 'apu, Cristo, 'inuxun 'aia —quixun cá bana a 'unancëxa. <sup>31</sup>Usa 'ixun ca David an bërámá 'unánxun 'acësoquin, aín rëbúnqui Cristo axa bamatancëx baísquiti a ñui, bamatancëxbi ca aín bëru ñumshin anu uni bamacëcama cuancë, anu ëncëma 'ianan aín namicamaxribi chëquitima 'icë quixun ñuiacëxa. <sup>32</sup>Davidnën cuëneo bana quicësabi oquin ca Nucën Papa Diosan Jesús bamacëbi baísqumíaxa quixun cananuna nucamanbí 'unan. <sup>33</sup>A ca Nucën Papa Diosan abë 'Apu 'iti aín cushínbi baísqumiquin an cásabi oquin aín Bëru Ñumshin Upí 'inánxa. Usa 'ain ca ami mitsun isanan cuacë ñucama, ënëx aín Bëru Ñumshin Upitan 'imicëx ësai 'ia. <sup>34,35</sup>David ax ca naínu cuanma 'icën. Naínu cuanxunmabi ca an ësai quicë bana cuëneocëxa:

Nucën 'Ibu Diosan ca 'ën 'Ibu Cristo caxa: Axa mimi nishcë unicama 'ën mi 'ibuamimainun camina 'ën mëqueu 'ianan 'ëbë 'apu 'iti 'ain.

<sup>36</sup>Usa 'ain camina mitsux Israel unicama 'ixun aséرابي 'unánti 'ain, mitsúnmi i curúsocënu matásmicë, a Jesúsbi ca Nucën Papa Diosan nucën 'Ibu 'imianan axa utinu nun caíncë, Cristo, a 'imiíaxa.

<sup>37</sup>'Ësoquian cacëxun cuati —'atimabi cananuna a —quixun sinani ratúquin ca Pedrocëñun abëa 'icë unicama ñucáquin cacancëxa:

—'Ën xucéantu, 'atimabi cananuna usoquin a 'an. ¿Upí 'inux caranuna bëri usai 'iti 'ain?

<sup>38</sup>Cacëxun ca Pedronën atu cacëxa:

—'Atimoquin sinánxunbi camina sinanaquin, upí oquin Nucën Papa

Diosmi sinánti 'ain. Usai 'itancëx camina mitsun 'uchacama téréncë 'inun Jesucristomi catamëti nashimicë 'icanti 'ain. Usai 'icëbëtan ca Nucën Papa Diosan aín Bëru Ñumshin Upí abëmi 'inun mitsu 'inánti 'icën. <sup>39</sup>Ënë banacamax ca mitsu 'imainun mitsun bëchicë cama 'imainun bëtsi unicamanribi cuati oquin Nucën Papa Diosan mënío 'icën. Amia sinánmisa tancë unicamanribi cuati oquin ca usoquin mëníocëxa.

<sup>40</sup>Usoquin canan ca bana raíriribi ñiuxunquin Pedronën 'ësëquin cacëxa: —Ënë nëtënu 'icë unían a 'unáncëma 'aínbi camina mitsux Jesucristomi sinanati Nucën Papa Diosnan 'inux iéti 'ain.

<sup>41</sup>Usaquian Pedronën cacëxun cuaquin ca 'itsa unin —asérabi ca a bana 'icë —quixun sináncëxa. Sinani ca a nëtënbí nashimicë 'aish tres mil uníríbishi axa Jesúsni sináncë unicamabë 'iacëxa. <sup>42</sup>Usai 'itancëx ca an bana ñiuxunuan Jesusan cafcscë unicaman bana ñuia cuaquin upí oquin sinani camáxbi nuibanancëxa. Nuibanani ca camabi nëtën timéquin, ënima Nucën Papa Diosbë bananan pán təcënpaxun pi, camáxbi achúshinën sinánsashi 'aish a ëmanu bucüacëxa.

#### Axira pain Jesucristomi sináncë unicamaxa usai 'ia

<sup>43</sup>Usa 'ain ca atun 'aia isía, a ëmanu 'icë unicamax ratúmainun aín bana ñiuxunuan Jesucristonën cafcscë unicaman uni itsin 'acëma ñu 'acëxa. <sup>44</sup>Usomainun ca axa —asérabi ca Jesusan cushínbi ñu 'aia —quixun sinani Jesucristomi catamëcë unicamax bëtsibë bëtsibë nuibanani camáxbi ñuñu 'inux atun ñu 'inánani 'aquianancëxa. <sup>45</sup>Usai 'iquin ca atun ñu maruanan aín me maruxun curíqui bixun ñuñuma unicama 'ináncëxa. <sup>46</sup>Camabi nëtën

anuxun Nucën Papa Dios rabiti xubunu a rabinux timéanan ca atun xubunuribi timéxun Jesúsni sinánquin təcënpaxun pán pianan bëtsi ñuribi piquianani cuëni bëtsibë bëtsibë nuibanancëxa. <sup>47</sup>Usaía 'ia isquin ca axa atubë timéçëma unicaman —atux ca asérabi upí nuituñu 'icë —quixun sináncëxa. Sinania ca uicamax cara ainan 'iti 'icë acamaxa Jesucristomi sinánun Nucën 'Ibu Diosan 'imiácëxa.

#### Aín niti bëtsicë uni pëxcúa

**3** <sup>1</sup>Usa 'ain ca bari cuabúcëbë a las tres 'ain camabi nëtéan 'icësabi, Pedrobë Juan anxun Nucën Papa Dios rabiti xubunu abë banai cuancëxa.

<sup>2</sup>Cuanx bëbaquin iscëxbi ca uni achúshi aín niti bëtsicë, usabi bacéan, anu tsoócëxa. Camabi nëtéan bëxun bëxun tsónccancëxun ca anxun Nucën Papa Dios rabiti xubu aín xëcuë Upíira cacë, anxun unicama atsinia curíqui ñucácëxa. <sup>3</sup>Usa 'ixun ca anu tsóxun Pedrocëñun Juan atsiní aia isquin, curíqui isa 'inánun quixun cacëxa.

<sup>4</sup>Cacëxunbi ca Juanbëtan isquin Pedronën cacëxa:

—Nu ca is.

<sup>5</sup>Ësaquian cacëxun ca —'ë sapi ca curíqui 'inánti 'icë —quixun sinani cuëñquin caíancëxa. <sup>6</sup>Caíncëxunbi ca Pedronën cacëxa:

—Curíquiñuma cana 'ain. Usa 'aínbi cana bëtsi ñun mi 'aquinti 'ain. Jesucristo, Nazaretnu 'icë, an 'ë 'amicëxun cana mi cain, niruquiani ca cuantan.

<sup>7</sup>Caxun ca aín məcën mëquenën mēínquin biruacëxa. Usocëxëshi ca aín uxútucuru 'imainun aín taë cushi niisa 'inun pëxcúacëxa. <sup>8</sup>Pëxcutishi munuma niruishi nitsi cuëni chirini, Pedro 'imainun Juanbë anxun a rabiti xubunu atsínquin ca Nucën Papa Dios

rabiacëxa. <sup>9</sup>Usai 'iquin Nucën Papa Dios rabia nitsia ca camabi unin isacëxa. <sup>10</sup>Isi ca, ënë unix ca an anuxun Nucën Papa Dios rabiti xubu xëcuë Upíira cacë, anu tsóxun uni curíqui ñucácë a 'icë quixun 'unani atun bëmánan pëqui ratúcan-cëxa.

**Anun uni nicë, Salomón cacë, anuxun Pedronën bana ñuixuan**

<sup>11</sup>A unin ca Pedrocëñun Juan ënquinma 'aracaraishiacëxa. Usa 'aísha anuxun Nucën Papa Dios rabiti xubu amo anun uni nicë, Salomón cacë, anu a rabébëbi cuania isi ca ratuti abáquiiani cuanx anu timécancëxa. <sup>12</sup>Usaria isquin ca Pedronën anu timécëcama cacëxa:

—Israel unicama, ¿uisacatsí caramina ënë isi ratutin? ¿Uisacasquin caramina nu ñachaira ñachain? Nun cushínbi isanuna 'a quixun sapi camina sináncanin. Nux upí 'ixun isanuna ënë uni nimia quixun sapi camina sináncanin. <sup>13</sup>Usama ca. Nucën Papa Dios, aira nucën rara Abraham, Isaac, Jacob acama 'imainun nucën raracama 'imainun nucën chaitiocëcaman rabia, an ca aín Bëchicë Jesús asaribi cushi 'inun 'imiáxa. Usa 'icëbi camina uni isa 'aminun quixun mitsun 'apucama 'ináncan. 'Ináncëa Pilatonën ëinsa tancëbëbi camina mitsux cuëncëma 'ain. <sup>14</sup>Usai 'iquin camina axa ñu 'atima 'acëma 'aish upíira sinánñu, a chiquínun caquinma, an uni 'acë uni a chiquínun quixun mitsun Pilato can. <sup>15</sup>Usoquin camina mitsun an unicama Nucën Papa Diosnan 'inúxa abë 'inun 'imiti, Jesus, a uni 'amian. Usoquinmi 'amicéxa bamacëbi ca Nucën Papa Diosan a baísqumiáxa. Bamacëa baísqumicë cananuna nun asérami isan. <sup>16</sup>Usa 'ain ca nux asérami ami sináncë 'ixun —Jesusan ca ënë uni pëxcuti 'icë —quixunu nun sináncëbë, mitsúnmi a iscë 'ixun 'unáncë

uni ënëx upiti pëxcúaxa. Jesucristonëan pëxcutisa tancëbëtan nun 'aquincëx ca upitiira pëxcúaxa quixun camina iscanti 'ain.

<sup>17</sup>Ësoquin catancëxun ca Pedronën amiribishi cacëxa:

—Ën xucëantu, cana mitsu cain, 'ën cana 'unanin, asérami ca ax Nucën Papa Diosan Bëchicë 'icë quixun 'unánxunmaishí camina mitsun 'apucamabëtanbi, mitsun Jesús uni 'amian, <sup>18</sup>Usa 'aínbi camina mitsun, an sinánmicëxun uni ñuixuncë unicama Nucën Papa Diosan usaia Cristo 'iti ñuiquian cuënëomia banaxa quicësabi oquin 'acan. A banax ca quia, Nucën Papa Diosan ënu unun xuá, Cristo, ax ca paë tani tëmëratí 'icë quiax. <sup>19</sup>Usa 'ain camina 'atimaquin sinánxunbi sinanaquin mitsun 'uchacama tërëncë 'inun Nucën Papa Diosmi sinánti 'ain. Ami sináncëxun ca Nucën 'Ibu Diosan mitsun 'uchacama tërëanan chuámarua 'inun mitsu cuëñmíti 'icën. <sup>20</sup>Usonan ca Jesús, axbi Cristo 'icë, a Nucën 'Ibu Diosanbi bërâma mënîosabi oi mitsun 'apu 'inun ënë menu utëcëñun quixun xuti 'icën. <sup>21</sup>Ucëma pan 'aísha Jesucristo anu ax 'icë anu 'imainun ca Nucën Papa Diosan, an ax quicë bana uni ñuixuncë unicaman cuëñëosabi oquin, camabi ñu sënëonti 'icën. <sup>22</sup>Moisésnën ca bërâma nucën rara judfos unicama ësaquin cacëxa: “An 'ë 'imicësaribi oquin ca Nucën 'Ibu Diosan mitsun rëbúnqui achúshi an ax quia bana unicama ñuixunti 'imiti 'icën. 'Imicëxuan an atu cacësabi oi ca mitsun rëbúnquicama 'iti 'icën. <sup>23</sup>Uinu 'icë unin cara an ñuia, aín bana cuatima, ax ca Nucën Papa Diosnanma 'aish Israel unima 'iti 'icën”.

<sup>24</sup>Moisésnëan usaquin cuëñëosabi oquin ca Samuelnën pan 'acëbëtan an Nucën Papa Dios quicë bana uni ñuixuncë uni raírinëñribi, Cristo uti nëtë ñuiquin unicama ñuixuancëxa.

<sup>25</sup>Ēsoquin canan ca Pedronën ěsaquin-ribi cacĕxa:

—A unicaman axa uti ñuia, ax ucĕ cupí camina mitsúnribi chuámarua 'inuxun aín bana cuati 'ain. Usai 'iti oquin ca Nucĕn Papa Diosan bĕráma mitsun rara Abraham ěsaquin cacĕxa: “Min rĕbúnqui achúshi cupí ca camabi menu 'icĕ unicamax cuĕñunuxun 'aia”.<sup>26</sup>Nucĕn Papa Diosan ca aín Bĕchicĕ bamacĕbi baísquimitancĕxun judíos unicama mitsunu pain xuaxa, mitsúnmi a isi ami sinanaquin ñu 'atima 'ati ěnun quixun.

**Unicaman Pedro 'imainun  
Juanmi atun 'apucama manon**

**4**<sup>1</sup>Usaquian Pedrobĕtan Juanĕn camainun ca judíos sacerdotecama 'imainun anuxun Nucĕn Papa Dios rabiti xubunu 'icĕ policíanĕn cushi 'imainun saduceo unicamax uacĕxa. <sup>2</sup>An —bamaxbia Jesús baísquicĕ 'ain ca camabi uníxribi bama 'aíshbi baísquiti 'icĕ —quixun unicama ñuixuncĕ cupí ca axa ucĕ unicamax Pedro 'imainun Juanmi nishacĕxa. <sup>3</sup>Nishi atúan bana ñuixuncĕbĕ uquin ca Pedrocĕñun Juan bibianquin buáncĕxa. Buánxun ca bari cuabúcĕbĕa imĕ 'ain, imĕshiira ñucánuan pĕcaratamainun sipunu atsínmiaĕxa. <sup>4</sup>Usa 'aínbi ca an a ñuiquin bana ñuixuncĕxun cuati Jesúsmi catamĕcĕ unicamax 'itsaira 'iacĕxa. Acamax ca xanucĕñunma nucĕ bĕñĕcamaishi tupúncĕx cinco milsa 'iacĕxa.

<sup>5</sup>Sipuonx pĕcaracĕbĕ ca judíos unibunĕn 'apucama 'imainun caniacĕcĕ unicama 'imainun an Moisésnĕn cuĕñĕo bana 'unáncĕ unicama, Jerusalénu timĕacĕxa. <sup>6</sup>Acamabĕ ca judíos sacerdotenĕn cushicaman 'apu, Anás, a 'imainun Caifás, Juan, Alejandro 'imainun judíos sacerdotenĕn cushica-

man aintai 'ibucamaribi anu timĕcĕ 'iacĕxa. <sup>7</sup>Anu timĕxun ca Juancĕñun Pedro sipunua bĕnun quixun suntáru xuacĕxa. Xucĕxuan chiquínbĕtsinquin bĕxun suntárunĕn axa timĕcĕ unicama nĕbĕtsi nitsíncĕ ca anu 'icĕ 'apucaman ñucacĕxa:

—¿Uían 'amicĕxun caramina aín niti bĕtsicĕ uni pĕxcúan? ¿Uisa cushiñu 'ixun caramina 'an?

<sup>8</sup>Ñucacĕxun ca Nucĕn Papa Diosan Bĕru Ñumshin Upitan quimicĕxun Pedronĕn cacĕxa:

—Judíos 'apucama 'imainun caniacĕcĕ unicama, cananuna mitsu cain: <sup>9</sup>Aín niti bĕtsicĕ unia pĕxcúĕcĕ ñuiquin camina uisai cara pĕxcúonxa quixun nu ñucatin. <sup>10</sup>Usa 'ain cananuna Israel unicaman 'unánun mitsu cain, Jesucristo, Nazaretnu 'icĕ mitsúnmi i curúsocĕnu matásmicĕx bamacĕbia Nucĕn Papa Diosan baísquimicĕ, an 'imicĕx ca mitsúnmi iscĕ ĕnĕ uni pĕxcúonxa.

<sup>11</sup>Cuĕñĕo bana axa ĕsai quicĕ a camina 'unan, an maxax xubu 'acĕ unían a cuĕñnquinma raírishi caísun biquin racáncĕ maxax 'aíshbi ca a maxax bĕrí ami a xubu cushicĕ 'icĕn, itá upímia xubucama cushicĕ usaribiti. A banaxa quicĕsaribiti ca Jesucristo ami aín unicama cushicĕ 'iti 'icĕ quixun ca Nucĕn Papa Diosan bĕrí mĕñfoxa.

<sup>12</sup>Nucĕn Papa Diosan ca nuxnu nun 'uchacama tĕrĕncĕ 'aish abĕ 'inúan an nu iĕminun Jesúsĕshi 'imíaxa. Usa 'ain ca an Nucĕn Papa Diosan 'inun nu iĕmiti bĕtsi uni 'aíma 'icĕn.

<sup>13</sup>Usa 'ain ca Pedrobĕtan Juanĕn quirica 'unáinracĕma 'ianan 'apuma 'ixunbi racuĕquinma unicama bana ñuixunia isi judíos 'apucamax ratúacĕxa. Usai 'iquin ca —ĕnĕ uni rabĕtax ca axa Jesúsĕbĕ nicĕ a 'icĕ —quixun sínáncĕxa. <sup>14</sup>Usaquin sínánmainun ca a pĕxcucĕ uni axribi atubĕ niacĕxa. Nitsia isquin

ca uisoquinbi Pedrocëñun Juan cacanma 'icën. <sup>15</sup>Caquinmabi Pedrocëñun Juan ëmáxnun cañnun quixun chiquíntancëx ca atúxbi ñucacananí ësai canancëxa: <sup>16</sup>—¿Uisa caranuna ënë uni rabé oti 'ain? Enën ca uni itsin 'acëma ñu 'axa. Usoquian 'acë ca Jerusalénu 'icë unicaman 'unania. Usa 'ain cananuna, usama ca quixun catima 'ain. <sup>17</sup>Caquinmabi cananuna uni raírinëan cuanúnma ësöquin a rabé cati 'ain, Jesús ñuiquian uinu 'icë unibi catëcëxnunma 'anun. Jesús ñuiquinmi uni bana ñuixuntëcënia cananuna mitsu castícantí 'ai quixun cananuna cati 'ain.

<sup>18</sup>Usai canantancëxun ca Pedrocëñun Juan cuënxun cacëxa:

—Jesús ñuiquin camina uinu 'icë unibi bana ñuixuanan 'unánmitëcëntima 'ain.

<sup>19</sup>Cacëxunbi ca Pedrobëtan Juanën atu cacëxa:

—Mítsúnbi ca sinan, ¿Nucën Papa Dios cara cuënti 'ic, nun nu aín bana manuanan mitsun banaishi cuati? <sup>20</sup>An ñu 'aia isananu nun cuacë Jesusan bana ënë cananuna unicama ñuixuntëcënti ëntima 'ain.

<sup>21</sup>Usaquin cacëxun ca 'apucaman castícainsa tanquinbi, atun uni pëxcucë cupía unicaman Nucën Papa Dios rabicëbëtan 'ama 'icën. Usa 'ixun ca —ñuixuntëcënia caranuna mitsu uisoti 'ai —quixuinshi catancëxun cuantánun ëancëxa. <sup>22</sup>Axa pëxcútisama 'aishbi pëxcúcë uni ax ca cuarenta baritia inúcë 'iacëxa.

**Aín unicaman Nucën Papa Dios  
aín cushia 'inánun ca**

<sup>23</sup>Usa 'ain ca cuanxun Pedrobëtan Juanën —judíos sacerotenën cushicamabëtan ca caniacëcë unicaman nu usaquin caxa —quixun aín raíri ñuixuancëxa. <sup>24</sup>Ñuixunia cuaxun ca

camáxbi abë banaquin Nucën 'Ibu Dios cacëxa:

—Min camina naí, me, bacacama unionan camabi ñuribi uniocën. <sup>25</sup>Min Bëru Ñunshin Upitan 'imicëx ca nucën rara David, an mi rabicë, ax ësai quiacëxa:

¿Uisa cupí cara judíosma unicamax tsuáquirui nishia? ¿Uisa cupí cara unicaman 'atimaquin sinanin? Atúan usaquin sináncëxbi ca ñancáishi 'iti 'icën. <sup>26</sup>Nucën 'Ibu Diosmi 'ianan ca aín Bëchicë Jesucristomiribi 'i ënë menu 'icë 'apucama tsuáquiruaxa, aín tucuricucamaxribi ca ami 'i timéaxa.

<sup>27</sup>David quiásabi oi ca asérami ënë ëmanuax Herodesbë Poncio Pilato 'imainun judíosma unicama 'imainun Israel unicamaxribi, min Bëchicë upíra sinánñu, Jesús, ënë menu unúnmi cáisa, ami nishi tsuáquirui timéaxa, <sup>28</sup>usai ca 'iti 'icë quixunmi mëníosabi oi ca usai ami 'i axa. <sup>29</sup>Usa 'ain camina a unicamaxa usai numi 'esëncancë a bana min 'unánquin, racuéquinma nun min bana uni ñuixunun nu 'aquinti 'ain. <sup>30</sup>'Aquianan camina min Bëchicë upíra sinánñu, Jesús, aín cushin, uni 'insíncë pëxcüanan uni itsin 'acëma ñu 'anun nu 'amiti 'ain.

<sup>31</sup>Usaquin abë banaquin Nucën Papa Dios catancëxa sënëncancëbë ca anua bucucancë xubu ax shaiquiacëxa. Usaía 'icëbëshi aín Bëru Ñunshin Upí atunu ucëbëtan ca an quimicëxun racuéquinma Nucën Papa Diosan bana unicama ñuixuancëxa.

**An Jesúsmi sináncë unicama ñu 'inánan**

<sup>32</sup>Usa 'ain ca axa Jesús ñui quicë bana cuati ami catamëcë unicaman, camaxunbi bëtsin sináncësa oquin sináncëxa. Camaxunbi ca sináncëxa,



—'ën 'aracacë ñucamax ca 'ënanshima, camabi uninansa 'icë —quixun.

<sup>33</sup>Usaxun ca Jesusan aín bana ñuixunun caíscë unicaman atun iscë 'ixun, Nucën 'Ibu Jesús bamacë 'afshbia baísqüicë ñuiquin, racuéquinma upí oquin Nucën Papa Diosan 'aquincëxun unicama ñuixuancëxa. Usa 'ain ca an bana ñuixuncë unicamacëñun an aín bana cuacë unicamaribi upí sinánñu 'aish cuëñun Nucën Papa Diosan 'imiacëxa.

<sup>34</sup>Uinu 'icë uníxbi ca anun aín piti aín chupa marutiñuma 'iáma 'icën. Naëñu unicaman atun naë marumainun ca xubuñu unicamanribi atun xubu maruacëxa. <sup>35</sup>Maruxun curíqui bixun ca Jesusan aín bana ñuixunun caíscë unicama 'ináncëxa. 'Ináncëxun bixun ca atun uinu 'icë unix cara anun aín piti, aín chupa maruti 'aíma 'icë, a curíqui mëtícaquin 'ináncëxa. 'Ináncëx ca uni achúshiratsubi ñuñuma 'iáma 'icën.

<sup>36</sup>Axa usai 'aquianancë unicama achúshi ca Levitan rëbúnqui, José cacë, Chipre nasínu 'icë, 'iacëxa. Ax ca Jesusan caíscë unicaman Bernabé caquinribi anëcë 'iacëxa. A banax ca an masá nuitutiabi cuëñmicë qui quicë 'icën. <sup>37</sup>Usa 'ixun ca Bernabénen aín naë maruxun curíqui bixun bëxun Jesusan caíscë unicama 'ináncëxa.

#### Ananíasbëa Safira 'ucha

**5**<sup>1</sup>Usa 'ainbi ca bëtsi uni, Ananías cacë, aín xanu, Safira cacë, abëtan aín naë maruquin curíqui biacëxa.

<sup>2</sup>Bixunbi ca aín xanúan 'unáncëbi, naë cupí bicë curíqui mësú ainanbi 'inun nanan acamaishi isa biaxa quixun paránquin mësúishi buánxun Jesusan caíscë unicama 'ináncëxa. <sup>3</sup>Inania ca Pedronën cacëxa:

—Ananías, çuisacasquin cara ñumshin 'atimanën 'apu, Satanás, an 'ibuaquin, Nucën Papa Diosan Bëru Ñunshin Upí

paráncësa 'ixunmi me cupími bicë curíqui mësú binun mi sinánmiax?

<sup>4</sup>Minan 'aish ca a me maruxunmi a cupí bicë curíqui mix cuëñcësabi oquin 'ati asábi 'iáxa. ¿Uisa cupí caramina cëmëti sinan? Mix usai 'icë ax ca unimishi cëmëcëma 'icën. Camina Nucën Papa Diosmi cëmëan.

<sup>5</sup>Ësai quia cuatishi ca Ananías nipacëti bamacëxa. An usai bamacë ñuicania cuacë unicamax ca racuéiracëxa. <sup>6</sup>Bamacëbë uxun ca anu 'icë bënë unicaman chupan rabúnbianquin buánxun Ananías maíancëxa.

<sup>7</sup>Usai 'ian rabé 'imainun achúshi hora 'icëbë ca aín xanuribishi aín bënëa bamacë 'unánxmaishi uax xubunu atsiáncëxa. <sup>8</sup>Atsinia ca Pedronën cacëxa:

—'Ë ca ñuixun. ¿Min me cupí caramina ënë curíquicamaishi bian? Cacëxun ca xanun cacëxa:

—Usa ca aín cupí 'iáxa, ashí cananuna bian.

<sup>9</sup>Cacëxunbi ca Pedronën cacëxa:

—¿Uisaira 'ixun caramina Nucën Papa Diosan Bëru Ñumshin Upí parani ami 'uchati min bënëbëtan sinan? Bënëa unicama ca min bënë maínbëtsini aia. Atun ca usaribitimi bamaia miribi buánti 'icën.

<sup>10</sup>Cacëxëshi ca Pedro tanáin nipacëti bamacëxa. Usai 'ia ca bënëa unicama atsiñquinbi bamacë mëraxun bibianquin buánxun aín bënë rapasu maíancëxa.

<sup>11</sup>Usacëbë ca axa Jesucristomi catamëcë unicama 'imainun an ñuicania cuacë unicamaxribi racuéira racuéacëxa.

#### Jesusan aín bana ñuixunun caíscë unicaman uni itsin 'acëma ñu 'a

<sup>12</sup>Usa 'ain ca Jerusalénu 'icë unicaman, ax ca atubë 'icë quixun 'unánun Nucën Papa Diosan 'amicëxun, Jesusan caíscë unicaman uni itsin

'acëma ñu 'acëxa. Usocëbë ca axa Jesúsmi catamëcë unicamax Salomón cacë anun uni nicë, anubi 'i anuxun Nucën Papa Dios rabiti xubunu camabi nëtën timéacëxa. <sup>13</sup>Anu timéaxa 'icëbëbi ca ami racuëti uni raíri atubë 'iáma 'icën. 'Iquinmabi ca —atux ca atun naitu asérabi upí 'icë —quixun sináncëxa. <sup>14</sup>Usaía 'imainun ca bëtsi unicamaxribi 'itsaira, xanubëbi bëbuca-maxribi Nucën 'Ibu Jesúsmi catamëcëxa. <sup>15</sup>Usa 'ain ca camabi unin, uni 'insíncëcama aín bacéтинëbëxun bëxun, anúan Pedro uti bainu nancëxa, Pedro cuaíncëbëtan aín tupéoncëinshi pëxcúnun quixun. <sup>16</sup>Usomainun ca Jerusalén 'urama 'icë émanu 'icë unicamanribi uni 'insíncë 'imainun uni ñumshin 'atimañu a camabi bëacëxa. Bëcëx ca pëxcúcancëxa.

#### Pedrocëñun Juan 'atimocan

<sup>17</sup>'Aisamaira uni Jesúsmi sinania isi ca judíos sacerdotenën cushicaman 'apu 'imainun abë 'icë saduceo unicama nishacëxa. <sup>18</sup>Nishi ami tsuáquiruxun ca Jesusan aín bana ñuixunun caiscë unicama bixun sipuacëxa. <sup>19</sup>Usocëbi ca Nucën 'Ibu Diosan xucëx, imé uxun, aín ángel achúshinën sipu xéócaxun chiquínquin cacëxa: <sup>20</sup>—Anuxun Nucën Papa Dios rabiti xubunu cuanxun camina Jesúsmi catamëcë 'aish ca uni Nucën Papa Diosnan 'iti 'icë quicë bana unicama ñuixunti 'ain.

<sup>21</sup>Ësoquian ángelnën cacësabi oquin ca pëcaracëbë cuanxun anuxun Nucën Papa Dios rabiti xubunu atsínxun anu 'icë unicama bana ñuixuancëxa.

Bana ñuixunmainun ca sacerdotenën cushicaman 'apu 'imainun abë 'icë unicaman, judíos cushibunën 'apucama timémianan sipuacë unicama bënun quixun policia xuacëxa. <sup>22</sup>Xucëx cuanxunbi ca policíacaman sipunua

mëráma 'icën. Usobëtsini utëcënxun <sup>23</sup>ca cacëxa:

—Nun iscëx ca asérabi sipu cushioquin xëtáscë 'iáxa. An bërúancë suntáru-camaribi ca aín xëcuë tanáinbi nicë 'iáxa. 'Aínbi ca nun xëocaquin iscëxbi uni achúshibi 'aíma 'iáxa.

<sup>24</sup>Policia quia cuati ca sacerdotenën cushicaman 'apu 'imainun anuxun Nucën Papa Dios rabiti xubunu 'icë guardianën 'apu 'imainun sacerdotenën cushicamax ratuti canancëxa:

—¿Uisashi oquin cara ënë unin nu sináncasmamiti 'ic?

<sup>25</sup>Usai 'ia ca uni achúshinën uxun cacëxa:

—Mínmi sipuoncë unicaman ca anuxun Nucën Papa Dios rabiti xubunu-xun unicama bana ñuixunia.

<sup>26</sup>Ësoquin cacëx cuanxun ca policíacama bëtan aín cushin, anuxun Nucën Papa Dios rabiti xubunu atsínxun, bana unicama ñuixuniabi a unicama biacëxa. Bixunbi ca unicaman maxaxan 'ati sinani racuëquin, mëëquinma anua judíos cushicaman 'apucama timéccë anu upí oxuinshi buáncëxa. <sup>27</sup>Usobëtsin-quian bëcancë ca sacerdotenën cushicaman 'apun cacëxa: <sup>28</sup>—Nun cananuna mitsu amiribishi Jesús ñuiquin bana ñuixunxunma 'anun quixun can. Cacëxunbi mitsun nëtëquinma a bana uni ñuixunia chaniaia ca Jersualénu 'icë unicaman cuaxa. Usa 'aish camina nun isanuna uni Jesús 'amia quiaxribi quicanin.

<sup>29</sup>Ësai quia ca Pedrobëtan Jesusan aín bana ñuixunun caiscë unicaman cacëxa:

—Unin cacësa oquin 'aquinbi cananuna Nucën Papa Dios, a 'ati cuëncëma ñu a 'aquinma, a 'atia ax cuëncë, a ñu cuni 'ati 'ain. <sup>30</sup>Aín Bëchicë, mitsun i curúsocënu uni matásmicë, a ca Nucën Papa Dios, a nun rabiçsaribi oquin nucën raracaman

rabia, an baísquimiaxa. <sup>31</sup>Usotancëxun ca abëa aín mëqueu 'Apu 'inun 'imiaxa. 'Imianan ca axa atun 'Apu 'aian a cupíshi sinanati Israel unicama atun 'ucha tērécë 'aish iécë 'inun 'imiaxa. <sup>32</sup>Ax ca asérabi usa 'icë quixun cananuna nun camabi uni cain. Nucën Papa Diosan aín bana cuacë unicama 'ináncë aín Bëru Ñunshin Upí, anribi ca —asérabi ca usa 'icë —quixun uni 'unánmia.

<sup>33</sup>Quia cuati nishquin ca judfós unibunën 'apucaman atu 'ati sináncëxa. <sup>34</sup>Usa 'ainbi ca 'apucama achúshi, fariseo uni, Gamaliel caquin anécë, anu 'iacëxa. Gamaliel ax ca an usai judfós unicama 'iti Moisésnën cuëño bana 'unáncë 'icëa camabi unin aín bana tancë 'iacëxa. Usa 'ixun ca niruquin atu cacëxa:

—Ënë unicama ca ëman pain chiquin.

<sup>35</sup>Cacëxuan chiquíncëbëtan ca ésoquin 'apucama cacëxa:

—Israel unicama, ënë unicama 'anuxun camina upí oquin pain sinánti 'ain. <sup>36</sup>Mitsun camina sinánti 'ain, uni achúshi, Teudas cacë, an ca ax isa cushi 'icë quixun uni paráncëxa. Paráncëx ca cuatrocientos uni abë timéacëxa. Usa 'icëbia a uni 'acancëbë ca axa abë nicë unicamax tsuáqui abati nētéacëxa. <sup>37</sup>Usoçëxa nētëa 'ainbi ca anun camabi unin aín anë 'ati nētën, Judas cacë uni, Galileanu 'icë, axribi usaribiti ax isa cushi 'icë quixun uni parani cëmëacëxa. Usaria aribishi aín bana cuati ca 'itsa uni abë timéacëxa. Usa 'icëbia a uniribishi 'acancëbë ca axa abë nicë unicama tsuáqui nētéacëxa. <sup>38</sup>Usai 'ia sinánquin cana mitsu cain, ënë unicama camina isëshiti 'icanin. Anbi sináncë banaishi uni ñuixuncë 'aish ca ñancáishi 'iti 'icën. <sup>39</sup>Aínbi, Nucën Papa Diosanbi 'unánmicëxun bana ñuixuanan ñu 'acë 'icë camina uisabi ocantima 'ain. Nucën

Papa Diosmi atumina nishcanin ca bërúanracat.

<sup>40</sup>Ësai quia cuaquin ca —asérabi ca usa 'icë —quixun sináncëxa. Usaquin sinánquin ca Jesusan aín bana ñuixunun caíscë unicama cuënxun rishquitancë xun, Jesús ñuiquin unicama bana ñuixuntécënxunma 'anun catancëxun, cuantánun xuacëxa. <sup>41</sup>Xucëxun 'apucama ëbiani ca —Jesúsnan cupí tëmëranun ca Nucën Papa Diosan nu caísa —quixun sinani cuëñquiani cuancëxa. <sup>42</sup>Cuanxun ca 'apucaman ñuixuntécënxunma 'anun cacëxunbi ënquinma camabi nētën anuxun Nucën Papa Dios rabiti xubunuxun 'anan anua atux 'icë xubucamanuxunribi, Jesús ax ca Cristo axa uti nun caíncë, a 'icë quixun uni bana ñuixuancëxa.

**An raíri 'aquinti mēcën achúshi  
'imainun rabé uni caíscan**

**6** <sup>1</sup>Usomainun ca amiribi amiribi an Nucën Papa Diosan bana cuati unicamax 'itsacëxa. Griego banan banacë unicama 'imainun hebreo banan banacë judfós unicamaribi ca Jesucristomi catamëacëxa. Usa 'aish ca axa hebreo banan banacë unicama ñui ësai griego banan banacë unicamax quiacëxa:

—Camabi nētën piti mētícaquinbi ca nun aínsi xanu casunamécë a piti 'inanima.

<sup>2</sup>Ësai quia cuaquin ca Jesusan aín bana uni ñuixunun caíscë uni mēcën rabé 'imainun rabé an, axa Jesucristomi catamécë unicama camicëxa timëtia, cacëxa:

—Nun Jesucristo ñuiquin Nucën Papa Diosan bana ñuixunquinma uni piti mētícati ca upíma 'icën. <sup>3</sup>Usa 'ain camina mitsun mēcën achúshi 'imainun rabé uni an piti mētícanun cafsti 'ain. Aín sinan ca upí 'icë quixuan unin

'unáncë 'ianan Nucën Papa Diosan Bëru Ñumshin Upitan upí oquin sinánmicë 'ianan sinánñuira ca a unicama 'iti 'icën. Caístancëxun camina atúan uni piti mëtícanun cati 'ain. <sup>4</sup>Usocebëtan cananuna nun abë banaquin Nucën Papa Dios unicama ñucáxuanan aín bana ñuixunti 'ain.

<sup>5</sup>Ësoquian cacëx ca camáxbi cuëëni —cananuna caísti 'ai —quíax canancëxa. Canantancëxun ca Esteban, Nucën Papa Diosmi catamëcë 'icëa aín Bëru Ñumshin Upitan sinánmicë, acëñun Felipe, Prócoro, Nicanor, Timón, Parmenas, 'imainun Nicolás, Antioquíanu 'icë uni 'ixunbia an judíos unicamabëtan Nucën Papa Diosan bana 'unáncë, acama caísacëxa. <sup>6</sup>Caístancë xuan bëia ca Jesusan aín bana ñuixunun caíscë unicaman, mëcënan ramëquin, Nucën Papa Dios ñucáxuanacëxa.

<sup>7</sup>Usa 'ain ca amiribi amiribia, Jesús ax ca asérabi Cristo 'icë quixun Jerusalénu-xun cuacocancëbë, ami sinani Nucën Papa Diosnan 'i unicamax 'itsacëxa. Usai 'icëbë ca judíos sacerdotecamaribi 'itsaxira Jesúsmi catamëacëxa.

### Esteban bican

<sup>8</sup>Esteban axa upí sinan 'ianan Nucën Papa Diosmi cushicë uni an ca, an 'amicëxun uni itsin 'acëma ñu 'acëxa. <sup>9</sup>Usa 'ain ca an uni itsin 'acëma ñu 'aia oi ami nishi, judíos unibunëan ñu mëëmicë 'aíshbia chiquíicë unicamabë Alejandría, Cilicia, 'imainun Asia me acamanuaxa ucë unicamax timéax Estebanbë cërúanancëxa. <sup>10</sup>Usai abë cërúanancëxunbia Estebanën atun 'acësama oquin Nucën Papa Diosan Bëru Ñumshin Upitan sinánmicëxun bana ñuia cuati ca nëtécancëxa. <sup>11</sup>Nëtéxunbi ca uni raíri ësaquin cacëxa: —Nun mitsu cupíomainun camina Esteban ñuiquin unicama cati 'ain, nun

cuacëx ca ënë uni Moisésçëñun Nucën Papa Dios ñui 'atimati banaxa quixun.

<sup>12</sup>Cacëx cuanxun ca camabi uni ñuixuanan caniacëcë unicamaribi 'imainun an Moisésñen cuëñëo bana 'unáncë unicamaribi ñuixunquin tsuácaruacëxa. Tsuácarucëx uxun ca Esteban bibianquin atun cushicaman 'apucamanu buáncëxa. <sup>13</sup>Abë cërúanan-cë unicaman ca uni raíriri cëmëi isa Estebanmi manánun quixun cacëxa. Cacëx cuanxun ca ësaquin cacëxa:

—Ënë unix ca Nucën Papa Diosan xubu upí ñuianan Moisésñen cuëñëo banaribi ñui nëtëtima 'atimati banaia.

<sup>14</sup>Nun cuacëx ca ësai Esteban quiaxa: Jesús Nazaretnu 'icë, an isa anuxun Nucën Papa Dios rabiti xubu rurupanan, Moisésñen ax quicësabi oínu 'inun cuëñëo bana aribi bëtsi oti 'icë quiax.

<sup>15</sup>Usaia a unicamax a ñui quicëbëtan atun cushicaman 'apucama 'imainun anu timécëcëmanaribi iscëxbi ca Estebanën bëmánan ángelnën bëmánansa 'iacëxa.

### Bicëxuan Estebanën racuéquinma unicama ca

**7** <sup>1</sup>Amia manáncania cuaxun ca sacerdotenën cushicaman 'apun Esteban ñucácëxa:

—¿A unicaman mi ñuicë bana ax cara asérabi 'ic?

<sup>2</sup>Cacëxun ca Estebanën cacëxa:

—Ën aintsicama 'imainun caniacëcë unicama nun cushibu, 'ën mitsu camainun ca cuat. Nucën rara Abraham-nëx ca Harán cacë menu 'iisama pain 'aish Mesopotamia menu 'iacëxa. Anua 'icë ca ax upíira 'ixun nucën rara Abraham Nucën Papa Diosan cacëxa:

<sup>3</sup>“Min mecëñunbi camabi min ainti ëbiani camina me itsinu 'ën mi ismimai-nun cuanti 'ain”. <sup>4</sup>Cacëx ca Caldea menuax cuanx Harán menu bëbax anu

tsoócëxa. Anuaxa aín papa bamacëbë ca Nucën Papa Diosan ismiasabi oi, anumi bërí nètëñbi bucucë, ënë menu uacëxa. <sup>5</sup>Usaía ucëbi ca ainanbia 'inun me Nucën Papa Diosan 'inánma 'icën, anua aín taën amátiratsubi. 'Inánquinmabi ca sinanatëcëñuxunma ësaquin Abraham cacëxa: “Ënë mecama cana mi 'imainun min rëbúnquicamaribi 'inánti 'ain”. Bëchicëñuma pain 'icë ca Nucën Papa Diosan usaquin Abraham cacëxa. <sup>6</sup>Catancëxun ca ësaquinribi cacëxa: “Min rëbúnquicamax ca aín menuma, bëtsi unin menu tsónuxun 'aia. Anua tsócëbi ca anu 'icë unin cuatrocientos baritian min rëbúnquicama bëtsi bëtsi oquin ñu mëëminuxun 'aia”. <sup>7</sup>Ësaquinribi ca Nucën Papa Diosan Abraham cacëxa: “Cuatrocientos baritia 'icëbëtan cana an min rëbúnquicama bëtsi bëtsi oquin ñu mëëmicë cupí, anu 'icë unicama tëmëraminuxun 'ain. Usocëxun ca a menuax cuanun min rëbúnqui xuti 'icën. Xucëx ënë menu uxun ca 'ë rabiti 'icën”. <sup>8</sup>Usaquin caxun ca Nucën Papa Diosan Abraham ësaquinribi cacëxa: “Mi 'imainun min rëbúnquicamaribi 'ënan 'icë 'unánti oquin camina min bëbu tuácama aín inshú maxacara tëati 'ain”. Usa 'ain ca Nucën Papa Diosan cacësabi oquin Abrahamnën Isaac bëchitancëxun achúshi semana aín bacéncë nëtë 'icëbëtan 'unántiocëxa. Usaribi oquin ca Isaacnëribishi Jacob bëchitancëxun 'unántiocëxa. Usa 'ixun ca Jacobnëribi mëcën rabé 'imainun rabé oquin bëchitancëxun a camabi 'unántiocëxa. Jacobnën bëchicë mëcën rabé 'imainun rabé acamax ca nucën raracama 'iacëxa.

<sup>9</sup>Jacobnën bëchicë achúshi ca José cacë 'iacëxa. 'Icëbi ca ami nutsi nishquin aín xucéantun Egipto menu buántanun uni maruacëxa. <sup>10</sup>Marucëxuan unin buáncëxa Egiptonu 'iabi ca Nucën Papa

Diosan abë 'ixun 'aquinquin bërúancëxa. Usoquian 'acëxa upí sinánñu 'ixun upí oquin bana cuacë 'icë nuibaquin ca Egiptonu 'icë 'apu Faraón, an anu 'icë unicaman cushi 'imianan an aín xubunu 'icë ñucama bërúantiribi 'imiacëxa.

<sup>11</sup>Faraónnën cacësabi oquian Josénën 'amainun ca Egipto mecamanu 'imainun Canaán mecamanuribi trigo 'aíma 'iacëxa. Usa 'ain ca anu 'icë unicama 'acëñuma 'aish nuibacacëxa. Nuibacacë bë ca nucën raracamaribi pitiñuma 'iacëxa. <sup>12</sup>Piti 'aíma 'ain ca Jacobnën, Egiptonu ca trigo 'itsa 'icë quixuan ñuicania cuaxun aín bëchicë, nucën raracama, anua trigo bitánun quixun xuacëxa. <sup>13</sup>Xucëxun bitsínquin bëxun trigo ancëax ca amiribishi bitëcëni Egiptonu cuantëcëancëxa. Cuanx bëbaia ca Josénën aín xucéantu isquin, 'ëx cana mitsun xucën 'ai quixun cacëxa. Usa 'ain ca acama isquin Egiptonu 'icë 'apu, Faraónnën, Josénën aintsicama ënëx ca judíos uni 'icë quixun 'unáncëxa.

<sup>14</sup>Atubë banaquin ca Josénën aín xucéantu cacëxa, aín aintsi 'ibucamacëñuan aín papa Egiptonu bënun quixun. Aín aintsi 'ibucamax ca setenta y cinco 'iacëxa. <sup>15</sup>Usaquian Josénën cacësabi oi ca Jacob aín aintsi 'ibucamabë Egiptonu 'i cuancëxa. Cuanx anu tsoaxbia Jacobnëx pain 'iá 'ain ca aín bëchicë nucën raracamaxribi bamacëxa. <sup>16</sup>Jacob bamacë ca aín me, Canaán, anu 'icë ëma Siquem cacë, anu buántancëxun anuxunbi aín bëchicëñen maíancëxa. A mex ca Abrahamnëan Hamor cacë unin bëchicëcama curíqui 'inánquin marua 'iacëxa.

<sup>17</sup>Usaquin catancëxun ca ësaquinribi Estebanën cacëxa:

—Jacob, aín anë itsi Israel, a 'imainun aín bëchicëcama Egiptonuax cëñúa 'aínbi ca aín rëbúnquicama anubi buciacëxa. A nëtën Egiptonuax cuanti

Nucën Papa Diosan Abraham ñuixuan, a nètë 'urama 'ain ca Jacobnën bëchicë nën rëbúnquicama nucën rara 'iá, atux 'aisamaira 'inun uati bucüacëxa. <sup>18</sup>Uati Egiptonu bucumainun ca bëtsi uni an José isáma, ax 'apu 'iacëxa. <sup>19</sup>Usa 'ixun ca a 'apux uni paránti 'unáncë 'ianan upíma 'ixun, bëbuaquin bëchicë tuácama bamatanuan 'ura racánun quíxun nucën raracama cacëxa.

<sup>20</sup>Uomainun ca aín titan Moisés bacéancëxa. Usa 'aish ca Nucën Papa Diosan iscëx upíra upí 'iacëxa. Bacéantancëxun ca aín titan aín papabëtan, rabé 'imainun achúshi 'uxën, 'ura racánquinma aín xubunuxunbi unëxun 'unónmiacëxa. <sup>21</sup>Rabé 'imainun achúshi 'uxé 'icëbëtan, 'ura ëncë mëraxun bixun ca Faraónën bëchicë xuntacunën aín tuása 'icë caniocëxa. <sup>22</sup>Cania ca Egiptonu 'icë unicaman atun 'unáncë ñucamaribi 'unánmiacëxa. Usa 'aish sinánñuira 'aish ca ax aín bana 'imainun aín ñu 'acëribi upí 'iacëxa.

<sup>23</sup>Cuarenta baritiañu 'aish ca aín aintsí Israel unicama isti sinánbiani cuancëxa. <sup>24</sup>Cuanquin ca Egiptonu 'icë unin Israel uni achúshi ami mëparamë quin mëëquin 'atimoia mëraxun, anun rabanan nëëquin, Egiptonu 'icë uni 'acëxa. <sup>25</sup>Uotancëxun ca aín aintsí 'aquinsa tanquin Moisésnën sináncëxa, 'ën aintsin ca 'unania, Nucën Papa Diosan 'amicëxun cana atu tëmëraiabi iémiti 'ai quixun. Usaquin Moisésnën sinaniabi ca aín aintsicaman 'unánma 'icën. <sup>26</sup>Usoquin 'onx isi cuantécën-quinbi ca aín aintsí rabé mëëanania mërácëxa. Mëraqin ca ënananmicas-quin cacëxa: ¿Uisacatsi caramina nuibananshitima min aintsibë mëëana- nin? <sup>27</sup>Cacëxun ca an bëtsi paëoquin mëëcë an Moisés cushin titicaquin cacëxa: ¿Uin cara nun 'apu 'ixunmi nun 'acë ñucama mëñonuxun isnun mi cax?

<sup>28</sup>¿Min caramina Egiptonu 'icë unimi 'oncësaribi oquin 'ë rëisa tanin? quixun cacëxa. <sup>29</sup>Usaquin cacëx ratúquiiani abax ca Moisés 'ura 'icë me, Madián, anu cuancëxa. Cuanx bëbaxun ca aín nètë 'aímabi anu tsóquin xanu bitancëxun bëbu rabé oquin bëchiacëxa.

<sup>30</sup>Usaquin catancëxun ca ësaquinribi Estebanën 'apucama cacëxa:

—Cuarenta baritia Madián menu 'itancëx ca Sinaí cacë aín bashi 'urama, anu uni 'icëma me, anu Moisés 'iacëxa. Anu 'ixun ca imaxu anuax tsi rëquirucë mëúcia ángel achúshi isacëxa. <sup>31</sup>Usai 'ia isi ratutia —uisa cara —quixun ñachaquin isnux a 'urama cuaniabi ca Nucën 'Ibu Diosan ësaquin Moisés cacëxa: <sup>32</sup>“Èx cana min raracama aín Dios 'ain. Abraham, Isaac, Jacob acaman Dios cana 'èx 'ain”. Èsai quia cuati racuëti bërëruquin ca Moisésnën istisama tancëxa. <sup>33</sup>Usaía 'ia ca Nucën 'Ibu Diosan Moisés cacëxa: “Èx ënu 'ain ca anumi nicë me ënëx upíra upí 'icën. Usa 'ain ca min taxaca ëchit. <sup>34</sup>Egipto menuaxa 'ën unicama tëmëraia isanan cana atúxa unin bëtsi bëtsi ocëx nuibacati banaiaribi cuan. Cuaxun acama tëmëraiabi iémi cana uan. Iéminuxun cana mi pain Egiptonu xutin”.

<sup>35</sup>A aín aintsin titicaquin —¿uin cara nun 'apu 'ixunmi nun 'acë ñucama mëñonuxun isnun mi cax? —quixun cacë, a Moisésbi ca Nucën Papa Diosan atun cushi 'ixun aín aintsicama tëmëraiabi iéminun xuacëxa. Usoquin ca imaxunuax abë banaquin Moisés canun aín ángel camiacëxa. <sup>36</sup>Xucëxun ca Egiptonu cuanxun Moisésnën Israel unicama anua buáncëxa. Buánquin ca Egiptonuxun 'anan, parúnpapa Xonsa anuxun 'anun, cuarenta baritian anu uni 'icëma menuxunribi Nucën Papa Diosan 'amicëxun uni itsin 'acëma ñu 'acëxa.

<sup>37</sup>Usaquin caxun ca ësaquinribi Estebanën catëcëancëxa:

—Moisés ax ca an Israel unicama ësaquin cá a 'icën: “An 'ë 'imicësaribi oquin ca mitsun rëbúnqui achúshi, an ax quicë bana unicama ñuixunti uni Nucën Papa Diosan 'imiti 'icën. 'Imicëxuan an atu cacësabi oi ca 'icanti 'icën”. <sup>38</sup>Moisés ax ca axa anu uni 'icëma menuax Israel unicama nëbétsi 'ianan, aín bashi Sinaí cacë a tanáinuax abë banacë ángelbë 'ianan nucën raracamabëribi 'iá 'iacëxa. 'Ianan ca a aín unicamax usai 'iti bana Nucën Papa Diosan 'ináncë, a 'iacëxa. A bana, Israel unicama nun 'unánuan cuënëonun ca Nucën Papa Diosan Moisés usaquin cacëxa.

<sup>39</sup>Usa 'áinbi ca Moisés quicësabi oquin 'aisama tanquin nucën raracaman Egiptonu cuantëcënti sináncëxa.

<sup>40</sup>Sinánquin ca Moisésnën cucën, Aarón, a cacancëxa: “An nu Egipto menua bëcë Moisés cara uisaxa cananuna 'unaniman. Usa 'ain camina dios raíri min nu unioxunti 'ain, an nu rëcuënxunbianun”.

<sup>41</sup>Usaquin caxun ca vaca tuá tanquin ñu unioancëxa. Uotancëxun ñuina caniocë réax ca atun mëcënanbi unioçë ñu a rabi cuëncancëxa. <sup>42</sup>Usoia ca Nucën Papa Diosan atúnbia naínu 'icë ñu, 'ispa, 'uxë, bari acama rabinun quixun ëancëxa, an Nucën Papa Dios quicë bana uni ñuixuncë unicaman ësaquin cuënëosabi oquian 'anun:

Israel unicama, anu uni 'icëma me anu cuarenta baritia 'iquin 'aracacë ñuina 'aquinbi camina 'ë rabicanma 'ain. <sup>43</sup>Usai 'iquin camina anuxun Moloc cacë dios rabiti xuburatsu niqüanan mitsúnbi unioçë 'ispa tanquin unioçë ñu ax isa Renfán cacë dios ainan 'icë quixun rabinuxun buáncën. Usa 'ain cana mitsu 'ë

rabiquinmami usa ñuishi rabiçë cupí mitsun nëtënuu, Babilonia cacë ëma 'ucë, anumi tsónun xuti 'ain.

Usaquin cuënëosabi oi ca 'iacëxa.

<sup>44</sup>Usaquin catancëxun ca ësaquinribi Estebanën cacëxa:

—Nucën Papa Diosan ca abë banaquin Moisés anu uni 'icëma menuxun cacëxa: Anuxun 'ë rabiti xubu 'aquin camina cëxtú chupa 'ën mi ismicëxunmi iscë usabi oquin 'ati 'ain. Usoquian cacësabi oquin 'atancëxun ca Nucën Papa Diosan aín bana anu cuëneo maxax pará, a anu nanxun nucën raracaman bërúancëxa. <sup>45</sup>A xubu ca nucën raracaman anu uni 'icëma menuax cuanquin capúnquin mëñoquin bibianquin, anu atux tsóti menu cuanquin abi buáncëxa. Nucën Papa Diosan 'amicëxun ca a menu bucuçë unicama nucën raracaman Josuébëtan abámiaçëxa. Abámitancëxëxa: Anuxun 'ë rabiti xubu 'aquin camina cëxtú chupa 'ën mi ismicëxunmi iscë usabi oquin 'ati 'ain. Usoquian cacësabi a aín menu tsómainun ca a chupa xuburibi anu 'iacëxa. 'Ain ca a xubunuxun bari itsi bari itsi buínquin nucën raracaman Nucën Papa Dios rabiachëxa, David axa 'apu 'itámainun. <sup>46</sup>David an ca nucën rara Jacobnëan aín rëbúnquicamabëtan rabia Nucën Papa Dios, ami sinánquin ax anu 'inun xubu chaira upí oquin 'axunti sináncëxa. <sup>47</sup>Usoquin sinánxunbia 'ama 'ain ca aín bëhicë Salomón an cuni a xubu 'acëxa. <sup>48</sup>'Axuan 'áinbi ca Nucën Papa Dios, ax 'Apüira 'aish, unin 'acë xubunu tsotíma. Èsai ca an Nucën Papa Dios quicë bana unicama ñuixuncë unían cuënëo bana quia:

<sup>49</sup>Èsai ca Nucën 'Ibu Dios quia: 'Èx naínu 'icë 'Apüira 'aish cushiira 'ain ca menu 'icë ñucamaribi 'ënan 'icën. ¿Usa 'ëx 'ain

caramina 'ëx anu tsónun uisa xubu 'ë 'axúnti 'ain? ¿'Ëx anu tantiti cara uinuirá 'ic? <sup>50</sup>¿'Ën cushínbi carana ëné ñucama 'ama 'ain?

<sup>51</sup>Usaquín caxun ca ësaquinribishi Estebanën cacëxa:

—Mitsux camina bana sinanima, nuituñuma 'aish pabíñumasa 'iá 'aish usabi 'ain, Nucën Papa Dios 'unáncëma unisaribi 'aish. Camabi nētéan Nucën Papa Diosan Bëru Ñumshin Upitan mitsu sinánmicë 'itsíanxbi camina an sinánmicë 'iisama tanin. Mitsun rara 'iásaribiti camina mitsux 'in. <sup>52</sup>An Nucën Papa Dios quicë bana uni ñuixuncë unicama ca mitsun raracaman bëtsi bëtsi ocëxa. Bëtsi bëtsi onan ca axa, Nucën Papa Diosan Bëchicë Upíira ca uti 'icë quicë unicama aribi 'acëxa. A unicama quiásabi oía uá 'icëbi camina mitsun a bamamicasquin unían i curúsocënu matásnun 'inan. <sup>53</sup>Mitsux camina nun cuati bana ángelnëan Moisés cá, a 'unanibi a bana quicësbabi oi 'icëma 'ain.

#### Esteban bama

<sup>54</sup>Usaquían cacëxun cuati ca 'apucama xuatemati Estebanmi nishacëxa.

<sup>55</sup>Nishmainun ca naíu bësuquin aín Bëru Ñumshin Upitan cushiocë 'ixun Estebanën Nucën Papa Diosan cushi isanan asaribi 'aísha Jesús aín Papa mëqueu nicë isacëxa. <sup>56</sup>Isquin ca cacëxa:

—Ca is. Naí panárabecëbëtan cana axa uni 'inux anuax uá Jesús, a Nucën Papa Dios mëquea nicë isin.

<sup>57</sup>Ësai quiabi cuaisama tani pamumëti, munuma cuëncëni, ami qui abáquianxun ca bicancëxa. <sup>58</sup>Bibianquin ca Jerusalénua buánxun maxaxan 'acëxa. Aín cutun pain pëxun bënë úni, Saulo cacë, an bërúanun quixun nantan-

cëxun ca Esteban maxaxan 'acëxa.

<sup>59</sup>Maxaxan 'acëxun ca Estebanën Nucën 'Ibu Jesús cacëxa:

—'Ën 'Ibu Jesús, mibë 'inun ca 'ë bit.

<sup>60</sup>Catancëx rantin purúnxun ca munuma banaquin Nucën 'Ibu Jesús catëcëancëxa:

—Atúxa ësari 'uchaiabi camina 'ënun rabanan uisabi otima 'ain.

Ësai quíshi ca bamacëxa.

#### Jesucristomi catamëcë unicama Saulonën bëtsi bëtsio

**8** <sup>1,2</sup>Usa 'ain ca Saulonën Esteban bamacëbëtan —usoquin 'ati ca asábi 'icë —quixun sináncëxa.

Usoquian Esteban 'acáncë ca an Nucën Papa Diosan bana cuacë uni raírinën masá nuituti inquin Esteban bibianquin buánxun maíancëxa. Esteban usoquin rëtanccëx atumi nishi tsuáquiruquin ca Jerusalénuaxa ax Jesucristomi catamëcë unicama bëtsi bëtsi ocancëxa. Usaira ocancëx ca tsuáqui Judea me 'imainun Samaria mecamanuribi cuanan bëtsi bëtsi ëmanu tsoti cuancëxa. Usai 'icëbëbi ca Jesusan aín bana ñuixunun caíscë unicamaishi Jerusalénu bërúacëxa. <sup>3</sup>Usa 'ain ca Saulonën Jesucristomi catamëcë unicama cëñutisa tanquin xubucama oi atsínquin bëbu 'imainun xanuribi nirínbianquin sipuanuxun buáncëxa.

#### II. ËMA RAIRINU 'ICË UNICAMAN NUCËN PAPA DIOSAN BANA CUA (8.4-12.25)

#### Samaria menuxun Jesucristomi catamëti bana unin ñuia

<sup>4</sup>Usa 'ain ca Jerusalénuaxa tsuáquicë unicama an me itsi, me itsinu cuanquin Cristo ñuiquin unicama Nucën Papa Diosan bana ñuixuancëxa. <sup>5</sup>Usoçëbëtan



ca Felipenëribi Samaria menu 'icë ëma achúshi anu cuanxun Cristo ñuiquin unicama bana ñuixuancëxa.

<sup>6</sup>Ñuixuncëbë timëquin ca camabi unin —asérabi ca usa 'icë —quixun sinánquin aín bana cuacëxa. Cuanan ca Felipenëan uni itsin 'acëma ñu 'aiaribi isacëxa.

<sup>7</sup>Ñunshin 'atima cuëncëni anuax chiquicë uni isanan ca uni raíri aín xon nicëma 'imainun raíri aín niti bëtsicë acamaribi pëxcutia isancëxa. <sup>8</sup>Usaía 'icëbë ca a ëmanu 'icë unicama chuáma tani cuëëinra cuëëancëxa.

<sup>9</sup>A ëmanu ca ñubé 'ia uni achúshi, Simón cacë, ax 'iacëxa. Usa 'ixun ca a unin —'ëx cana bëtsi unicamasamaira 'ai —quixun Samaritanu 'icë unicama paráncëxa. <sup>10</sup>Usoquian paráncëx ca camabi uni tuáratsubëbi —ënë unix ca Nucën Papa Diosan cushiñu 'icë —quiax ami sináncëxa.

<sup>11</sup>Usoquian 'itsa baritian an paráncë 'ixun ca camabi unin aín bana cuacëxa.

<sup>12</sup>Usa 'aínbi ca Felipenë —Jesucristomi catamëti ca uni Nucën Papa Diosnan 'iti 'icë —quixun ñuixuncëxun cuati —a banax ca asérabi 'icë —quixun sinani 'itsa uni 'imainun 'itsa xanuribi nashimicë 'iacëxa. <sup>13</sup>Usaía 'icëbë ca Simónribi a bana cuaxun, asérabi ca ax 'icë quixun sinani nashimicë 'aish Felipebë niacëxa. Abë nitsi ca Felipenëan uni itsin 'acëma ñu 'aia isi ratuti sináncasmacëxa.

<sup>14</sup>Usa 'ain ca Samaritanu 'icë unínribi ca Nucën Papa Diosan bana cuaxa quixuan ñuicania Jesusan aín bana uni ñuixunun caíscë unicaman Jerusalénu-xun cuacëxa. Cuaxun ca Pedrocëñun Juan anua cuantánun xuacëxa.

<sup>15,16</sup>Xucancëx cuanxuan a rabëtan iscëxbi ca anu 'icë unicama Nucën 'Ibu Jesúsmi catamëti 'unpaxan nashimicë 'aíshbi Nucën Papa Diosan Bëru Ñumshin Upíñuma pain 'iacëxa. Usa 'icë ca atúxribia aín Bëru Ñumshin Upíñu

'inun quixun Nucën Papa Dios ñucáxuancëxa. <sup>17</sup>Ñucáxunquian Pedrobëtan Juanën aín mëcënan ramëcëx ca atux Nucën Papa Diosan Bëru Ñunshin Upíñu 'icancëxa.

<sup>18</sup>Usa 'ain ca Jesusan aín bana uni ñuixunun caíscë unicaman aín mëcënan ramëcëxëshi ca uni Nucën Papa Diosan Bëru Ñumshin Upíñu 'icë quixun isquin curíqui 'inántisa tanquin Simonan Pedrocëñun Juan cacëxa: <sup>19</sup>—'Ën mëcënan ramëcëx uni aín Bëru Ñumshin Upíñu 'inun camina Nucën Papa Diosan cushi 'ëribi 'inánti 'ai —quixun.

<sup>20</sup>Cacëxunbi ca Pedronën cacëxa:

—Nucën Papa Diosan cushi ax ca cupíoquin bitima 'icën. Min usoquin sináncë cupí camina min curíquibëbi cëñúti 'ain. <sup>21</sup>Nucën Papa Diosan iscëx ca min nuitu upíma 'icën. Usa 'ain camina min añu ñubi nubëtan ësoquin 'atima 'ain. <sup>22,23</sup>'Ën iscëx camina mix 'atimaira nuituñu 'ain. Usaquin sinani camina 'ën iscëx nuituñuma 'aish sinanatimoi 'icësa 'ain. Usa 'aíshbi camina sinanaquin usaquin sinánti ënquin min nuitu mëúmi 'atimaquin sináncë a cara mi térénxunti 'icë mi tanun Nucën Papa Dios ñucáti 'ain.

<sup>24</sup>Cacëxun ca Simonan Pedro cacëxa:

—Min 'ë cacë bana usai 'ëx 'iaxma 'inun camina mitsun Nucën 'Ibu Dios 'ë ñucáxunti 'ain.

<sup>25</sup>Usa 'ain ca Pedrobëtan Juanën usai ca Jesús 'iaxa quixun caquin an cacë banacama 'itsa uni ñuixuancëxa. Uсотancë xun, Samaria menu 'icë ëmacamanuxun —Jesucristomi catamëti ca uni Nucën 'Ibu Diosnan 'iti 'icë —quixun ñuixuntancëx ca Jerusalénu cuantëcëancëxa.

#### **Etiopía nëtënu 'icë uni Felipenëan bana ñuixuan**

<sup>26</sup>Usaía 'ian ca Nucën 'Ibu Diosan xucëxun ángelnën Felipe cacëxa:

—Jerusalénuax anun Gaza cacë ëmanu cuanti bai anu camina cuanti 'ain.

Usoquian ángelnën anu cuantánun quixun cacë bai ax ca anun anu uni 'icëma menu cuanti bai 'iacëxa. <sup>27</sup>Ángelnën cacësabi oi ca Felipe cuancëxa. Cuaníbi ca bainuax Etiopía menu 'icë uni achúshibë mëranancëxa. A unix ca Etiopía menu 'icë 'apu, Candaces cacë xanu, a ñu 'axuanan aín ñucamaribi bërúanxuncë 'iacëxa. Usa 'aish ca Nucën Papa Dios rabi Jerusalénu cuancë a uni 'iacëxa. <sup>28</sup>Usa 'ixun ca Jerusalénuax aín carro, caballonën buáncë, anun aín nëtënu cuantëcëni tsóxun an Nucën Papa Dios quicë bana uni ñuixuncë uni Isaiasnën cuëñëo bana isacëxa. <sup>29</sup>Isia mëraia ca Felipe Nucën Papa Diosan Bëru Ñumshin Upitan cacëxa:

—A carronu ca cuantan.

<sup>30</sup>Quia cuatíshi ca amiqui abáquiani cuancëxa. Cuanquin iscëxuan Isaiasnën cuëñëo bana 'aia cuaquin ca cacëxa:

—¿A mi iscë bana a caramina uisai cara quia quixun cuatin?

<sup>31</sup>Cacëxun ca cacëxa:

—Cana cuatiman. ¿Uni itsin 'ë 'aquincëxunma carana uisaxun 'unánti 'ain?

Ësoquin caquin ca Felipe abë tsotia 'irunun quixun cacëxa.

<sup>32</sup>Usaquian cacëx 'iruax abë tsóxun Felipenën iscëx ca a unían 'acë banax ësai quicë 'iacëxa:

Unían 'anuxun buáncëxbi ca carnero banaima. Carnero 'icësaribiti ca unin 'anuxun buáncëx ax banacëma 'icën. Aín rani unin tëacëxbi ca carnero banaima. Carnero 'icësaribiti ca ax banacëma 'icën. <sup>33</sup>Ax upí sinánñu 'icëbia tëmëramicancë bëbi ca uinu 'icë uníxbi anun rabanan nëëti banacëma 'icën.

Axa ënë menu utancëx bama 'ain ca a unin ñuiti aín rëbúnqui 'aíma 'icën.

<sup>34</sup>Ësai quicë quiricanua istancëxun ca Etiopíanu 'icë unin Felipe cacëxa:

—Cana mi ñucatin, ¿ui ñui cara Isaiás ësai quiacëx? ¿Axbi ñuiacati cara quiacëx? ¿Uni itsi ñui cara quiacëx?

<sup>35</sup>Cacëxun ca Felipenën quiricanua iscë bana a ñuixunquin, —Jesús ñui ca quia —quixun canan —carnero 'icësaribiti ca Jesús unin 'atimocëxbi banama 'icë —quixun canan —Jesúsmi catamëti ca uni Nucën Papa Diosnan 'iti 'icë —quixun upí oquin ñuixuancëxa.

<sup>36</sup>Ñuixunbiancëxun ca baca cuëbí 'urama cuanquin, a unin Felipe cacëxa:

—Ënu ca baca 'icën. ¿Anuxun caramina 'ë nashimitima 'ain?

<sup>37</sup>Cacëxun ca Felipenën cacëxa:

—Asérabi Jesucristo min nuitunënbi sinanimi ami catamëtia cana mi 'ati 'ain.

Quixun cacëxun ca a unin Felipe cacëxa:

—Jesucristo ax ca asérabi Nucën Papa Diosan Bëchicë 'icë quixun cana 'unanin.

<sup>38</sup>Usaquin caxun, aín carro nitsinamitancëx ca a rabëtaxbi 'ibúquiani bacanu cuancëxa. Cuanx bacanu nixun ca Felipenën Etiopíanu 'icë uni nashimiacëxa. <sup>39</sup>A nashimitancëx caman 'iruiaishia Nucën Papa Diosan Bëru Ñumshin Upitan buáncëx nëtëtia ca a unin Felipe istëcëanma 'icën. Istëcëni mabi cuëñquiani ca aín menu cuancëxa. <sup>40</sup>Usobiania cuancë ca unin Azote cacë ëmanua Felipe mërácëxa. Anuax cuanxun, ëma itsi ëma itsinu cuanquin —Jesucristomi catamëti ca uni Nucën Papa Diosnan 'iti 'icë —quixun unicama ñuixunbianx ca Cesárea ëmanu bëbacëxa.

### Sinanatia Saulo Jesúsmi catamëa

(Hch. 22.6-16; 26.12-18)

**9**<sup>1</sup>Usa 'ain ca Saulo, axa Nucën 'Ibu Jesúsmi catamëcë unicama cëñuca-tsi quiax, atumi xuumati nishacëxa. Nishquin ca sacerdotenën cushicaman 'apu anu cuanxun cacëxa: <sup>2</sup>—Damasco ëmanuaxa ax Jesúsmi catamëcë unicama 'imainun xanucamaribi bixun nëaxun, Jerusalénu bënun camina quirica 'axun 'ë 'inánti 'ain. 'Ináncëxun cana Damasconu cuanxun anua judíos unicama timéti xubucamanu cuanquin atu bariti 'ain.

<sup>3</sup>Usaquin cacëxuan quirica 'ináncëxun bibiani bain cuanxa, Damasco ëmanu bëbai cuaniabi ca nafxun nëbétsioraquin pëcaquin bëténancëxa.

<sup>4</sup>Usoqian pëcacëx menu nipacëquin ca ësaía quia cuacëxa:

—Saulo, Saulo, ¿uisati caramina 'ë bëtsi bëtsi oin?

<sup>5</sup>Ësai quia ca cacëxa:

—¿Ui caramina 'ain, Nucën 'Ibu Dios sapi camina 'ain.

Cacëxun ca cacëxa:

—Ëx cana Jesús, ami bëtsi bëtsi ocë, a 'ain. Ami tatíqui chacati nishquin i tapun, taën 'aquinmi paë tancësa, usaribiti camina mibi 'in.

<sup>6</sup>Usoqian cacëxun cuati ratúirai racuëti bërëruquin ca Saulonën cacëxa:

—¿Añu ñu 'ën 'ati caina cuëënin?

Cacëxun ca Jesusan cacëxa:

—Niruquiani ca Damasco ëmanu cuantan. Anuxun ca unin añu caramina 'ati 'ain quixun mi cati 'icën.

<sup>7</sup>Usai quia cuaquinbi a ñubi isíma ca Saulobë cuancë unicamax ratúiracëxa.

<sup>8</sup>Ratúmainun menuax nirui bëpéqui-quinbi ca Saulonën iscasmacëxa.

Iscasmatia ca abëa cuancë unicaman mëñbianquin Damasconu buáncëxa.

<sup>9</sup>Buáncëxunbi ca rabé 'imainun achúshi

nëtë bëxuñu 'ixun pima 'ianan xëama 'icën.

<sup>10</sup>Usaía 'imainun ca Jesucristomi catamëcë uni achúshi, Ananías cacë, ax Damasconu 'iacëxa. Anu 'ixun ca namáquin cuacësa oquin ësaquian Nucën 'Ibu Jesusan cacëxun cuacëxa:

—Ananías.

Cacëxuinshi ca Ananíasnën cacëxa:

—Ënu cana 'ain.

<sup>11</sup>Cacëxun ca Nucën 'Ibu Jesusan cacëxa:

—Niruquiani camina bai, Tëntúñuma caquin anëcë, anu cuanti 'ain. Cuanxun camina Judasnën xubunu cuanquin anu 'icë uni ñucáti 'ain, Tarsonu 'icë uni Saulo cacë ax cara ënu 'icë quixun.

Anuax ca Saulo Nucën Papa Diosbë banaia. <sup>12</sup>Banaquin ca namáquin iscësoquin, uni achúshi, Ananías cacë, aín xubunu atsínquin a bëpéxcunun quixun aín mëcënan ramëcëxun isaxa.

<sup>13</sup>Usaquin cacëxun cuaquin ca Ananíasnën cacëxa:

—Itsaira unin ca 'ë caxa, a unin ca 'aisama ñu 'aquin, axa Jerusalénuax mimi catamëcë unicama bëtsi bëtsi oia quixun. <sup>14</sup>Usa 'ixun ca axa minan 'aish mibë banacë unicama sipuanuxun buánun isa quirica 'axunun quixun sacerdotenën cushicama caxa.

<sup>15</sup>Cacëxunbi ca Nucën 'Ibu Jesusan Ananías cacëxa:

—Racuëaxma ca cuantan. 'Ën caiscë 'ixun ca a unin judíos unicamaishima, bëtsi mecamanu 'icë unicamaribi aín 'apucamacëñunbi ñuixunquin 'ë ñuiquin bana ñuixunbi 'icën. <sup>16</sup>Usoquin 'ë ñuiquin bana ñuixunquin ca 'unánti 'icën, uisairai cara 'ënan cupí tëmëraia quixun.

<sup>17</sup>Usaquin Jesusan cacëx ca Ananías anua Saulo 'icë xubunu cuancëxa. Cuanx atsínxun ca aín mëcënan ramëquin Saulo cacëxa:

—'Ēn xucĕn Saulo, axa anúnmi ucĕ bainuax mibĕ banaĕxancĕ, Nucĕn 'Ibu Jesús, an ca minu unun 'ĕ xuaxa, amiribishi istĕcĕananmi aín Bĕru Ŋumshin Upíñu 'inun.

<sup>18</sup>Ēsaquian Ananíasnĕn cacĕbĕshia aín bĕrunuax ñu xacá tñbu rĕucucĕbĕtainshi ca Saulonĕn isacĕxa. Usai 'i nirutanĕx ca Saulo nashimicĕ 'iacĕxa. <sup>19</sup>Nashimicĕ 'ixun pitancĕx amiribishi cushitĕcĕni ca axa Jesucristomi catamĕcĕ unicamabĕ Damasconu pain 'iacĕxa.

#### Saulonĕan Damasconuxun bana ñuia

<sup>20</sup>Anu 'ixun ca anua judíos unicama timĕti xubucamanuxun, Jesús ax ca asĕrabi Nucĕn Papa Diosan Bĕchicĕ 'icĕ quixun unicama ñuixuancĕxa.

<sup>21</sup>Usoquian Saulonĕn bana ñuixunia cuati ca unicama ratuti a ñui quiacĕxa: —Ēnĕ unix ca an Jerusalĕnuxun ami catamĕquin a iĕminun Jesús ñucácĕ unicama tĕmĕramicĕ, a 'icĕn. Ax ca sacerdotenĕn cushicamanu buánuxun ĕnu 'icĕ unicamaribi bitsi uaxa. ¿Usa cat?

<sup>22</sup>Quicancĕbĕtanbi ca Saulonĕn aín bana cushiira 'ixun Damasconu 'icĕ unicama sináncasmamiquin —Jesús ax ca asĕrabi Cristo, axa ĕnĕ menu uti judíos unicaman caíncĕ a 'icĕ —quixun bana ñuixuancĕxa.

#### Judíos unicama ami 'ĕsĕnancĕx Saulo cuan

<sup>23</sup>Usoquin atu bana ñuixunía 'itsa nĕtĕ anu 'icĕbĕ ca judíos unicama Saulo 'acatsi quiax 'ĕsĕnancĕxa. <sup>24</sup>A 'acatsi quiáxa 'ĕsĕnancia ñuia ca Saulonĕn cuacĕxa. Usa 'ain ca chiquitia 'anuxun nĕtĕnbi 'anan imĕbi Damasconĕn cĕnĕ xĕcuĕcamanuxun bĕaraquin caíancĕxa. <sup>25</sup>Caíncania 'unánquin ca axa Jesucristomi catamĕcĕ unicaman Saulo, caquí

chanu 'aruxun, cĕnĕ manámia 'icĕ xĕcuĕn, imĕ nanpácancĕxa. Nanpácĕx ca 'ibúquiiani Saulo Jerusalĕnu cuancĕxa.

#### Saulo Jerusalĕnu 'iá

<sup>26</sup>Cuanx bĕbaxa atubĕ 'iisa tancĕxbi ca axa Jesucristomi catamĕcĕ unicamax Saulo isa Jesucristomi catamĕcĕma 'icĕ quixun sinani ami racuĕacĕxa. <sup>27</sup>Usa 'aínbi ca Bernabĕnĕn Saulo Jesusan aín bana ñuixunun caiscĕ unicamanu buáncĕxa. Buánxun ca Saulo ismiquin ñuixunquin atu cacĕxa:

—Saulonĕn ca bainua Nucĕn 'Ibu Jesús isaxa. Iscĕx ca abĕ banaxa. Usaía banan ca ami catamĕti aín uni 'ixun Damasconu 'icĕ unicama, Jesús ca asĕrabi Cristo 'icĕ quixun ñuixuanxa.

<sup>28</sup>Usoquian Bernabĕnĕn cacĕxun ca atubĕa 'inun Saulo biacĕxa. Bicĕxun ca Jerusalĕnuxun Saulonĕn atubĕ niqin Nucĕn 'Ibu Jesús ñuiquin unicama bana ñuixuancĕxa. <sup>29</sup>Ñuixunquin ca axa griego banan banacĕ judíos unicamabĕribi bananan cuĕbicananquin racuĕquinma —Jesús ax ca asĕrabi Cristo 'icĕ —quixun cacĕxa. Usoquian cacĕxun ca a 'acatsi quixun sináncancĕxa. <sup>30</sup>Usai quicania 'unánxun ca axa Jesucristomi catamĕcĕ unicaman Saulo Cesárea ĕmanu buánxun, Tarso ĕmanua cuantánun xuacĕxa.

<sup>31</sup>Usa 'ain ca Judea menu 'imainun Galilea menu 'imainun Samaria menuribi, axa Jesucristomi catamĕcĕ unicama uínbi ubiócĕma 'aish chuámarua buciacĕxa, usai 'i ca Jesucristomi catamĕti 'itsarui cushiacĕxa. Usaía 'icĕbĕ ca raíri uniribi abĕ timĕti Nucĕn 'Ibu Diosan bana upí oquin cuati, aín Bĕru Ŋumshin Upitan 'aquincĕx 'itsarui Jesúsmi sináncĕxa.

#### Eneas pĕxcúa

<sup>32</sup>Usaía 'imainun ca Pedro bĕtsi bĕtsi ĕmanu cuani Lida ĕmanuribi axa

Jesucristomi catamëcë unicama isi cuancëxa. <sup>33</sup>A ëmanuxun ca uni achúshi, Eneas cacë, ñuá 'aish nirucaínquinbi tancëma 'aísha ocho baritia aín anu 'uxtinubi racácë, a mërácëxa. <sup>34</sup>Mëraquin ca Pedronën cacëxa:

—Eneas, Jesucristonën ca mi pëxcuia. Ca nirut, niruxun ca min anu 'uxti mëníot.

Cacëxëshi ca niruacëxa. <sup>35</sup>Usai 'íaxa Eneas nitsia isi ca Lida ëma 'imainun Sarona menu 'icë unicama, usama 'aíshbi sinanati Nucën 'Ibu Jesucristomi catamëacëxa.

#### Dorcas cacë xanu baísquia

<sup>36</sup>Jesucristomi sináncamainun ca Jope cacë ëmanu 'icë xanu achúshi Tabita, aín anë itsi Dorcas, anribia Nucën Papa Diosan bana cuacë, ax 'iacëxa. A xanun ca ñu upíshi 'aquin usabi ocë 'ixun ñuñuma unicama ñu 'ináncëxa. <sup>37</sup>Usa 'ain ca Tabita ax 'ínsíanx bamacëxa. Bamacë nashimitancëxun ca xubu cata itsi manámi buánxun anu racáncancëxa. <sup>38</sup>Jopenuaxa Tabita bamacëbëtan ca anu 'icë axa Jesucristomi catamëcë unicaman, Pedro ca Lidanu 'icë quixuan ñuicania cuacëxa. Usa 'ain ca Lida ëma axa Jope 'urama 'ain bënëtishia unúan Pedro catánun rabé uni xuacëxa.

<sup>39</sup>Xucëx cuanxuan cacëxëshi ca Pedro uni rabé abëbi Jopenu cuancëxa. Cuanx bëbaxa anu Dorcas racáncënu buáncancëx atsinia ca xanu casunamëcëcaman nëbëtsioracëxa. Nëbëtsiorati inqin ca ñutisama pan 'ixúan Dorcasnën 'acë cutúncëñun chupacama Pedro ismiacëxa. <sup>40</sup>Ismicëxun anu 'icë xanucama ëman chiquínun catancëx ca Pedro rantin purúanx tsóbuax Nucën Papa Diosbë banacëxa. Banatancëxun, anua racácë au bësuquin isquin ca cacëxa:

—Tabita, ca nirut.

Cacëxëshi bëpëquiquin Pedro isi nirui ca tsóracëacëxa. <sup>41</sup>Usariashi ca Pedronën mëñquin biruacëxa. Birutancëxun ca axa Jesucristomi catamëcë unicamacëñunbi casunamëcë xanucamaribi cuënxun axa baísquicë xanu atu ismiacëxa. <sup>42</sup>Usoquin 'acëa cuacoia ca camabi unin Jope ëmanuxun cuacëxa. Cuati ca 'itsa uni Nucën 'Ibu Jesúsni sinani ami catamëacëxa. <sup>43</sup>Usoatancëx ca Pedro 'itsa nëtën Jopenu, an ñuina xacá mëníoti 'unáncë uni, Simón cacë, aín xubunu 'iacëxa.

#### Cornelio isia Pedro cuan

**10** <sup>1</sup>Cesárea ëmanu ca uni achúshi, Cornelio cacë, 'iacëxa. A unix ca cien suntárucama, Itálica cacë, aín cushi 'iacëxa. <sup>2</sup>A unix ca aín xubunua 'icë aín aínsi 'ibucamabëtan Nucën Papa Dios aín bana cuaquin rabicë 'iacëxa. Usai 'ianan ca ñuñuma judíos unicama 'itsa oquin curíqui 'ináncëxa. 'Inánan ca camabi nëtën Nucën Papa Diosbë banacëxa. <sup>3</sup>Usa 'ixun ca bëtsi nëtën bari cuabutia, a las tres 'ain, namáquin iscësoquin ángel achúshi Nucën Papa Diosan xucëx anu aia upí oquin isacëxa. Iscëx anua 'icënu atsinquin ca —Cornelio —caquin cuëancëxa. <sup>4</sup>Cuëncëxun ami bësuquin isíbi racuëtan bamaquin ca cacëxa:

—¿Añu cat?

Cacëxun ca ángelnën cacëxa:

—Abë banaaninmi ñuñuma uni ñu 'ináncëcama ca Nucën Papa Diosan asábi isaxa. <sup>5</sup>Usa 'ain camina min unicama Jope ëmanu xuti 'ain, anu 'icë uni achúshi Simón 'icëbia Pedro caquinribi anëcë, a ënu bënun. <sup>6</sup>Simón Pedro ax ca an ñuina xacá mëníoti 'unáncë uni, Simón caquin anëcëribi bëtsi uni, axa parúmpapa cuëbí tsócé, aín xubunu 'icën.

<sup>7</sup>Ĕsoquin catancĕx ángel cuan ca Cornelionĕn, an ñu mĕĕxuncĕ uni rabĕcĕĕñun ax 'icĕsaribitia ax Nucĕn Papa Diosmi sináncĕ suntáru achúshi aribi cuĕancĕxa. <sup>8</sup>Cuĕñxun ca ángelnĕan a cacĕcama ñuixuntancĕxun Jopenu cuantánun xuacĕxa.

<sup>9</sup>Xucĕx pĕcaraquiani bain cuani Jope 'uramaquianmainun ca bari xamárucĕbĕ Nucĕn Papa Diosbĕ banai Pedro tapitinĕn xubu mascuan cata itsi masapan oquin 'acĕ anu 'iruacĕxa.

<sup>10</sup>Anu 'iruxun ca pitia 'aruxuncamainun panánxun piisa tanquin Pedronĕn namáquin iscĕsoquin isacĕxa. <sup>11</sup>Iscĕxa naí panarabĕcĕbĕ ca anuax chupa chaira, amácasa 'itánun aín rĕbucamanu rabĕ 'imainun rabĕ oquin tĕcĕrĕcacĕ 'aish meu ubúacĕxa. <sup>12</sup>A chupanu ca bĕtsi bĕtsi ñuina taĕn nicĕ, 'imainun axa men nirícĕ ñuina 'imainun pĕchiu ñuina acama 'iacĕxa. A ñuinacamax ca piti 'icĕbia judíos unicaman pitima isa quixun cacĕ 'iacĕxa. <sup>13</sup>A ñucama ubutia isquinshi ca Pedronĕn ĕsai quia cuacĕxa:

—Pedro, niruxun ca rĕxun pit.

<sup>14</sup>Cacĕxun cuaquin ca Pedronĕn cacĕxa:

—Ĕn 'Ibu, cana 'aiman, pitima ñu cana 'ĕn uisa 'ixunbi picĕma 'ain.

<sup>15</sup>Ĕsoquin caquinbi ca ĕsaia quia cuatĕcĕancĕxa:

—Nucĕn Papa Diosan upí 'inun mĕniocĕ ñu camina 'atima ca quixun catima 'ain.

<sup>16</sup>Usaía rabĕ 'imainun achúshiti quia Pedronĕn cuacĕbĕ ca a chupabĕ ñucamaribi naínu cuantĕcĕancĕxa.

<sup>17</sup>Usaía 'icĕbĕ ca Pedro uisa cupí cara isa namáquin iscĕsoquin ñu isaxa quiax sináncasmacĕxa. Usaía Pedro 'imainun ca Cornelionĕn xucĕ unicamax uinu cara Simonan xubu 'icĕ quixun ñucábianx aín xĕcuĕnu bĕbacĕxa.

<sup>18</sup>Bĕbaxun ca munuma banaquin, uni achúshi, Simón 'icĕbia Pedro caquinribi anĕcĕ, ax cara ĕnu 'icĕ quixun ñucácĕxa.

<sup>19</sup>A baricamainuan namáĕsoquin iscĕ ñucama a sinan sinianiabi ca Pedro Nucĕn Papa Diosan Bĕru Ñunshin Upitan cacĕxa:

—Rabĕ 'imainun achúshi unin ca mi baria. <sup>20</sup>Usa 'ain ca 'ibútancĕx mĕniocaquiani atubĕ cuantan. 'Ĕn cana atu xuan. Usa 'ain camina, judíos unima 'ain cana abĕ cuantima 'ai quima atubĕ cuanti 'ain.

<sup>21</sup>Cacĕx 'ibúquin ca Cornelionĕan xucĕ unicama Pedronĕn cacĕxa:

—'Ĕx cana ami baricĕ a 'ain. ¿Añuai caina uan?

<sup>22</sup>Cacĕxun ca a unicaman Pedro cacĕxa:

—Cornelio cacĕ suntárnunĕn cushi, ax upí uni 'ianan an Nucĕn Papa Diosan bana cuacĕ 'icĕa upí uni 'icĕ judíos unicaman 'unáncĕ, a ca Nucĕn Papa Diosan xucĕ ángelnĕn caxa, min bana cuanuxuan aín xubunumi cuanun mí caminun quixun.

<sup>23</sup>Ĕsaquian cacĕxun atsínmicĕx ca a unicamax Pedrobĕ a xubunu 'iacĕxa. 'Inĕti pĕcaracĕbĕ ca Pedro mĕniocaquiani, axa a buani ucĕ unicama a 'imainun Jopenuaxa Jesúsmi sináncĕ uni raíricamabĕribi Cesárea ĕmanu cuancĕxa.

<sup>24</sup>Coonx ca Cesárea ĕmanu bĕbacĕxa. Bĕbamainun ca Cornelionĕn aín aintsi 'ibucamacĕñun an 'unáncĕ unicamaribi aín xubunu cuanun quixun camiacĕxa. Camicĕxa timĕan ca acamabĕtan Pedro caíancĕxa. <sup>25</sup>Caíncĕx bĕbax aín xubunu atsinia ĕman chiquíquin bitsi, a tanáin rantin puruni tsóbuquin ca Cornelionĕn Pedro rabiácĕxa. <sup>26</sup>Rabicĕxunbi ca Pedronĕn Cornelio biruquin, —ca nirut, 'ĕxribi cana misaribi unishi 'ai —quixun cacĕxa.

<sup>27</sup>Ësoquin catancëx Cornelio bē  
banaquianx atsínquinbi ca Pedronēn  
'itsa uni timécē isacēxa. <sup>28</sup>Isquin ca atu  
cacēxa:

—Mitsun camina 'unanin, ax quicēsabi  
oía judíos unicama 'iti bana ca quia,  
judíos uníxa judíosma unibē timéanan  
aín xubunu atsinti ca 'aisama 'icē quiax.  
'Ënribi a bana 'unáncē 'icēbi ca Nucēn  
Papa Diosan uinu 'icē unibi, 'aisama ca  
quixun ñuixunma 'anun 'ē 'unánmiaxa.  
<sup>29</sup>Usa 'ain cana min 'ē camicëx, judío uni  
'aish, cana cuanima quixun sinanima  
bēnētishi uan. Usa cupí cana uisoti  
caramina 'ē camia quixun 'unántisa tanin.

<sup>30</sup>Cacēxun ca Pedro Cornelionēn  
cacēxa:

—Rabé 'imainun rabé nētē ca 'ēx anun  
ēsañuribi baria cuabúcēbē, 'ēx 'icēsabi  
ñubi piaxma 'ēn xubunuax Nucēn Papa  
Diosbē banaëxancē 'icēn. Banaquin iscëx  
ca uni achúshi aín chupa chaba chabaqui-  
cē 'aish 'ēn bémánanu niracëxanxa.

<sup>31</sup>Niracëquin ca 'ē caëxanxa: Cornelio,  
mixmí abē banacécama ca Nucēn Papa  
Diosan cuaxa. Cuanan ca minmi ñuñuma  
uni ñu 'ináncē acamaribi 'unanx  
cuëenquin manuima. <sup>32</sup>Usa 'ain camina  
Simón 'icēbi Pedro caquin anécē a  
bētánun min uni Jopenu xuti 'ain. Ax ca  
ñuina xacá mēnótí 'unáncē uni, Simón  
cacēribi, parún papa cuébía tsócē, aín  
xubunu 'icēn. Ax ca uax mibē banati  
'icēn. <sup>33</sup>Cacēxun cana bēnénquinshia mi  
bēnun quixun uni xuëxan. Xucëxun  
cacëx camina upí oquin sinánbëtsini  
atubē ënu uan. Usa 'ain cananuna Nucēn  
'Ibu Diosan nu ismainun ënu bērí 'ain, an  
mi sinánmicëxunmi nu ñuixuncëxun  
cuanux.

**Cornelionēn xubunuxun  
Pedronēn bana ñuixuan**

<sup>34</sup>Ësoquian cacëxun ca Pedronēn  
Cornelio cacëxa:

—'Ën cana bērí asérabi 'unanin,  
Nucēn Papa Diosan ca judíosma unibu  
judíos unisaribi isquin camabi uni sēnēn  
isia. <sup>35</sup>Usa 'ixun ca an aín bana cuaquin  
ñu upíshi 'acē unicama camabi menu  
ainan 'imia. <sup>36</sup>Nucēn Papa Diosan ca  
Israel unicama aín bana ñuixunquian  
Jesucristo ax ca camabi unin 'ibu 'ixun  
an nu chuámarua 'imiti a 'icē quixun  
ñuixunun aín unicama xuaxa. <sup>37</sup>Mitsun  
camina upí oquin 'unanin, Juanēn pain  
ca Jesucristo ñuiquin Nucēn Papa  
Diosan bana ñuixunquin uni nashimia-  
cëxa. Usoquian Juanēn 'a ñucama a  
'unánan camina Galilea menuax cara  
uisai 'iacëxa quixun 'unanin. <sup>38</sup>Camina  
'unanin, Nucēn Papa Diosan ca Jesús  
Nazaretu 'icē a aín Bēru Ñunshin Upí  
abē 'inun 'inánquin aín cushiribi  
'ináncëxa. 'Ináncëxun ca ñu upíshi 'anan  
ñunshin 'atimañu unicamaribi  
pëxcüacëxa, Nucēn Papa Dios abē 'ain.  
<sup>39</sup>Jesuan Judea menu 'icē ëma  
chucúmaracamanuxun 'anan Jerusalé  
nuxunribi 'acē ñucama a cananuna nun  
isacēn. Usoquian ñu 'acēbi ca i  
curúsocēnu matásquin unin 'acëxa.  
<sup>40</sup>'Acēbi ca Nucēn Papa Diosan rabé  
nētē 'iónxa pëcaracëbëtanshi baísqui-  
miacëxa. Usaía 'ia isnun ca nu  
mēnioxuancëxa. <sup>41</sup>Jesús baísquicēbi ca  
camabi unínra isama 'icēn. Nun cuni  
cananuna Nucēn Papa Diosan, Jesús  
ñuiquin unicama bana ñuixunun  
bērāma caísa 'ixun, baísquicē isanan  
abētan pianan xëacēn. <sup>42</sup>Usa 'icē ca aín  
bana unicama ñuixunun xuquin nu  
ësaquin cacëxa: Nucēn Papa Diosan  
'imicëxun cana 'ēn, uni bamacëmacama  
'imainun bamacē unicamaribi, uisaira  
cara ënē menuax 'i axa quixun  
'unánquin, Nucēn Papa Diosbē cara 'iti  
'icē, cara 'itima 'icē quixun cati 'ain.  
Usaquin camina unicama ñuixunti 'ai  
quixun ca Jesuan nu cacëxa. <sup>43</sup>An

Nucën Papa Dios quicë bana uni ñuixuncë unicamaxribi ca Jesús ñui ësai quiacëxa, camabi uni axa aín bana cuati ami catamëcë, a ca aín 'uchacama Jesusan tērēnxunia quixun.

**Abë 'inúan judfosma unicama Nucën Papa Diosan aín Bëru Ñunshin Upí 'inan**

<sup>44</sup>Usoquian Pedronën atu bana ñuixunmainun ca axa aín bana cuati Nucën Papa Diosmi sináncë unicamanu aín Bëru Ñunshin Upí uacëxa. <sup>45,46</sup>Usa 'ain ca aín Bëru Ñunshin Upitan 'imicëxun unin cuacëma banan banaquin Nucën Papa Dios rabicancëxa. Nucën Papa Dios rabicania cuati ca Pedrobëa ucë Jesúsmi sináncë unicama ax judfosma unicamaxribia Nucën Papa Diosan Bëru Ñunshin Upíñu 'icë isi ratuti sináncasmacëxa. <sup>47</sup>Usaria ca Pedronën cacëxa:

—Nux 'icësaribitia Nucën Papa Diosan Bëru Ñunshin Upíñu 'icë cananuna ënë unicama, 'unpaxan nashimitima ca quixun catima 'ain.

<sup>48</sup>Ësoquin catancëxun ca Pedronën a unicama Jesucristomi catamëcë 'aísha nashimicë 'inun cacëxa. Nashimicë 'ixun ca Pedro a unicaman atubë pan isa 'inun quixun cacëxa.

**Judfosma unicamaxribi Jesucristomi catamëtia Jerusalénuxun 'unáncan**

**11** <sup>1</sup>Usa 'ain ca Jesusan aín bana uni ñuixunun caiscë unicamabë tan Judea menuxun axa Jesucristomi catamëcë unicamanribi, judfos unishima judfosma unicamaxribi ca Nucën Papa Diosan bana cuati Jesúsmi catamëtia quixun ñuicania cuacëxa. <sup>2</sup>A ñucama cuacamainun ca Pedro Jerusalénu cuantëcëancëxa. Cuanxa bëbacë ca axa Jesúsmi catamëcë judfos unicama an, judfosma uni Jesucristomi catamëcë ca nux 'icësaribiti 'unántiocë 'iti 'icë quixun

sinánquin ami nishtisa tanquin Pedro ñu cacëxa. <sup>3</sup>Ñuiquin ca cacëxa:

—¿Uisa 'ixun caramina aín xubunu atsñanan judfosma unicamabëtan pian?

<sup>4</sup>Cacëxunbi ca uisai cara ñu 'iixa upí oquin ñuixunquin atu ësoquin cacëxa: <sup>5</sup>—Jope ëmanuax Nucën Papa Diosbë banaquinbi cana namáquin iscësa oquin naí panárabëcëbëa anuax chupa cha amácasa 'itánun aín rëbucamanu rabé 'imainun rabé oquin tēcërecacë 'aish 'ë 'urama ubutia isan. <sup>6</sup>Usaria ñachaquin iscëxbi ca bëtsi bëtsi ñuina taën nicë 'imainun axa 'acananë ñuina 'imainun men niricë ñuina 'imainun pëchiu ñuina acamaribi anu 'iixa. <sup>7</sup>Anu 'icë isquinbi cana ësáía quia cuan: Pedro, niruxun ca rëxun pit. <sup>8</sup>Cacëxun cana can: 'Ën 'Ibu, cana 'aiman. Pitima ñu cana 'ën uisa 'ixunbi picëma 'ain. <sup>9</sup>Cacëxun ca naínuxun 'ë caxa: Nucën Papa Diosan upí 'imicë ñu camina 'atima ca quixun catima 'ain. <sup>10</sup>Usáía rabé 'imainun achúshiti quia cuacëbë ca a chupabëbi ñucama ax naínu cuantëcëanxa. <sup>11</sup>Cuan-cëbëbi ca 'ëx anu 'icë xubunu rabé 'imainun achúshi uni bëbáxa, Cesárea ëmanuxuan 'ë barinun xucancëx. <sup>12</sup>Acamaxa bëbamainun ca Nucën Papa Diosan Bëru Ñunshin Upitan, judfos unima ca quixun sinanima a unicamabë cuanun quixun 'ë caxa. Usa 'ain cana atubë cuan, 'imainun ca axribi Jesucristomi catamëcë 'aish mēcën achúshi 'imainun achúshi uni ënéxribi 'ëbë cuanxa. Cuanx cananuna an 'ë camicë unin xubunu atsñan. <sup>13</sup>Atsinia ca ësáquin nu caxa: 'Ën xubunu nicë cana ángel isan. Iscëxun ca 'ë caxa: Jope ëmanu camina uni xuti 'ain. Xucëx cuanxun ca uni achúshi Simón 'icëbia Pedro caquinribi anëcë, a ënu bëti 'icën. <sup>14</sup>Bëcëx uxun ca uisai caramina min xubunu 'icë camabëbi Nucën Papa Diosnan 'aish abë 'inux iéti 'ai quixun



mi cati 'icën. <sup>15</sup>Ësaquin ca ángelnën 'ë caxa quixun an 'ë camicë unin 'ë cacëxun cana 'ën Jesucristo ñuiquin anu 'icë unicama bana ñuixuan. Atu bana ñuixuncëbëbi ca Nucën Papa Diosan Bëru Ñumshin Upí nunua ecësaribiti atunu uaxa. <sup>16</sup>Usai 'icëbëtan cana Nucën 'Ibu Jesús axa ësai quiá sinan: Juanën ca uni 'unpaxan nashimiaxa. Usa 'aínbi camina axa mitsubë 'inux ecëbë Nucën Papa Diosan Bëru Ñumshin Upíñu 'iti 'ain. <sup>17</sup>Usa 'aían nu 'acësaribi oquin Jesucristomia catamëtia, atu aín Bëru Ñumshin Upí 'inania cana 'ën 'inánxunma 'anun quixun Nucën Papa Dios catima 'ain.

<sup>18</sup>Ësaquin Pedronën ñuia cuati ca a ñu catëcënima Nucën Papa Dios rabi quiacëxa:

—Bëri cananuna 'unanin, judíos unishima, judíosma unicamaribi ca Nucën Papa Diosan 'atimaquin sináncë 'aíshbi Jesucristomi catamëtia xëñibua 'aínbi ainan 'inun sinanamía —quixun.

#### Antioquía ëmanuax Jesucristomi catamëcë unicama

<sup>19</sup>Esteban pain rëtançëxun ca Jesucristomi catamëcë unicama axa atumi nishcë unicaman bëtsi bëtsi ocëxa. Usocëx ca tsuáqui raírinëxa Fenicia menu cuantamainun raírinëxribia nasí cha, Chipre cacë, anu cuantamainun raírinëxribi Antioquía ëmanu cuancëxa. Cuanxun ca bëtsi unibuma judíos unibuishi, Jesucristomi catamëti ca uni Nucën Papa Diosnan 'iti 'icë quixun bana ñuixuancëxa. <sup>20</sup>Ñuixunmainun ca Chipre 'imainun Cirene menuaxa Jesucristomi catamëcë uni raíri anribishi Antioquía ëmanu cuanx bëbaxun, Nucën 'Ibu Jesúsmi catamëti ca uni Nucën Papa Diosnan 'iti 'icë quixun, judíosma unírubi bana ñuixuancëxa. <sup>21</sup>Nucën 'Ibu Diosan cushiocëxuan

a unicaman aín bana ñuixuncëxun cuati ca 'itsa uni atúan bëráma ñu 'aisama 'acëcama ënquin sinanati, Nucën 'Ibu Jesúsmi catamëcëxa.

<sup>22</sup>Usaía 'icëa ñuia ca axa Jesucristomi catamëcë unicaman Jerusalénuxun cuacëxa. Cuaxun ca Bernabé Antioquíanu cuantánun quixun xuacëxa. <sup>23</sup>Xucëx cuanx bëbaquin, Nucën Papa Diosanbia atu judíos uni 'icëmabi chuámarua 'aísha upí nuituñu 'inun ainan 'imicë isi ca Bernabé cuëëancëxa. Cuëënquin ca 'esëquin cacëxa:

—Mitsúnmi bëráma 'acë ñu 'atëcëníma camina Nucën 'Ibu Jesús ami ëníma catamëti 'ain.

<sup>24</sup>Ax upí nuituñu 'ianan Jesucristomi catamëcë 'aish Nucën Papa Diosan Bëru Ñumshin Upíñu 'ixuan Bernabénën usaquin cacëxun cuati ca 'itsaira uni Nucën 'Ibu Jesúsmi catamëcëxa.

<sup>25</sup>Itsaira axa Jesucristomi catamëcë unicama 'ain ca Tarso ëmanu, Saulo bari Bernabé cuancëxa. Cuanxun mëraxun ca Antioquíanu bëacëxa. <sup>26</sup>Bëax achúshi baritian anu 'iquin ca Saulobëtan Bernabénën axa Jesucristomi catamëcë unicamabë timéquin atu 'unánmiacëxa. Usa 'ain ca Antioquíanuxun pain uni raírinën axa Jesucristomi catamëcë unicama Cristonën uni caquin anëacëxa.

<sup>27</sup>Saulobëa Bernabé Antioquíanu 'ain ca an Nucën Papa Diosan sinánmicëxun unicama ñuixuncë uni raírinëx Jerusalënuax Antioquíanu uacëxa. <sup>28</sup>Acama achúshinëx ca Agabo caquin anëcë 'iacëxa. An ca Nucën Papa Diosan Bëru Ñumshin Upitan 'unánmicë 'aish niruquin anu 'icë unicama cacëxa, camabi menu 'icë unix ca pitiñuma 'iti 'icë quixun. Axa usai quicësabi oi ca Claudio cacë uníxa 'apu 'ain 'iacëxa. <sup>29</sup>Usai 'icëbëa Judeanu 'icë axa Jesucristomi catamëcë unicamax atun piti

ñuñuma 'icë ñuicania cuaxun ca Antioquíanu 'icë unicaman curíqui atu buánmiti sináncëxa, axa 'itsa curíquiñu-caman uiti cara nainsa tania 'ati nanmainun uicamax cara 'itsamashi curíquiñu 'icë acamanribi uiti cara nainsa tania 'ati nantancëxun. <sup>30</sup>Sinán-xun achúshi achúshinën 'itsaira curíquiñu an 'itsa nanmainun 'itsamashi curíquiñu anribi 'itsamashi nantancëxun a curíquicama Saulocëñun Bernabé 'inánquin cacáncëxa:

—Ènë curíquicama camina Judean-xuan an Jesucristomi catamécë unicama bana ñuixuncë unicama a 'inánti 'ai —quixun.

#### Jacobo bama 'imainun Pedro sipuacan

**12** <sup>1</sup>Usomainun ca 'apu 'ixun Heródesnën axa Jesucristomi catamécë uni raíri bëtsi bëtsi omiacëxa. <sup>2</sup>Bëtsi bëtsi omiquin ca Juanën xucën, Jacobo, a manë xëtocën 'amiacëxa. <sup>3</sup>Usoquin 'acëbëa judíos unicama cuëñia isquin ca Heródesnën Pedroribishia binun quixun aín suntárucama cacëxa. Anun chamiti ñucëñunma 'acë pán piti nëtë 'ain ca Heródesnën Pedro bimitancë xun sipuamiacëxa. <sup>4</sup>Sipuamiquin ca ësaquin sináncëxa: Ènë nëtëcama inúcëbëtan sipunua chiquíminuxun cana judíos unicaman ismainun uisa carana Pedro oti 'ai quixun isti 'ain. Usaquin sinánquin ca chiquíti rabanan Heródesnën Pedro sipuanun quixun cacëxa. Cacëxun ca dieciseis suntáru a bërúanun mënfoquin policíanën rabé 'imainun rabé suntárunën paían bërúanun quixun sipuamiacëxa. Usoquin ca suntárucaman an paían bërúancëcamaxa cuancëbë cuancëbë uquin raírinëribi bërúancëxa. <sup>5</sup>Usa 'ixun ca Pedro sipunua bërúancëxa. Usa 'aínbi ca axa Jesucristomi catamécë unicaman nëtëquinma Nucën Papa Dios Pedro ñucáxuancëxa.

#### Nucën Papa Diosan Pedro sipunua chiquían

<sup>6</sup>Iméishi Heródesnën ñucánuan përcaratamainun ca acëñunbi manë risin mëtécërcacë 'ixuan suntáru rabëtan pararuamainun Pedro 'uxacëxa. 'Uxmainun ca an sipu bërúancë suntáru rabëribi xëcuë tanáin chiquitin rabanan bërúain niacëxa. <sup>7</sup>Usa 'aínbi ca Nucën 'Ibu Diosan xucëxa aín ángel ucëbëshi aín cushían sipu pëcacë 'iacëxa. Usaía 'icëbëtan aín pichánpurunu ratícaquin bësúnquin ca ángelnën Pedro cacëxa: —Bënëtishi ca nirut.

Quixuan cacëbëshi ca anun mëtécërcë cacë manë risi tubucuti nipacëacëxa. <sup>8</sup>Usai 'icëbëtan ca ángelnën cacëxa: —Mi cuanun ca anúmni tsitëcërcëquicë mënionan min taxaca tañut.

Usaquin cacëxa mëníocatia ca ángelnën Pedro cacëxa:

—Min tarin rabumëxun ca 'ë nuibëtsin.

<sup>9</sup>Cacëx chiquíquin ca Pedronën asérabi ca an 'ë buania quixun 'unánquinmabi ángel nuibiancëxa. 'Unánquinmabi ca —namati cana ëesai 'i —quixun sináncëxa.

<sup>10</sup>Sinánbiani cuanquian an bërúancë suntáru ëbianquin an 'urínxun bërúancë suntáru aribishi inubiancëbë ca anun ëman cuantínua 'icë manë xëcuë axbi xëóquiacëxa. Usai 'icëbë chiquíquiiani cuanquin, bai itsi inúishi ca Pedro ëni ángel nëtëacëxa. <sup>11</sup>Nëtëcëbë ca upí oquin sinéti Pedro quiacëxa:

—Asérabi cana bërí 'unanin, judíos unicamax cuëncësabi oquian Heródesnën 'ë 'ati 'icëbi ca aín ángel xuquin Nucën 'Ibu Diosan 'ë iémiaxa —quixun.

<sup>12</sup>Usaquin sinánbiani ca Juan 'icëbi Marcosribi caquin anécë uni, aín tita Maríanën xubunu cuancëxa, anuaxa tíméax 'aisamaira uni Nucën Papa Diosbë

banacë, a xubunu. <sup>13</sup>Cuanx bëbaquian xëcuë taxaica cuabëtsini ca xanu xuntacu, Rode, ax xëócai uacëxa. <sup>14</sup>Uquinbi Pedro banaia cuati cuëëni ca xëcuë xëócaíma —Pedro ca ëman nitsaxa —quixun cai amiribishi mëü abáquiancëxa.

<sup>15</sup>Abáquianquian cacëxunbi ca cacancëxa: —Sapi camina ñunshían —quixun.

Usaquin cacëxbi ca quiacëishiacëxa:

—Asérabi ca Pedro 'icën.

Quia ca:

—Ama ca. Aín ángel sapi ca —quixun cacancëxa.

<sup>16</sup>Usaia cananmainun ca Pedronën 'itsa oquin xëcuë taxcacëxa. Usoquian 'acëbëtan xëócaquinbi Pedro mërai ca ratúcancëxa. <sup>17</sup>Ratúcaniabi ca nëtënun quixun aín mëcënan sanánquin, usoquin ca Nucën 'Ibu Diosan sipunua 'ë chiquín-bëtsinquin bëaxa quixun atu ñuixuan-cëxa. Ñuixuntancëxun ca cacëxa:

—Ën mi cacë banacama ënë camina Jacobo 'imainun nun xucëantu ñuixunti 'ai —quixun.

Cabiani ca ëma itsinu cuancëxa.

<sup>18</sup>Usaía 'ion pëcaracëbë ca an bërúoncë suntárucamax, uimi cara Pedro quiónxa quiax sináncasmai raíribë ñucacanancëxa. <sup>19</sup>Usa 'ain ca —'aíma ca —quixuan ñuia cuaquin Pedro barinun quixun Herodesnën suntárucama cacëxa. Cacëxun bariquinbi ca mërama 'icën. Mëracëbëtanma ca an Pedro sipunua bërúoncë suntárucama a ñucátancëxun 'anun quixun raíri cacëxa. Usomitancëx ca Herodes Judea menuax Cesárea ëmanu tsoti cuancëxa.

#### Herodes bama

<sup>20</sup>Usa 'ain ca Tiro 'imainun Sidón ëmanu 'icë unicamami Herodes nishacëxa. Herodes atumi nishcë 'ixunbi ca a isí cuanti sináncancëxa. Usaquin sinánbiani riqiianxun ca an Herodes ñu 'aquincë uni, Blasto, abë pain banacëxa.

Abë banai mëníonanquin ca ësoquin cacëxa:

—Tiro 'imainun Sidón ëmanu 'icë unicama nux cananuna aín menua piti marui, Herodesbë nuibanani tsótisa tanin. Usa 'ain cananuna abë banatisa tanin.

<sup>21</sup>Usaquian atun Blasto cacë bana cuaxun ca Herodesnën anúan a unicamabë banati nëtë mëníocëxa. Anúan abë banacanti nëtëa ucëbë ca 'apu pañucë chupa upíra pañuax anu 'apu tsótinu tsoócëxa. Tsotax ca a isía ricuatsincë unicaman cuanun banacëxa.

<sup>22</sup>Banaia cuati ca sharáruí quicancëxa:

—Axa banacë uni ënëx ca unima 'icën, ënëx ca achúshi dios 'icën.

<sup>23</sup>Usaía quicancëbëbi ca Herodes: 'Ëx cana diosma 'ain, 'ë rabixunma ca Diosëshi rabican —quiama 'icën. Usa 'ain ca unicaman a rabricëbëtan, Nucën 'Ibu Diosan bënënnquinshi xucëxuan, aín ángelnën 'imicëx Herodes 'insíancëxa. 'Insíanx ca xënan picëx bamacëxa.

<sup>24</sup>Usa 'aímbi ca 'itsaira uni Nucën 'Ibu Jesúsmi catamëacëxa. Usai 'imainun ca camabi menuxunribi ami sinánquin Jesús ñuiquin cuacocancëxa. <sup>25</sup>Usaía 'imainun ca Saulobë Bernabé Jerusalé nuxun a buáncë curíqui unicama 'inántancëx, Juan 'icëbi Marcosribi cacë a buani, Antioquíanu cuantëcëancëxa.

### III. JUDIOS UNIBUNËXËSHIMA UNI ITSIRIBI JESUCRISTOMI CATAMËA (13-28)

#### Mecama oia Pablo Jesús ñuiquin bana ñui cuan (13.1-15.33)

Saulobëa Bernabé Jesús  
ñui bëtsi nëtënu cuan

**13** <sup>1</sup>Antioquíanu 'icë axa Jesucristomi catamëcë unicama raírinëx ca an Nucën Papa Diosan sinánmicëxun

bana uni ñuixuncë uni 'iacëxa, raírinëx ca an aín bana unicama 'unánmicë 'iacëxa. Usa 'ain ca Bernabé 'imainun Simeón 'icëbi Tunan Uni caquinribi anëcë, a 'imainun Cirene menu 'icë uni, Lucio, a 'imainun Manaén, axa Galilea menu 'icë 'apu Herodes, abë canicë, a 'imainun Saulo, acamax Antioquíanu 'iacëxa. <sup>2</sup>Usa 'ixuan achúshi nètën timéxun ñu piquinma Nucën 'Ibu Dios rabicëxun ca aín Bëru Ñunshin Upitan atu cacëxa:

—'Ën caiscësabi oquian bana ñuixunun camina Saulocëñun Bernabé cati 'ain.

<sup>3</sup>Usaquian cacëxun piquinma Nucën Papa Dios ñucáxuntancëxun atun mëcënan ramëquin ca axa Jesucristomi catamëcë unicaman Bernabécëñun Saulo, Nucën Papa Diosan bana uni ñuixunia bërúanx cuantánun caxun xuacëxa.

#### **Pablobëtan Bernabënën Chiprenuxun bana ñuixuan**

<sup>4</sup>Usaquian 'acëx ca Nucën Papa Diosan Bëru Ñunshin Upitan xucëx Saulobë Bernabé Seleucia ëmanu cuancëxa. Cuanx ca anuax manë nuntin Chipre nasínu cuancëxa. <sup>5</sup>Chiprenu 'icë ëma Salamina anu bëbatancëxun ca anu judíos unicama timécë xubucamanuxun Jesucristo ñuiquin Nucën Papa Diosan bana unicama ñuixuancëxa. Bana ñuixunia ca Juanënríbi 'aquiancëxa. <sup>6</sup>Salaminanu 'icë unicama bana ñuixuntancëx ca Chipre nasícamanu cuantancëx Pafos cacë ëmanuríbi bëbacëxa. Anua ca judíos uni achúshi, Barjesús caquin anëcë, ñubé uni a mërácëxa. Barjesús ax ca cëmëi —'ëx cana an Nucën Papa Dios quicë bana uni ñuixuncë uni a 'ai —quiacëxa. <sup>7,8</sup>Barjesús ax ca aín anë itsi Elimas cacë 'iacëxa. Elimas quicë ax ca ñubé qui

quicë bana 'iacëxa. Barjesús ax ca Sergio Paulo cacë 'apu an ñu mëëxuncë uni 'iacëxa. Usa 'ain ca Sergio Paulonën sinánñuira 'ixun Nucën Papa Diosan bana cuaisa tanquin Bernabécëñun Saulo unun quixun camiacëxa. Sergio Paulonëan Nucën Papa Diosan bana sinántisa taniabi ca Barjesúsnë a bana sinánxma 'inun quixun cacëxa. <sup>9</sup>Usa 'aínbi ca Saulo 'icëbi Pablo caquinribi anëcë, an Nucën Papa Diosan Bëru Ñunshin Upitan sinánmicëxun Barjesús ñachacëxa. <sup>10</sup>Ñachaquin ca cacëxa:

—Cëmë camina mix 'ain. 'Ianan camina 'atima uni 'aish ñunshin 'atimanën sinánmicë 'ain. Usa 'ixun camina min ñu upí cuëñiman. Nucën 'Ibu Diosan banaxa cuaisa 'aish upí 'aínbi çcaramina min uisa cupí a cuaxunma 'anun quixun uni paranin? <sup>11</sup>Usa 'icë ca Nucën 'Ibu Diosan bërí mi castícania. An 'imicëx bëxuñu 'ixun camina 'itsa nètën xabá isnuxunma 'ain.

Usaquian cacëxuinshi ca Barjesús bëxuñu 'ixun iscasmacëxa. Iscasmaquin ca uin cara isa mëñbianquin buánti 'icë quixun mancasmacëxa. <sup>12</sup>Usaía 'icëbëtan ca Pablonën Nucën 'Ibu Jesús ñuia cuanan usaria Barjesús 'ia isi ratuti Sergio Paulo ami sinani Jesucristomi catamëacëxa.

#### **Pisidia menu 'icë ëma, Antioquía, anu Pablobë Bernabé cuan**

<sup>13</sup>Pafos ëmanuax nuntin cuanx ca Pablobë axa abë cuancë unicamabë Panfilia menu 'icë ëma, Perge, anu bëbacëxa. Bëbax ca raíri uni ëbiani Juan Jerusalénu cuantëcëancëxa. <sup>14</sup>Cuancëbë Perge ëmanuax cuanx ca Pisidia menu 'icë ëma Antioquía anu bëbacëxa. Bëbatancëx ca anuax anun ñu mëëtima nètën anua judíos unicama timéti xubunu atsíntancëx tsoócëxa. <sup>15</sup>Tsotan anu 'icë unicamanribia cuamainun

Moisésnën cuëño bana 'imainun an Nucën Papa Dios quicë bana uni ñuixuncë unicamanribia cuëño bana 'atancëxun ca a xubunu 'icë 'apucaman Pablocëñun Bernabé cacëxa:

—'Ën xucéantu, mitsúnribi unicama 'ësëtisa tanquin camina cati 'ain.

<sup>16</sup>Cacëxun ca Pablonën niruquin an cacëxun cuanun quixun aín mecënan sanánquin ësaquin cacëxa:

—Israel unicama 'imainun an Nucën Papa Diosan bana sináncë unicama, 'ën mi camainun ca 'ën bana cuacan.

<sup>17</sup>Nucën Papa Dios, Israel unibunën Dios, an ca nucën raracama ainan 'inun caísacëxa. Caístancëxuan an 'imicëx ca Egipto menu pain tsoti anuax uácëxa. Uatia ca Nucën Papa Diosan aín cushínbi atu Egiptonua béacëxa.

<sup>18</sup>Bëquin ca cuarenta baritian anu uni 'icëma men aia, atux ami catamëisama tancëxunbi bërúancëxa. <sup>19</sup>Usaquin 'acëxa atux bébacëbëtan ca Nucën Papa Diosan Canaán menua 'icë mecën achúshi 'imainun rabé 'apu a aín unicamacëñunbi cëñuacëxa, a mecama ainan 'inun nucën raracama 'inánuxun.

<sup>20</sup>Usaquin 'atancëxun ca cuatrocientos cincuenta barin Nucën Papa Diosan bëtsix paían 'iá 'ain, 'aían 'inun achúshi achúshi uni atun cushi 'imiácëxa, Samuelnëan anun axa quicë bana unicama ñuixunti nëtëa 'itámainun.

<sup>21</sup>Usaía 'icëbëa Samuel anu 'ain ca Israel unicamax 'apuñu 'iisa tancëxa. Usa 'ain ca Nucën Papa Diosan Benjamínën rëbúnqui, Cis cacë unin bëchicë, Saúl, a cuarenta baritia 'apu 'imiácëxa.

<sup>22</sup>Cuarenta baritia 'icëbëtan Saúl chíquíntancëxun ca Nucën Papa Diosan David Israel unicaman 'apu 'imiácëxa. David ñui ca Nucën Papa Dios quiacëxa: “'Ën iscëx ca Isáinën bëchicë, David, ax 'ën sinánsaribi 'icën. Usa 'ixun ca 'ëx cuëncësabi oquin 'ati 'icën”. <sup>23</sup>David-

nën rëbúnquicama achúshi ca Jesús 'iacëxa. Amia catamëcëxuan Israel unicama aín 'uchacama tërénquin ainan 'inun iéminun ca Nucën Papa Diosan a 'imiácëxa, ax usai 'iti ñui quiásabi oquin. <sup>24</sup>Jesús uisama pain 'ain ca Juanën Israel unicama bana ñuixunquin ësoquin cacëxa: 'Atimaquin sinanibi sinanati camina nashimicë 'iti 'ain. <sup>25</sup>Aín bamati nëtëa 'urama 'ain ca ësai Juan quiacëxa: Mitsun camina 'ëx isana Cristo 'ai quixun sinanin. Ama cana 'ain. 'Ëx ama 'ain ca 'ë caxu 'ësamaira uni aia. Axa upíira 'aish cushiira 'ain cana 'ëx asaribima 'aish ami rabini a 'urama 'itima 'ain. Usai 'iquin cana aín taxacabi tubuxuntima 'ain. <sup>26</sup>'Ën xucéantu, mitsúxmi Abrahamnën rëbúnqui 'aish raírinëx an Nucën Papa Diosan bana sináncë 'icë cana mitsu cain, Jesucristomí catamëti ca uni aín 'ucha tërëncë 'aish Nucën Papa Diosnan 'iti 'icë quiáxa quicë bana, ënëx ca mitsúnribimi cuati 'icën.

<sup>27</sup>Ësaquinribi ca Pablonën Pisidia menu 'icë ëma, Antioquíanu 'icë anua judíos unicama timéti xubunuxun cacëxa:

—Jerusalénu 'icë unicamabëtan ca aín cushicamanribi Jesús, ax ca Cristo, axa uti atun caíncë, a 'icë quixun 'unánma 'icën. Anun ñu mëëtima nëtën 'icëbë timéxun an Nucën Papa Dios quicë bana uni ñuixuncë unicaman cuëño bana iscë 'ixunbi ca uisai quicë cara quixun 'unanimabi —ax ca bamati 'icë —quiacëxa, a bana quicësabi oi. <sup>28</sup>Jesús 'anuxun sináncancëbëbi ca an ñu 'atima 'acë 'aíma 'iacëxa, a cupía 'ati. Usa 'aínbi ca judíos unicaman ainsa Jesús 'aminun quixun Pilato cacëxa. <sup>29</sup>Usai ca ax 'iti 'icë quiáxa a ñui cuëño bana quiásabi oquin ca bamamiácëxa. Usa 'ain ca i curúsocënuu bamacë bitancëxun mapara naëcënu nanxun

mēnócēxa. <sup>30</sup>Mēnócēbi ca Nucēn Papa Diosan baísquimiacēxa. <sup>31</sup>Baísquimicēx ca 'itsa nētēn pain 'i, abēa Galilea menuax Jerusalénu cuancē unicamami 'itsai chiquiracēacēxa. Usa 'ain ca atun bērí a ñuiquin unicama ñuixunia.

<sup>32</sup>Usa 'ain cananuna mitsúxmi cuēēnun upí bana ēñē mitsu cain, Nucēn Papa Diosan nucēn raracama a ñuiquin cá a ca axa ucē ax 'i axa quixun.

<sup>33</sup>Salmos dos, anu ca Nucēn Papa Diosan aín bēchicē cá bana 'icēn, ēsai quicē: “Mix camina 'ēn Bēchicē 'ain. Usa 'icē cana xēnibua 'aínbimi 'ēbē 'inun mi 'imin”. Usai 'inun ca Nucēn Papa Diosan aín Bēchicē Jesucristo baísquimiacēxa. Usaqin ca 'acēxa quixun cananuna nun 'unanin. <sup>34</sup>A banacamano nun, an ca aín Bēchicē aín nami chēquítimoquin baísquimiti 'icē quixun 'unánun ca Nucēn Papa Diosan aín uni ēsaquinribi cuēñēomiacēxa: “Ēn upí bana ñuiquin David cásabi oquin cana mitsu chuámarua 'inun 'imiti 'ain”. <sup>35</sup>Quianan ca ēsairibi Salmos quiricanu quia: “Mínan 'aish upí 'icē isquin camina bamacēbi 'ēn nami chēquinun ēnquinma 'ē baísquimiti 'ain”. <sup>36</sup>Usaquin Davidnēn cuēñēo 'aínbi cananuna 'unanin, Nucēn Papa Dios cuēñcēsabi oquin 'apu 'ixun aín menu 'icē unicama 'aquintancēx ca David bamacēxa. Bamacē ca anu aín aínsi maían anuribi maíncancēxa. Maíncēx ca chēquiacēxa. <sup>37</sup>David chēquia 'aínbi ca a Nucēn Papa Diosan baísquimicē Jesús ax chēquia 'icēn.

<sup>38</sup>Ēn xucēantu, usa 'ain camina 'unánti 'ain, Jesús cupíshi ca uni aín 'uchacama tērēncē 'iti 'icēn. Ca usa 'icē quixun cananuna mitsu cain. <sup>39</sup>Usaía judíos unicama 'itia Moisésnēn cuēñēo bana cuatíbi uni aín sinan upí 'iáma 'aínbi ca axa Jesucristomi catamēcē unicamax aín 'uchacama tērēncē 'aish Nucēn Papa Diosan 'imicēx aín sinánribi upí 'icēn.

<sup>40</sup>Camina bēruancacanti 'ain, an Nucēn Papa Dios quicē bana uni ñuixuncē unicaman cuēñēo bana quicēsabi oi mina 'in, a banax ca ēsai quia:

<sup>41</sup>Mítsux, 'ēn banami cuaicē 'aish, camina uisashiti caramina ratúanan cēñúti 'ai quixun sinánti 'ain. 'Ēx Dios 'ixun cana mitsúnmi ismainun unin 'acēma ñu 'ati 'ain. A 'ēn 'aia isquian ñuicania cuaquinbi camina —asérabi ca —quixun sinántima 'ain.

<sup>42</sup>Usaquin caquin bana ñuixuntancēxa anu judíos unicama timéti xubunuax chiquitia ca abēa 'icēcamacēñun Pablo —anun ñu mēētima nētē itsínribi camina ēñē banacama nu ñuixuntécēnti 'ai —quixun unicaman cacēxa. <sup>43</sup>Usa 'ain ca unicamaxa a xubunuax chiquicē bē judíos uni raíri 'imainun judíosma 'ixunbi Nucēn Papa Diosan bana sinánquin ax quicēsabi oquin 'acē, acamax Bernabé 'imainun Pablobē cuancēxa. Cuania buánquin ca Pablobē tan Bernabénēn 'ēsēquin ēsaquin cacēxa:

—Nucēn Papa Diosan mitsu nuibacēx camina ami manutima ax cuēñcēsabi oi 'iti 'ain.

<sup>44</sup>Usai 'iixan Pablobētan Bernabénēn anun ñu mēētima nētēn Nucēn Papa Diosan bana ñuixuntécēnia cuati ca a ēmanu 'icē unicamax camáxēshi timécēsa 'inun timéacēxa. <sup>45</sup>Usaía 'itsaira uni timécē isi ca judíos unicamax pishui Pablomi nishacēxa. Ami nishi ca —cémēi ca quia —quia 'atimati Pablomi banacēxa. <sup>46</sup>Usa 'ain ca Pablobētan Bernabénēn racuéquinnma atu cacēxa:

—Nun nu judíos uni 'icē mitsu pain Nucēn Papa Diosan bana ñuixuncēxbi camina 'iti 'aíshbi ainan 'iisama tanquin aín bana cuaisama tancanin. Usa 'ain cananuna judíosma unicama Jesús

ñuiquin bana ñuixuni cuanti 'ain.  
<sup>47</sup>Usaquinu 'ati ca Nucën 'Ibu Dios  
 cuëënia quixun cananuna 'unanin,  
 Jesucristo ñuiquian ësoquin aïn bana  
 cuëñëo isquin:

Israel unicamaishima bëtsi unicama-  
 ribi aïn sinan upí 'inun 'iminun  
 cana mi 'imian. 'Imianan cana aïn  
 'uchacama tërëncë 'aïsha 'ënan  
 'inunmi camabi menu 'icë  
 unicama iéminun mi 'imian.

<sup>48</sup>Usoquian caia cuati ca judfosma uni  
 raírinëx cuëëni, —Nucën Papa Diosan  
 bana ënëx ca asábi 'icë —quiacëxa. Usa  
 'aish ca uicamax cara Nucën Papa  
 Diosnan 'aish xëñibua 'aïnbi abë 'iti 'icë  
 acamax Jesucristomi catamëacëxa.

<sup>49</sup>Usai 'imainun ca anu 'icë unicaman  
 Nucën 'Ibu Diosan bana a mecamanu-  
 xun ñuixuncania cuacëxa. <sup>50</sup>Usa 'aïnbi  
 ca judfós unicaman Pablocëñun Bernabé  
 ñui ami 'atimati banaquin bëtsi bëtsi  
 xanu Nucën Papa Diosmi sináncë 'ianan  
 —atux ca aïn nuitu upí 'icë —quixun  
 unin cacë acama 'imainun a ëmanu 'icë  
 cushi unicamaribi Bërnabé 'imainun  
 Pablomia nishnun quixun tsuáquirumia-  
 cëxa. Usocëxun ca Pablocëñun Bernabé  
 bëtsi bëtsi oquin aïn nëtënuaxa cuanun  
 quixun xuacëxa. <sup>51</sup>Usa 'ain ca a  
 ëmanuax cuanquin —nun aïn bana  
 cuatima ca Nucën Papa Diosan iscëx  
 'aisama 'icë —quixuan anu 'icë  
 unicaman 'unánun quixun aïn taxacanu  
 'icë me cupúcë tacabiani, Iconio cacë  
 ëmanu cuancëxa. <sup>52</sup>Cuanbi ca Antioquía  
 ëmanu 'icë axa Jesucristomi catamëcë  
 unicama aïn Bëru Ñunshin Upíñu 'aish  
 chuámashirua tani cuëëancëxa.

**Pablobë Bernabé Iconio ëmanu 'ia**

**14** <sup>1</sup>Antioquíanuax cuanx Iconio  
 ëmanu bëbax ca Pablobë Berna-  
 bé anua judfós unicama timëti xubunu  
 atsíancëxa. Atsínxuan bana ñuixuncëx

ca 'itsaira judfós uni 'imainun judfósma  
 uni acamaxribi ami sinani Jesúsmi  
 catamëacëxa. <sup>2</sup>Catamëcëbëtanbi ca  
 Jesucristomi sinántisama tancë judfós  
 unicaman, judfósma unicama  
 'atimaquin sinánmiquin axa Jesucris-  
 tomi catamëcë unicamami nishnun  
 quixun tsuáquirumiacëxa. <sup>3</sup>Usaía  
 'icancëbë ca Pablobë Bernabé anu pain  
 atubë 'iacëxa. 'Ixun ca Nucën 'Ibu  
 Jesúsmi catamëti racuëquinma a  
 ñuiquin upí oquin bana ñuixuancëxa.  
 Ñuixuanan ca —nu nuibaquin ca Nucën  
 Papa Diosan ainan 'inun nu iéminun aïn  
 Bëhichë xuacëxa —quixun cacëxa.  
 Usoquin an atu ñuixuncë banax ca  
 aséribi 'icë quixuan camabi unin  
 'unánun ca Nucën 'Ibu Jesusan  
 'amicëxun uni itsin 'acëma ñu a rabëtan  
 'acëxa. <sup>4</sup>Usa 'aïnbi ca Iconio ëmanu 'icë  
 unicama raírinëxa —judfós uni 'ixun  
 cananuna Jesucristomi catamëti bana  
 cuatima 'ai —quimainun raírinëxribishi  
 —Jesusan aïn bana ñuixunun caíscë uni  
 rabé ënën bana ca upíra 'icë  
 —quiacëxa. <sup>5</sup>Usax ca judfós uni raíri  
 'imainun judfósma uni raíriribi, acamax  
 Iconionu 'icë atun cushicamabë Pablocë-  
 ñun Bernabé ami nishquin ñu catancë  
 xun maxaxan 'anux 'ësénancëxa.  
<sup>6</sup>Ësénania ñuia cuabiani ca Licaonia  
 menu 'icë ëma rabé, Listra 'imainun  
 Derbe, 'imainun a 'urama 'icë me  
 camanuribi cuancëxa. <sup>7</sup>Cuanxun ca a  
 menu 'icë ëmacamanuxun —Jesucris-  
 tomi catamëti aïn 'uchacama tërëncë  
 'aish ca uni Nucën Papa Diosnan 'iti 'icë  
 —quixun unicama bana ñuixuancëxa.

**Listranuxuan Pablo maxaxan 'acan**

<sup>8</sup>Usa 'ain ca uni achúshi aïn niti  
 bëtsicë usabi bacëan 'aïsha nicëma, ax  
 Listranu 'iacëxa. <sup>9</sup>Usa 'ixun ca a unin  
 tsóxun Pablonëan bana ñuia cuacëxa.  
 Cuatia isquin ca Pablonën, ënë unin ca

—Nucën Papa Diosan ca 'ë pëxcuti 'icë  
—quixun sinania quixun 'unáncëxa.

<sup>10</sup>Unánquin ca munuma banaquin  
cacëxa:

—Cushi ca nirut.

Cacëxëshi nirui ca chirini niacëxa.

<sup>11</sup>Pablonëan usoia isi ca anu 'icë  
unicamax ratuti Licaonia menu 'icë  
unicaman banan munuma banai  
quiaçëxa:

—Unisa 'aish ca dios rabé nunu uaxa.

<sup>12</sup>Quitancëx ca Bernabé ñui —ax ca  
Júpiter 'icë —quianan Pablo ñui, an uni  
bana ñuixuncë 'ain, —ax ca Mercurio  
'icë —quiaçëxa. <sup>13</sup>Usai quiquin ca  
anuxun Júpiter rabiti xubu axa a ëmanu  
atsínti bainubi 'ain, an a rabiçë  
sacerdote achúshinën Pablocëñun  
Bernabé rabinuxun, vaca bënëcamacë-  
ñun ñu ua upí oquin xëocë bëacëxa.  
Bëtancëxun ca unicamabëtan vaca  
bënëcama a rëquin Pablocëñun Bernabé  
rabitisa tancëxa.

<sup>14</sup>Usaquián 'aísa tancëxunbi 'unani ca  
Pablobë Bernabé ratúacëxa. Ratuti atu  
nëbétsi cuanquin ca aín chupabi tucai  
munuma banaquin cacëxa: <sup>15</sup>—¿Uiso-  
casquin caramina ësöquin ñu 'acanın?  
Nuxribi cananuna mitsusaribi unishi  
'ain. Usa 'aíshbi cananuna an mitsu  
'aquincëxunmabimi ñancábi ñu rabiçë, a  
ënquin Nucën Papa Dios ashí rabinun  
quixun mitsu cai uan. An bamatiomoi  
tsóo 'ixun naí, me, bacacama 'imainun  
anu 'icë ñucamaribi unio, a camina  
sinánti 'ain. <sup>16</sup>Bërámá ca Nucën Papa  
Diosan camabi barítian atun cuëcëcësa  
oquin ñu 'anun quixun unicama  
ëancëxa. <sup>17</sup>Usaquin ënquinbi ca, ax ca  
asérabi Dios 'icë quixun 'unánun, an  
'acësabi oquin upí oquinshi camabi  
menu 'icë unicama 'aquinquin, 'uí  
'ibúmiquin ñu 'apácëcamaribi canimi-  
quin bimimia. Usoquin an 'imicë cupí  
cananuna ñu pí nux chuámarua bucuín.

<sup>18</sup>Pablobëtan Bernabénën usoquin  
cacéxbi ca a unicamax vaca bënë rëxun  
atu rabicatsi quíax sinanaisama tancëxa.  
Usai 'iquinbi munu sinanaquin ca  
rabiama 'icën.

<sup>19</sup>Usaía 'icëbë Antioquía 'imainun  
Iconionuax uquin ca judíos unibunën  
raírí sinanamiquin Pablocëñun Bernabé  
maxaxan 'acëxa. 'Atancëxun —ca  
bamaxa —quixun sinánquin ca  
nirínbianxun ëma 'uri racáncëxa.

<sup>20</sup>Usoquin 'acëa bamacësa sinánquin  
axa Jesucristomi catamëcë unicaman  
nëbétsioracéxbi ca niruquiani a  
ëmanubi cuantëcëancëxa.

Usai 'ionx ca pëcaracëbë Pablobë  
Bernabé, Derbe ëmanu cuancëxa.

<sup>21</sup>Cuanx bëbatancëxun ca —Jesucris-  
tomi catamëti ca aín 'uchacama téréncë  
'aish uni Nucën Papa Diosnan 'iti 'icë  
—quixun unicama bana ñuixuancëxa.  
Ñuixunia cuati ca 'itsa uni Jesucristomi  
catamëcëacëxa. Usaquin 'atancëx ca  
Derbenuax Listranu cuantëcëanx  
Icónionuax cuanan Antioquíanuribi  
cuantëcëancëxa. <sup>22</sup>A ëmacamanu 'iquiani  
cuanquin ca axa Jesucristomi catamëcë  
unicama cushioquin Jesucristomi  
catamëti ënxunma 'anun 'ësëanan nux  
Nucën Papa Diosnan 'aish cananuna uni  
itsían bëtsi bëtsi ocë 'iti 'ai quixun cacëxa.  
<sup>23</sup>Usoquin canan anua 'icë ëmacamanuax  
axa Jesucristomi catamëcë unicamabë  
timéquin ca atun cushi 'inun, axa asérabi  
Jesucristomi catamëcë unicamaishi  
anëacëxa. Anëtancëx píma abë banaquin  
ca —axa mimi catamëcë ënë unicama  
camina upí oquin ñu 'anun sinánmíanan  
bëréanti 'ai —quixun Nucën Papa Dios  
atu ñucáxuancëxa.

**Siriano 'icë Antioquíanu  
Pablobë Bernabé cuantëcëan**

<sup>24</sup>Usoquin 'atancëxun Pisidia menu  
'icë Antioquíanuxunuribi bana ñuixuntan-



cëx ca anuax cuanax Panfilia menu bëbacëxa. <sup>25</sup>Panfilia menu 'icë ëma Perge anuxun bana ñuixuntancëx ca Atalia ëmanuribishi cuancëxa. <sup>26</sup>Anuax ca Sirianu 'icë Antioquía ëmanu manë nuntin cuantëcëancëxa. Ax ca anuxun axa Jesucristomi catamëcë unicaman Nucën Papa Diosan 'amicëxun, atun ñu mëeti sënëonquin 'atánun quixun xucë, a ëma 'iacëxa. <sup>27</sup>Usa 'ain ca bëbaxun axa Jesucristomi catamëcë unicama timëacëxa. Timëxun ca Nucën Papa Diosan 'amicëxuan 'acë ñucama ñuixuanan —judíos unicamaxëshima, judíosma unicamaxribi ca Nucën 'Ibu Diosan sinánmicëx Jesucristomi catamëtia —quixun ñuixuancëxa. <sup>28</sup>Ñuixuntancëx ca anu pain axa Jesucristomi catamëcë unicamabë Bernabé 'imainun Pablo 'itsa 'uxën pain Antioquíanu 'iacëxa.

#### Jerusalénu timécan

**15** <sup>1</sup>Usa 'ain ca judíos uni raíri Judea menuax Antioquíanu cuanaxun, axa Jesucristomi catamëcë unicama ësaquin cacëxa: Mitsux asérabi Nucën Papa Diosnan 'inux iétisa tani camina Moisés quiásabi oi 'unánti oracacë 'iti 'ain. <sup>2</sup>Usaía quicëbëbi ca Pablobë Bernabé —usama ca —quiax atubë canancëxa. Canantancëxun ca Pablocëñun Bernabé 'imainun raíribi Jerusalénu cuanxuan, anua 'icë an aín bana ñuixunuan Jesusan caíscë unicamacëñun axa Jesucristomi catamëcë unicaman cushicami, —judíosma 'aíshbi cara uni Jesucristonan 'iisa tani 'unántiocë 'iti 'icë —quixun ñucátanun quixun xuacëxa.

<sup>3</sup>Xuquían Antioquíanu 'icë unicaman —bëruánx ca cuantan —quixun cacëx cuani Fenicia me 'abiani cuanan Samaria me 'abiani cuanquin ca —judíosma unicamaxribi ca sinanati Jesucristomi catamëaxa —quixun

ñuixuancëxa. Usaquían ñuía cuati ca Fenicia 'imainun Samaritanu 'icë axa Jesucristomi catamëcë unicamax cuëéinra cuëéancëxa.

<sup>4</sup>Usaquin ñuixunbiani cuani ca raíribë Bernabé 'imainun Pablo Jerusalénu bëbacëxa. Bëbaia isquin ca axa Jesucristomi catamëcë unicamabëtan, atun cushicama 'imainun aín bana ñuixunuan Jesusan caíscë unicamanribi cuëéinquin —¿caina ain? —caquin atu biacëxa. Bicëxun ca —nun nu bana unicama ñuixuncëxuan cuatia ca Nucën Papa Diosan 'itsa uni Jesucristomi sinánmiaxa —quixun ñuixuancëxa. <sup>5</sup>Usa 'ain ca axa Jesucristomi catamëcë fariseo unicama raírinëx nirui quiacëxa:

—Judíosma 'aíshbia ax Jesucristomi catamëcë unicamax ca 'unántiocë 'ianan usaía judíos unicama 'iti Moisésnën cuëñëo bana raíri quicësaribi oi 'iti 'icë —quiax.

<sup>6</sup>Usaí quicëbë ca Jesusan aín bana ñuixunuan caíscë unicama 'imainun axa Jesucristomi catamëcë unicaman cushicama —uisa cara 'iti 'icë —quixun sinánux timëacëxa. <sup>7</sup>Timëxun sinania 'uran canania oi niruquian ca Pedronën atu cacëxa:

—'Ën xucéantu, camina 'unanin, Nucën Papa Diosan ca, Jesucristomi catamëtishi ca uni ainan 'inux iéti 'icë quixun judíosma unicama ñuixunuan micama achúshi 'ë caíscacëxa, usaquin 'ën ñuixuncëxun cuatía atúxribi ainan 'inun. <sup>8</sup>An camabi unían sináncë ñu 'unáncë 'ixun ca Nucën Papa Diosan, a unicamax ca judíosma 'aíshbi Jesucristomi asérabi sinánxa quixun 'unánquin, nu 'imicësaribi oquin aturibi aín Bëru Ñunshin Upíñu 'inun 'imiáxa. <sup>9</sup>Nuxnu judíos 'icëa nu 'imicësaribi oquin ca Nucën Papa Diosan judíosma unicama Jesucristomi catamëcë cupí aín 'uchacama téréñquin aín sinan upí

'imiaxa. <sup>10</sup>¿Usa 'aínbi caramina mitsux uisa cupí, usama ca quiax Nucën Papa Diosmi 'uchanan, judíosma unibu ca judíos unibu 'icësaí 'iti 'icë quiax quin? Moisésñëan usai judíos unicama 'iti cuënëo bana cuacë 'aishbi ca a banacama quicësabiira oi nucën raracamax 'iáma 'icën. Nuxribi cananuna atúxa 'iá usaribiti 'iacën. <sup>11</sup>Usa 'aínbi cananuna 'unanin, nun 'uchacama cupí ainanma 'aishbi ami catamëcëxun ca nun 'uchacama téréñquin Nucën 'Ibu Jesusan nu Nucën Papa Diosnan 'imiaxa. Judíosma unicamaxa ami catamëtia ca usaribi oquin ainan 'imiaxa.

<sup>12</sup>Pedronën cacëx ca anu 'icë uni camáxbi banaima nētēshiacëxa. Nētēshitancëxun ca Pablonëan Bernabé bētan uisaira oquin cara judíosma unicaman aín bana cuaxa quixun ñuixuanan uisaira oquin cara Nucën Papa Diosan, aín cushímbi, atu uni itsin 'acëma ñu 'amiaxa, quixun ñuixuncëxun cuacëxa. <sup>13</sup>Usaquin cafa Pablobë Bernabé sēnécëbētan ca Jacobonën anu 'icë unicama cacëxa:

—'Ën xucéantu, 'ën mitsu camainun ca cuat. <sup>14</sup>Simón Pedronën ca nu ñuixuanxa, Nucën Papa Diosan cara uisaira oquin judíos unicamaishima, judíosma unicamaribi nuibaquin ainan 'inun 'imiaxa quixun. <sup>15</sup>Usai ca 'iti icë quixun ca an Nucën Papa Dios quicë bana uni ñuixuncë unicaman cuënëo-cëxa. A banax ca ësaí quia:

<sup>16</sup>Mitsu 'aquintécënquin cana aín rēbúnquinëxa 'apuma 'aínbi Davidnën rēbúnqui achúshi 'apu 'imiti 'ain. <sup>17</sup>Judíos unicamainshima judíosma unicamanribia 'ënan 'inuxun 'ë ñucácë cupí cana acaman 'apu, Davidnën rēbúnqui achúshi 'imiti 'ain. <sup>18</sup>Usai cana mitsun 'Ibu Dios an ënë banacama bëräma ñuiá 'ëx quin.

<sup>19</sup>Usa 'ain cana 'ën sinanin, judíosma unicama axa sinanati Nucën Papa Diosnan 'inux Jesucristomi catamëcë, a cananuna usai judíos unicama 'iti Moisésñën cuënëo bana quicësabi oquian 'anun catima 'ain. <sup>20</sup>Ësaquinshi caquin cananuna acama quirica buánmiti 'ain: Unínbia unioçë ñu rabiquian 'acë ñuina a camina pitima 'ain, 'imainun camina min xanuma 'ain xanubë 'itima 'ain, 'imainun camina tētscacë ñuina pitima 'ain, 'imainun camina ñuina imi pitima 'ain. <sup>21</sup>Nucën raracaman 'ázaribi oquin ca camabi ëmanuxun unin anua judíos unicama timéti xubunuxun anun ñu mēëtima nētëcaman, Moisésñën cuënëo bana ñuixunia. Usa 'ixuan Moisésñën usai judíos unicama 'iti cuënëo bana 'unáncë 'icë cananuna ësaquin caquinshi atu quirica buánmiti 'ain.

<sup>22</sup>Usaía Jacobo quia cuaquin ca Jesusan aín bana ñuixunun caiscë unicama 'imainun axa Jesucristomi catamëcë unicaman aín cushicamabētan sináncëxa, Antioquíanua Bernabé 'imainun Pablobë cuantánun cananuna rabé uni caísti 'ai quixun. Usaquin sinánxun ca axa Jesucristomi catamëcë uni rabé, Judas 'icëbi Barsabásribi cacë, acëñun Silas caiscacëxa. <sup>23</sup>Caístancëxun ca atúan buánun quixun ësaquin cuënëoxun quirica 'ináncëxa:

“Nux Jesusan aín bana uni ñuixunun caiscë 'imainun axa Jesucristomi catamëcë unicaman nun cushicamabētan cananuna mitsu quirica buánmin. Mitsux judíosma 'aishbimi Jesucristomi catamëcë 'aish nun xucéantu 'icë, Antioquía ëmanu, 'imainun Siria menu, 'imainun Cilicia menu 'icë, cananuna ësaquin mitsu cain. <sup>24</sup>Nun xucéxmabi cuanxun isa uni raírinën mitsubë banaquin, usai judíos unicama 'iti Moisés quiasabi oi camina 'iti 'ain

quixun caquin mitsu masá nuitumiaxa quixuan ñuicania cananuna cuan. <sup>25</sup>Usa 'ain cananuna timéxun, axa nubë nuibanancë Bernabé 'imainun Pablobë cuanxuan mitsu isi cuanun rabé uni caístancëxun xuti sinan. <sup>26</sup>Nun caíscë uni a rabëtan ca ami nishquian unin 'aisa tancëxunbi Nucën 'Ibu Jesucristoa usai 'ia ñuiquin racuéquinma unicama ñuixunia. <sup>27</sup>Usa 'ain cananuna Judascë-ñun Silas xutin, Bernabé 'imainun Pablobëa cuanun. Xucëxun ca atun ënë quirica quicësabi oquin mitsu ñuixunti 'icën. <sup>28</sup>Nucën Papa Diosan Bëru Ñunshin Upitan sinánmicëxun cananuna sinan, ca asábi 'iti 'icën, mitsúnmi Moisésnën usai judfos unicama 'iti cuëñëo banacama quicësabi oquin 'aquinma ënë ñuishi 'ati: <sup>29</sup>Uníbia unioçë ñu a rabiquian 'acë ñuina a camina pitima 'ain 'imainun camina ñuina imi pitima 'ain 'imainun camina têtsécacë ñuina pitima 'ain 'imainun ca aín xanuma 'ain uni xanubë 'itima 'icën. Ënë banacama cuati camina mitsux asábi 'iti 'ain. Bëruánx camina 'icanti 'ain”.

<sup>30</sup>Usaquin quirica 'atancëxuan xucëx cuanx ca Antioquíanu bëbacëxa. Bëbaia cuatía timëtía ca axa Jesucristomi catamécë unicama a buáncë quirica 'ináncëxa. <sup>31</sup>Ináncëxun a quirica uisai cara quia quixun istancëx ca cuëëni chuámashirua 'icancëxa. <sup>32</sup>Usa 'ain ca an Nucën Papa Diosan sinánmicëxun bana uni ñuixuncë uni 'ixun Judas 'imainun Silasnën 'itsa oquin bana ñuixunquin anu 'icë unicama 'ësëacëxa. 'Ësëcëxun upí oquin Jesús sinani chuámarua tani ca unicama cuëëancëxa. <sup>33</sup>Itsa nëtën Antioquíanu 'itancëxa Judasbë Silas an xucë unicamanu cuantécënia ca anua 'icë axa Jesucristomi catamécë unicaman —bëruánx camina cuanti 'ai

—quixun caquin xuacëxa. <sup>34</sup>Usa 'aínbi ca Silanën Judas cuantámainun ax bërúti sináncëxa. <sup>35</sup>Usaquin sinántan-cëx bërúxun ca anuxun Pablobëtan Bernabénën an Jesucristomi catamécë 'ixun aín bana ñuixuncë unicamabë tan —Nucën 'Ibu Jesúsmi catamëti ca uni Nucën Papa Diosnan 'iti 'icë —quixun bana ñuixunquin Antioquíanu 'icë unicama 'unánmia-cëxa.

### **Pablo mecama oi cuantécëan (15.34-18.22)**

<sup>36</sup>Usa 'ain ca anu pain 'itancëxun Pablonën Bernabé cacëxa:

—Anuxunu Nucën 'Ibu Jesucristomi catamëti ca uni Nucën Papa Diosnan 'iti 'icë quixun bana ñuixuncë ëmacamanu cuanquin cananuna anua 'icë nun xucéantu uisa cara istécëni cuanti 'ai —quixun.

<sup>37</sup>Cacëxun ca Bernabénën Juan 'icëbi Marcosribi cacë uni, a buántisa tancëxa. <sup>38</sup>Buántisa taniabi ca Pablonën Bernabé cacëxa:

—Panfilia nëtenuax ca nubëtan Nucën Papa Diosan bana unicama ñuixunima nu ëbëtsini uaxa. Usa 'ain cananuna a buántima 'ain.

<sup>39</sup>Usai canantancëx ënananquin Marcos buani ca Bernabé, manë nuntin Chipre nasínu cuancëxa. <sup>40</sup>Cuancëbëtan ca Pablonën Silas abëa cuanun caístacëxa. Caíscë ca axa Jesucristomi catamécë unicaman —Nucën 'Ibu Diosan ca nuibaquin bërúanquin mi 'aquinia —quixun catancëxun xuacëxa. <sup>41</sup>Xucëx cuanquin ca Pablobëtan Silasnën Siria menu cuanan Cilicia menuribi cuanquin a mecamanuaxa Jesucristomi catamécë unicama bana ñuixunquin Jesucristonan 'aísha cuëënun sinánmiacëxa.

**Pablo 'imainun Silasbë Timoteo cuan**

**16**<sup>1</sup>Cuanx ca Plobë Silas Derbe ãmanu cuanan anuribi cuani Listra ãmanu bëbacëxa. Anu ca axa Jesucristomi catamëcë Timoteo cacë uni 'iacëxa. Aín titax ca judío xanu 'ianan Jesúsmi sináncë 'iacëxa, 'imainun ca aín papax griego banan banacë 'iacëxa. <sup>2</sup>Listra 'imainun Iconio ãmanu 'icë axa Jesucristomi catamëcë unicaman —upí uni ca —quixun ñuicë ca Timoteo 'iacëxa. <sup>3</sup>Usa 'ain ca abëa Timoteo cuanti cuëenquin Pablonën sináncëxa, —Timoteonën papax ca judío unima 'aish griego banan banacë 'icë quixun ca Listranu 'icë 'imainun Iconionu 'icë judíos unicaman 'unania. Usa 'ain ca Timoteo judíos unicaman aín bana cuaisama tanti rabanán judíos uni 'icësaí 'unántiocë 'iti 'icë —quixun. Sinántancëxun 'unánti oracamibianquin ca Pablonën Timoteo buáncëxa. <sup>4</sup>Listranuax Timoteo buani bëtsi bëtsi ãmanu cuanquin ca anu 'icë unicama, uisaquin cara Jerusalénu 'icë Jesusan aín bana ñuixunun caíscë unicama 'imainun axa Jesucristomi catamëcë unin cushicaman caxa quixun bana ñuixuancëxa. Ñuixunquin ca atúxa quicësabi oquin camina 'ati 'ai quixun axa Jesucristomi catamëcë unicama cacëxa. <sup>5</sup>Usaquian Plobëtan Timoteonën bëtsi bëtsi ãmanu cuanquin bana ñuixuncëx ca axa ami catamëcë unicamax upiti Jesúsmi sináncëxa. Usai 'icëbëa camabi nètën uni raírnëxribi ami sináncëbë ca axa Jesucristomi catamëcë unicama 'aisamaira 'iacëxa.

**Namácësa oquian Pablonën  
Macedonianu 'icë uni isa**

<sup>6</sup>Usaquiania cuania Asianuxun bana ñuixunxunma 'anun Nucën Papa Diosan Bëru Ñunshin Upitan sinánmicëx ca

Plobë Silas 'imainun Timoteo Frigia cacë me 'imainun Galacia cacë menuribi cuancëxa. <sup>7</sup>Cuanx anu bëbaquin Misia cacë me inubiani, Bitinia cacë menuribi-shi cuainsa taniabi ca Nucën 'Ibu Jesusan Bëru Ñunshin Upitan anu cuanxma 'inun sinánmiacëxa. <sup>8</sup>Sinánmicëx ca Misia inubianx Troas cacë ãmanu bëbacëxa. <sup>9</sup>Bëbaxun ca Pablonën imé namáquin iscësoquin Macedonia menu 'icë uni achúshia nicë isacëxa. Iscëxun ca cacëxa: Macedonia ãnu uxun camina nu 'aquinti 'ain. <sup>10</sup>Usoquian Pablon namáquin iscësa oquin isan cananuna nun Macedonia menuxun, Jesucristomi catamëti ca uni ainan 'iti 'icë quixun bana ñuixuni cuanti ca Nucën Papa Dios cuëënia quixun sináncën. Sinánquin cananuna bënëenquinshi anu cuanuxun ñu mëníocën.

**Plobëa Silas Filipos cacë ãmanu 'ia**

<sup>11</sup>Manë nuntin Troasnuax cuanshiax Samotracia cacë nasínu bëbonx cananuna Neápolis ãmanu bëbacën. <sup>12</sup>Anuax cuanx cananuna Filipos ãmanu bëbacën. Filipos ax ca Macedonia menu 'icë ãma cha anuribia Romanu 'icë unicama 'icë 'iacëxa. Anu cananuna 'itsamashi nëtë 'iacën. <sup>13</sup>A ãmanuax cananuna anun ñu mëëtima nëtën baca cuëbí cuancën, anuaxa axa ami sináncë unicamax usabii 'icë 'aish Nucën Papa Diosbë banacë, anu. Cuanquinbi xanucama timécë isi anu tsóbuquin cananuna Jesúsmi catamëti bana atu ñuixuancën. <sup>14</sup>A xanucama achúshi ca Lidia cacë 'iacëxa. Ax ca Tiatira ãmanu 'icë xanu 'ianan, an chupa upí minanën pucucësa marucë 'iacëxa. Usa 'aish ca ami sinánquin Nucën Papa Dios rabicë 'iacëxa. Usa 'ixuan Pablonën bana ñuia cuatia ca Nucën 'Ibu Diosan Jesucristomi catamëtia ainan 'inun sinánmicëxa. <sup>15</sup>Sinánmicëx Jesucristomi

catamëti ca Lidia, aín xubunu 'icëcama-bë, nashimicë 'iacëxa. Nashimicë 'ixun ca nu cacëxa:

—Mitsun, 'ëx cana asérabi Jesucristo-nan 'ain quixun sinani camina 'ën xubunu 'iti 'ain.

Usaquin nu cafa nux anu 'iti cuëncë bë cananuna anu 'iacën.

<sup>16</sup>Nëtë itsin anuaxa uni abë banacë anuax Nucën Papa Diosbë banai cuanquinbi cananuna xanu xuntacu achúshi ñunshin 'atimañu isacën. A xanun ca ñunshin 'atimanëan 'unánmicë xun uisai cara 'iti 'icë quixun ñucácëxun uni usai camina 'iti 'ain quixun ñuixuan-cëxa. Usoquin 'aquin ca aín patrónca-ma 'itsa curíqui bimiacëxa. <sup>17</sup>A xanu xuntacunëx ca Pablocëñun nu nuibiani munuma banai quiacëxa:

—Ënë unicaman ca Dios, naínu 'icë 'Apuir a ñu 'axunia. Usa 'ixun ca anúnmi mitsun 'uchacama téréncë 'aish anun 'iti bana mitsu ñuixunia.

<sup>18</sup>Usai quiquin ca 'itsa nëtën nu nuiacëxa. Usoquin 'uran ubíocëx cuainacëquin ca Pablonën ñunshin 'atima cacëxa:

—Jesucristonëan quimicëxun cana mi cain, ënë xanunuax ca chiquit.

Quixuan cacëxëshi ca bënëtishi ñunshin 'atima chiquiacëxa.

<sup>19</sup>Usai 'icëbëtan ca aín patróncaman, a xanuan an 'acësabi oquin ñu 'acëbëtanma ca curíqui bitima 'icë quixun sinánquin, Pablocëñun Silas biacëxa. Bibianquin ca anua 'apu 'icënu buácëxa. <sup>20</sup>Buánxun ca an uni bëtisi unimi manania cuacë uni cacëxa:

—Ënë uni rabëtan judíos uni 'ixun bana ñuixuncëxun cuati ca nun ëmanu 'icë unicamax tsuáquiruia. <sup>21</sup>Tsuáquiru-miquian bana ñuixuncë 'aínbí cananuna nun romano uni 'ixun an ñuixuncë bana axa quicësabi oquin 'atima 'ain.

<sup>22</sup>A xanun patróncaman usaquin an uni uni itsimi manania cuacë unicama caia cuati, ca camabi uni Pablo 'imainun Silasmi tsuáquiruacëxa. Tsuáquirucëbëtan ca a unicaman, aín chupa pëmitancëxuan manë xon rishquinun quixun aín unicama cacëxa. <sup>23</sup>Usoquin cacëxun cushíinra 'itsa oquin rishquitancëxun ca sipuacëxa. Sipuatan-cëxun ca an sipunu 'icë unicama bërúancë uni cacëxa, Pablocëñun camina Silas machiquitia upí oquin bërúanti 'ai quixun.

<sup>24</sup>Usoquin 'anúan cacëxun ca sipu 'ucë mëúira atsínmixun i quini ocën tabíata-xacëxa.

<sup>25</sup>Usoquian 'acëx ca Pablobë Silas imé naëx Nucën Papa Diosbë bananan a rabi cantacëxa. Usaría 'ia ca anua 'icë sipuacë uni raírinën cuacëxa. <sup>26</sup>Usaífa 'icëbëa me cushíinra shaíquicëbë ca ami tapuocë icama shaíquicëbëa xëcuëca-maxribi xëoquimainun manë risi anun uni sipuacë təcërecacëcama tubucuti rëucüacëxa. <sup>27</sup>Usaífa 'icëbë bësüquinbi, xëcuëcama xëóquicë isquin ca an sipuacë unicama chiquítí rabanan bërúancë unin sinácëxa, —sipuacë unicama ca chiquíquiiani cuanxa —quixun. Sinánquin ca axbí taroracáca-tsi quixun aín manë xëtocë biacëxa. <sup>28</sup>Bitsiabi ca Pablonën munuma banaquin cacëxa:

—Taroracaxma ca 'it. Camáxbi cananuna ënu 'ain.

<sup>29</sup>Cacëxuinshi, anun pëcaxun isti a aín uni ñucáxun bibianx ca bënëtishi abáquiiani sipu mëú atsíancëxa. Atsini, bërëqui racuëtan bamai ca Pablo 'imainun Silas tanáin rantin purúancëxa. <sup>30</sup>Usai 'itancëxun ëman buánquin ca Pablo 'imainun Silas cacëxa:

—¿Añu carana 'ën 'uchacama téréncë 'aish iénuxun 'ati 'ain?

<sup>31</sup>Quia ca cacëxa:

—Nucën 'Ibu Jesucristomi sinani ca ami catamët. Ami catamëti camina min xubunu 'icë min aintsi 'ibucamabëbi mitsun 'uchacama tērēncë 'aish Nucën Papa Diosnan 'iti 'ain.

<sup>32</sup>Caxun ca a 'imainun aín xubunu 'icëcamaribi Nucën 'Ibu Jesús ñuiquin bana ñuixuancëxa. <sup>33</sup>Ñuixuncëxuinshi ca imëbi an sipuacë unicama bërúancë unin Pablo 'imainun Silas anua manë xon 'acë aín namicama chucaxuancëxa. Chucaxuncëbë ca an sipuacë unicama bërúancë unibë axa aín xubunu 'icëcamaxribi Jesúsmi catamëti nashimicë 'iacëxa. <sup>34</sup>Usa 'ixun ca an sipuacë unicama bërúancë unin aín xubunu buánxun Pablocëñun Silas pimiacëxa. Usocëx ca a unibë aín xubunua 'icë aín aintsi 'ibucamaxribi Nucën Papa Diosmi catamëti ainan 'aish, chuámashirua tani cuëëancëxa.

<sup>35</sup>Usaía 'ian pëcaracëbëtan ca an uníxa uni itsimi manania cuacë unicaman policía ququin cacëxa:

—An sipuacë unicama bërúancë uninu cuanxun camina a uni rabéa cuantánun ënun quixun cati 'ain.

<sup>36</sup>Usaquin caxun xucëx cuanxun cacëxun ca an sipuacë unicama bërúancë unin Pablo cacëxa:

—An uníxa uni itsimi manania cuacë unicaman ca mi chiquínun quixun 'ë camiaxa. Usa 'ain camina chuámashirua 'aish cuanti 'ain.

<sup>37</sup>Usaqui an sipuacë unicama bërúancë unin cacëxun ca Pablonën policíacama cacëxa:

—Nux románo uni 'aish quiricañu 'icëbi, añu caranuna 'a quixun nu ñucáxunmabi, ca camabi unfan ismainun rishquimitancëxun nu sipuamionxa. ¿Usaquin 'amionxunbi cara bërí uni raírinën isnúnma nu chiquinin? Ax ca 'aisama 'icën. Atúxbi ca nu chiquini uti 'icën.

<sup>38</sup>Ësoqui an Pablonën cacëxun cuabiani cuantëcëxun ca policíacaman an uni uni itsimi manania cuacë unicama cacëxa. Caqui an, románo uni 'aish ca quiricañu 'icë quixun cacëxun cuati ca racuëacëxa. <sup>39</sup>Racuëti anu cuanxun ca Pablocëñun Silas cacëxa:

—Mix camina románo uni 'aish quiricañu 'ain quixun 'unánxunma cananuna mi 'ón.

Caquin ëman buánxun ca —ënë ëmanuax camina cuanti 'ai —quixun cacëxa. <sup>40</sup>Usaqui an cacëx sipunuax chiquíqui an ca Lidianën xubunu cuancëxa. Cuanx atsínquinbi ca axa Jesucristomi catamëcë unicama anu timëcë isquin upí oquin 'ësëtancëx anuaxribi cuancëxa.

Tesalónica ëmanuaxa unicama tsuáquirua

**Tesalónica ëmanuaxa unicama tsuáquirua**

**17** <sup>1</sup>Usaqui an cuani Anfípolis ëma 'imainun Apolonia ëma anun cuanx ca Tesalónica ëmanu bëbacëxa. Tesalónicanu ca anua judíos unicama timëti xubu achúshi 'iacëxa. <sup>2</sup>Usa 'ain ca rabé 'imainun achúshi semana anu 'i, Pablo axa 'icësabi oi anun ñu mëetima nëtë 'icëbë 'icëbë, anua judíos unicama timëti xubunu atsínxun, anua timëtia unicama cuënëo bana 'unánmiquin, Jesús ax ca aséabi Cristo 'icë quixun cai atubë canancëxa. <sup>3</sup>Cuënëo bananu ñuicësabi oquin 'unánmianan ca —a bana quicësabi oi 'iti 'aish ca Cristo paë tantancëx bamatancëx baísqiuxa —quixun canan ca —'ën mitsu ñuixuncë Jesús abi ca axa uti nun caíncë Cristo ax 'icë quixun ñuixuancëxa.

<sup>4</sup>Ñuixunia cuati ca judíos unicama raíri, Jesús ax ca aséabi Cristo 'icë quixun sinani, ami catamëti Silas 'imainun Pablobë timëacëxa. 'imainun ca griego banan banacë uni 'ixunbia

Nucën Papa Diosan bana cuacëcama, a 'imainun —ax ca aín naitu upí 'icë —quixuan unin cacë xanucamaxribi Jesúsmi catamëacëxa. <sup>5</sup>Usa 'aínbi ca judíos unicama, an Jesús sináncëma, ax ami nutsi Silas 'imainun Pablomi nishquin uni 'atima chiquíshcama timëtancëxun a ëmanu 'icë unicama tsuáquirumiacëxa. Tsuáquirumi, Jasón cacë uni aín xubunu banaruquin barri ca, camabi unían isnun ëma nëbëtsi buánti ca Pablocëñun Silas chiquínti 'icë quiax quicancëxa. <sup>6</sup>Usai quiquinbi mëraquinma ca Jasóncëñun axa Jesucristomi catamëcë unicama raíri nirínbianquin a ëmanu 'icë unicaman 'apun buáncëxa. Buani ca munuma sharatí quicancëxa:

—An camabi menu 'icë unicama tsuáquirumicë uni rabëtax ca ënu uaxa. <sup>7</sup>Ucë ca Jasonën anua 'inun aín xubunu atsními axa. A unicamax ca Romanu 'icë 'apu César quicë bana cuaisama tani, 'apu itsi ca Jesús 'icë quia.

<sup>8</sup>Pablocëñun Silas ñuicania cuati ca unicamabë a ëmanu 'icë 'apucamaxribi sharatí tsuáquiruacëxa. <sup>9</sup>Tsuáquiruiabi ca Jasónbëtan raírinën a ënun quixun curíqui 'ináncëxa. 'Ináncëxun ca Jasóncëñun raíri cuantánun quixun ëancëxa.

#### **Pablobë Silas Berea ëmanu 'iá**

<sup>10</sup>Usai 'icëbëtan ca axa Jesucristomi catamëcë unicaman bënëñquinshi imë Pablocëñun Silas Berea cacë ëmanu cuantánun quixun xuacëxa. Xucëx cuanx bëbatancëx ca anua judíos unicama timéti xubunu atsiáncëxa. <sup>11</sup>Atsínxuan bana ñuixuncëbëtan ca anua 'icë judíos unicaman, Tesalónica ëmanua 'icëcamasamaira 'ixun, cuëenquin Pablonëan Jesús ñuiquin Nucën Papa Diosan bana ñuixunia cuacëxa. Cuaquin ca asérabí cara

Pablonëan ñuixuncë bana ax 'icë quixun 'unáncasquin camabi nëtën Nucën Papa Diosan bana cuëñëo isacëxa. <sup>12</sup>Usaquin 'ai ca atux 'itsáxira —asérabí ca —quixun sinani Jesucristomi catamëacëxa. Usai 'imainun ca griego banan banacë unicama 'imainun xanucamaribi —upí sinánñu ca —quixuan unin 'unáncë, acamax Jesucristomi catamëacëxa. <sup>13</sup>Usaía 'icëbëbi ca Tesalónicanu 'icë judíos unicamax, Pablonëan Bereanuxun Nucën Papa Diosan bana ñuixunia ñuicania cuabiani anuribishi cuancëxa. Cuanxun ca Pablomia nishnun quixun anu 'icë unicamaribi tsuáquirumiacëxa. <sup>14</sup>Tsuáquirumicëbë tanbi ca axa Jesucristomi catamëcë unicaman bënëñquinshi Pablo manë nuntían cuantánun quixun xuacëxa. Xucëbë ca Timoteobë Silas Bereanubi bërúacëxa. <sup>15</sup>Bërumainun ca an buáncë unicaman Pablo Atenas ëmanu buáncëxa. Buántancëxun a ëbianía Bereanu cuantëcënia ca Pablonën a unicama Timoteocëñuan Silas bënëtishi a isi unun quixun camiacëxa.

#### **Atenas ëmanua Pablo 'iá**

<sup>16</sup>A unicama cuan ca Pablonën Atenas ëmanuxun Timoteocëñun Silas aia caíancëxa. Caini a ëmanu niquin, unían unioçë ñu a unin rabiçë, a 'aisamaira isi ca Pablo masá nuituacëxa. <sup>17</sup>Usa 'ixun ca anua judíos unicama timéti xubunuxun, judíos unicama 'imainun judíosma 'ixunbia an Nucën Papa Dios rabiçë unicamaribi, Jesús ax ca asérabí Cristo, axa uti judíos unicaman cañcë, a 'icë quixun sinánmisa tani cuëñëo bana ñui atubë canancëxa. Usai 'ianan ca camabi nëtën anuxun ñu marutinuaxribi anua 'icë unicamabë Jesús ñui canancëxa. <sup>18</sup>Cananmainun ca raíri unicama usa isa uni 'iti icë quixun epicúreo cacë unicaman bana ñuia cuacë, 'imainun

estoico cacë unicamanribia bëtsi bana ñuia cuacë, a unicamaxribi uax Pablobë banacëxa. Abë banatancëx ca raírinëx quiacëxa:

—¿Añu cara banañuira 'ixun ënë unin nu ñuixuinsa tanin?

Quicëbë ca raírinëx Pablonëan Jesús ñuianan —bama 'aish ca uni baísquiti 'icë —quixun cacëxun cuax quiacëxa:

—Nun rabicë diosma, bëtsi dios ñui sapi ca quia.

<sup>19</sup>Usai quitancëxun ca Pablo bibianquin matá, Areópago cacë, anu buánxun cacëxa:

—Nun nu cuacëma a ñuiquinmi nu cacë bana ënë cananuna upí oquin 'unántisa tanin. <sup>20</sup>Nun cuacëma ñu camina min ñuín. Uisai qui quicë cara quixun cananuna 'unántisa tanin.

<sup>21</sup>Usa 'ain ca Atenasnu 'icë unicama 'imainun 'uracëox uax atubë 'icë unicama an uisa bana cara an cuacëma 'icë a cuaisa tancëxa. 'Imainun ca unían ñuia cuacëma ñuribi ñuiquin uní caisa tancëxa. Usai ca a unicamax 'iacëxa.

<sup>22</sup>Usa 'ain ca Pablo Areópagonu timécë unicama nëbétsinuax niruquin cacëxa:

—Atenasnu 'icë unicama, 'ën iscëxun camina mitsun dioscama 'itsaira sinánquin a rabin. <sup>23</sup>Ëx ënë ëmanu 'icë bain niquin cana anuxunmi mitsun dioscama rabicë 'itsa isan. Isanan cana anuxun mitsun dios rabiquinmi anu ñu nanti ñu achúshinumi ësaquin cuënëocë isan: “Ënëx ca anuxun nun 'unáncëma dios rabiti a 'icën”. 'Unánxunmabimi rabcancë dios a cana 'ën mitsu ñuixunin.

<sup>24</sup>An ca me 'imainun anu 'icë ñucamaribi unioçëxa. Ax ca naí, me acaman 'Ibu 'icën. Usa 'aish ca ax anuxun a rabiti unin 'acë xubunu 'ima. <sup>25</sup>Unin a ñu 'axuncëxmabi ca ax usabi 'ia 'aish usabi 'ia. An ca anun nux tsóti nëtë

'imainun suñu, piti, 'imainun camabi ñuribi nu 'inania.

<sup>26</sup>An ca achúshi uni aín rëbúnquicamaxa mecamanu tsónun unioçëxa.

Unioquin ca uiti barin cara aín rëbúnquicamax camabi menu tsóti 'icë quixun mëníonan, anua aín me sënëncëcamaribi mëníoxuancëxa.

<sup>27</sup>Nucën Papa Diosan ca ami sinánquian a 'unánun uni unioçëxa. Uisaxun caranuna a 'unánti 'ai quixunu sináncëxbi ca Nucën Papa Dios nu 'urama 'icën. <sup>28</sup>Nucën Papa Dios cupí cananuna tsotin, a cupí cananuna nitsin, a cupí cananuna ënë menu 'ain. Mistun aintsí raírinëx ca ëesai quiacëxa: “Nux cananuna diosan rëbúnqui 'ain”. <sup>29</sup>Nux aín rëbúnqui 'ixun cananuna sinántima 'ain, ax ca unían 'acë curi 'acë ñuusa 'ianan uxua manë 'acë ñuusa 'ianan maxax 'acë ñuusa 'icë quixun. <sup>30</sup>Nucën Papa Dios 'unáncëma 'ixun ca unin anbia unioçë ñu rabiácëxa. Rabia isquinbi ca Nucën Papa Diosan isëshiacëxa. Isëshia 'ixunbi ca bërí camabi menu 'icë uni 'atimaquin sináncë 'ixunbia sinananun quixun aín unicaman canun camia. <sup>31</sup>Nucën Papa Diosan ca mënioçëxa, anúan achúshi uni, Jesucristonën camabi uni, aín nuitu cara upí 'icë, cara upíma 'icë quixun isti nëtë. Usaquian 'anun ca an caísacëxa quixuan camabi unin 'unánun, ca Nucën Papa Diosan Jesús bamacëbi baísquimiacëxa.

<sup>32</sup>Usaquian bamatancëx ca Jesús baísquiacëxa quixun ñuia cuati ca uni raírinëx Pablomi cuaiacëxa. Cuaimainun ca raírinën Pablo cacëxa:

—Minmi ñuicë bana ënëmi ñuitëcënia cananuna bëtsi nëtën cuatëcënti 'ain.

<sup>33</sup>Usaquian cacëx ca Pablo acama ëbiani cuancëxa. <sup>34</sup>Cuancëbë Pablobë cuani ca raírinëx ami sinani Jesúsni catamëacëxa. Acamax ca Dionisio,



Areópagonu 'icë uni a 'imainun xanu achúshi Damaris cacë a 'imainun raíriri 'iacëxa.

**Pablo Corinto ëmanu 'ia**

**18**<sup>1</sup>Areópago cacë matánuxun bana ñuixuntancëx ca Pablo Atenas ëmanuax Corinto ëmanu cuancëxa. <sup>2</sup>Cuanx bëbaxun ca judío uni achúshi, Aquila cacë, mëraccëxa. Ax ca Ponto cacë menuaxa bacëan 'iacëxa. Usa 'aish ca aín xanu Priscilabë Italia menu 'icë Roma ëmanu 'iacëxa. 'Icëbëbia anu 'icë 'apu Claudio ax —judíos unicamax ca camáxbi Romanuax cuanti 'icë —quicëbë ca Corintonu tsoti cuancëxa. Usa 'ain ca Corintonu bëbatancëx Pablo Aquilacëñun Priscila isi cuancëxa. <sup>3</sup>Aquila ax ca Pablonëan 'acësaribi oquian an chupa xubu 'acë uni 'iacëxa. Usa 'ain ca Pablonën aín xubunu 'ixun Aquilabëtan chupa xubu 'acëxa. <sup>4</sup>Usoquin 'anan ca anun ñu mëëtima nètëcaman anua judíos unicama timéti xubunu cuanxun —Jesús ax ca aséribi Cristo, axa utia judíos unicaman cañcë, a 'icë —quixun bana ñuixuancëxa. Ñuixuncëxun ca judíos unicama raíri 'imainun judíosma unicama raírínënríbi —Jesús ax ca aséribia Nucën Papa Diosan xuá a 'icë —quixun 'unánquin sináncëxa.

<sup>5</sup>Usa 'ain ca Timoteobëa Silas Macedonianuax Corintonu bëban Pablonën bëtsi ñu mëëti 'aquinma Jesús ñui quicë banaishi ñuixuancëxa. Ñuixuanan ca judíos unicama, Jesús ax ca aséribi Cristo axa utia atun cañcë a 'icë quixun upí oquin ñuixuancëxa. <sup>6</sup>Cacëxbi ca aín bana timanan ami 'atimati banai ami nishacëxa. Usaía 'ia ca Pablonën anuax ca cuania quixuan atun 'unánun aín chupa tacaquin cacëxa:

—Mitsúxbi 'iisama tani camina Nucën Papa Diosnan 'itima 'ain. Usaími 'icëxbi

ca 'ën 'uchama 'icën. Mitsúnmi ënë bana cuaisama tancëbëtan cana judíosma unicama ñuixuni cuanin.

<sup>7</sup>Catancëx anua judíos unicama timéti xubunuax chiquíquiani ca judíosma 'ixunbia an Nucën Papa Dios rabiçë, Justo cacë uni, aín xubunu cuancëxa, axa anua judíos unicama timéti xubu rapasu 'ain.

<sup>8</sup>Usa 'ain ca anua judíos unicama timéti xubunu 'icë 'apu, Crispo, abë aín xubunu 'icë aín ainti 'ibucamaxribi ami sinani Nucën 'Ibu Jesúsmi catamëacëxa. Usai 'imainun ca Pablonëan bana ñuixunia cuati, 'aisamaira Corintonu 'icë unicamaxribi ami sinani Nucën 'Ibu Jesúsmi cataméti nashimicë 'iacëxa. <sup>9,10</sup>Usa 'ain ca Pablonën namáquin cuacësa oquin ësaquian Nucën 'Ibu Jesusan cacëxun imé cuacëxa:

—'Ë cana mibë 'ain. Usa 'ain ca uinu 'icë unínbi mi paë tanmiquin mëëtima 'icën. Ënë ëmanuax ca 'aisamaira uni 'ënan 'iti 'icën. Usa 'ain camina racuéquin ënquinma 'ën bana ñuixunti 'ain.

<sup>11</sup>Usaquian cacëxun ca Pablonën achúshi bari 'imainun męcën achúshi 'imainun achúshi 'uxë Corintonu 'iquin unicama Nucën Papa Diosan bana ñuixuancëxa.

<sup>12</sup>Usaquian ñuixuncëbëbi ca Galión, axa Acaya menu 'icë unicaman 'apu 'ain, judíos unicamax Pablomi nishi tsuáquiruacëxa. Tsuáquiruquin bëbianquin ca an uníxa unimi manania cuacë unicama timécë anu buáncëxa. <sup>13</sup>Buánxun ca Galión 'imainun abë 'icë unicama cacëxa:

—Ënë unin ca usai judíos unicama 'iti Moisésnën cuënëo bana quicësama oquin Nucën Papa Dios rabinun quixun unicama caia.

<sup>14</sup>Quixuan cacëbëa Pablo quicascëbë tanbi ca Galiónën judíos unicama cacëxa:

—Ēnē uníxa ñu 'aisama 'acē 'ianan uni 'acē 'ain cuni cana mitsúnmi a ñuiquin cacēxun cuatsian. <sup>15</sup>Aínbi ca an mitsun cuati banaishi ñuixunquin, usai ca quia quixun ñuixunia. Usa 'ain camina mitsúnbi mēníoti 'ain. 'Ēn cana ěnē ñu mitsu mēníoxuntima 'ain.

<sup>16</sup>Usaquin catancēxun ca Galiónēn axa Pablomi manáncē unicama a cuantánun quixun cacēxa. <sup>17</sup>Cacēx cuanquinbi ca anua judíos unicama timéti xubunu 'icē 'apu, Sóstenes, a bixun mēēcancēxa. Usoia isquinbi ca Galionēn caquinma isēshiacēxa.

### **Antioquíanu cuantēcēntancēxa Pablo amiribishi mecama oi cuantēcēan (18.18-21.26)**

<sup>18</sup>Usocēx 'itsa nētēn pain Corintonu 'itancēx ca Pablo Siria menu cuanti sinani axa Jesucristomi catamēcē unicama —cana cuanin —cabiani, Priscila 'imainun Aquilabē manē nuntin cuancēxa. Cuanx Cencrea ěmanu bēbaxun ca Pablonēn, —'ěn Nucēn Papa Dios cacēsabi oi 'i cana sēnēni —quixun sinánquin aín bu tēamiacēxa. <sup>19</sup>Tēamitancēx cuanx ca Efeso ěmanu bēbacēxa. Bēbax Priscila 'imainun Aquila ěbiani cuanx anua judíos unicama timéti xubunu atsíanx ca anuax Pablo anua timécē judíos unicamabē banai atubē usai Jesús 'iti ñuiquin Nucēn Papa Diosan bana cuēñēo ñui canancēxa. <sup>20</sup>Usaía 'ia judíos unicaman atubēa 'inun cacēxbi ca Pablo anu 'iáma 'icēn. <sup>21</sup>Abē 'iquinma ěbianquin ca atu cacēxa: —Judíos unicama anun timéti nētē sēnécēbē atubē Jerusalénu 'itancēx cana Nucēn Papa Dios cuēñécēbē mitsu isi utēcēnti 'ain.

Quixun cabiani ca Efesonuax cuancēxa. <sup>22</sup>Cuanx Cesárea ěmanu bēbax ca nuntinuax 'ibúquiani taēn Jerusalénu cuancēxa. Cuanx bēbaxun

atu istancēxun axa Jesucristomi catamēcē unicama —cuanmainun ca 'it —cabiani ca Antioquíanu cuancēxa.

<sup>23</sup>Antioquíanu 'ěora pain 'itancēx ca Galacia menu 'icē ěma 'imainun Frigia menu 'icē ěmacama oi cuanquin Pablonēn axa Jesucristomi catamēcē unicama upiti Jesucristomi sinani ax cuēñécēsabi oi 'inun quixun caquin atu 'ēsēacēxa.

### **Efesonuxuan Apolosnēn bana ñuixuan**

<sup>24</sup>Pablonēan Galacia menu cuanan Frigia menuribi cuanquin axa Jesucristomi catamēcē unicama 'ēsēmainun ca Alejandría ěmanu 'icē judíos uni achúshi, Apolo, ax Efeso ěmanu cuanx anu 'iacēxa. Ax ca an Nucēn Papa Diosan bana cuēñēo upí oquin 'unáncē 'aish unicama upí oquin bana ñuixuncē 'iacēxa. <sup>25</sup>Nucēn 'Ibu Jesús ñuixunquian 'unánmicancē 'ixun ca Apólósnēn cuēñēi banaquin, Jesús ñuiquin, upí oquin Efesonu 'icē unicama ñuixuancēxa. Usaquin Jesús ñuiquin bana ñuixuanan, —aín 'uchacama chiquinatia ca Juanēn uni nashimiacēxa —quixun 'unánquinbi ca Apolosnēn —Jesucristonēn ca aín Bēru Ñunshin Upí aín unicama abéa 'inun 'inania —quixun 'unánma 'icēn.

<sup>26</sup>Uşa 'ain ca anua judíos unicama timéti xubunuxun Apolosnēn racuéquinma bana ñuixunia cuaquin ca Aquilabētan Priscilanēn 'uri buánxun Apolos, Jesúsmi cataméti ca uni usai 'ia quixun upí oquinra ñuixuancēxa. <sup>27</sup>Usa 'ain ca Acaya menua Apolos cuainsa tancēbētan axa Jesucristomi catamēcē unicaman —asábi ca —catancēxun atuan upí oquin Apolo binun quixun caquin axa Acayanuax Jesucristomi catamēcē unicama quirica cuēñēoxuancēxa. Cuēñēoxunia quirica bibiani manē nuntin cuanx Acayanu bēbatancēxun ca Apolosnēn anua 'icē a Nucēn Papa

Diosan nuibaquin Jesúsmi sinánmicë unicama upí oquin 'aquiancëxa.

<sup>28</sup>'Aquianan ca unicaman cuamainun —Cristo ca ucëma 'icë —quixuan sinaniabi abë banaquin judíos unicama, Jesús ax ca asérabi Cristo, axa utia atun caíncë a 'icë quixun canan usai ca Cristo 'iti 'icë quiax ca Nucën Papa Diosan bana cuënëo quia quixun 'unánmiacëxa.

### Pablo Efesonu 'ia

**19** <sup>1</sup>Corinto ëmanua Apolos 'ain ca Pablo matá me sapáncama oi cuantancëx Efesonu bëbacëxa. Bëbaxun ca anu 'icë axa Jesucristomi sináncë unicama mëracëxa. <sup>2</sup>Mëraxun ca ñucácëxa:

—¿Mitsúxmi Jesucristomi sináncëbë cara aín Bëru Ñunshin Upí mitsunu uax?

Quixuan ñucácëxun ca cacëxa:

—Nun cananuna Jesucristomi catamëti ca uni aín Bëru Ñunshin Upíñu 'ia quixun ñuia cuacëma 'ain.

<sup>3</sup>Usaía quia ca Pablonën atu cacëxa:

—¿Añu sinani caramina nashimicë 'ian?

Cacëxun ca cacëxa:

—Juanëan uni 'unánmicë bana sinani cananuna nashimicë 'ian.

<sup>4</sup>Cacëxun ca Pablonën cacëxa:

—'Atimaquin sináncë 'ixunbia sinanatia ca Juanën uni nashimiacëxa. Nashimiquin ca cacëxa, axa a caxu uti uni achúshi, Jesús, axa utia judíos unicaman caíncë, Cristo, ami sinánun quixun.

<sup>5</sup>Usaía Pablo quia cuati ca Nucën 'Ibu Jesúsmi catamëti a unicamax nashimicë 'iacëxa. <sup>6</sup>Usa 'ain ca a unicama Pablonën aín mëcënan ramécëbë atunu Nucën Papa Diosan Bëru Ñunshin Upí uacëxa. Usaría 'icëbë unin 'unáncëma banan bananan ca a unicaman, usaquian Nucën Papa Diosan sinánmicë

bana unicama ñuixuancëxa. <sup>7</sup>Anu 'icë uni nashimicëcama ax ca mëcën rabé 'imainun rabé unisa 'iacëxa.

<sup>8</sup>Usa 'ain ca Pablonën anu rabé 'imainun achúshi 'uxë 'iquin, anua judíos unicama timéti xubunuxun racuéquinma upí oquin Jesús ñuiquin bana ñuixuancëxa. Ñuixunquin ca, Jesucristomi catamëti ca uni Nucën Papa Diosan 'iti 'icë quixuan 'unánun anu 'icë unicama ñuixuancëxa. <sup>9</sup>Ñuixuniabi ca rafrinën masáquin sinánquin cuaisama tancëxa. Usaquin cuaisama tani ca anu timécë unicaman cuamainunbi —Jesúsmi sinánti ca 'aisama 'icë —quiax quiacëxa. Usai quicëbë, anuax chiquíquianquin ca Pablonën axa Jesucristomi catamécë unicama buani, Tirano cacë unían anuxun uni 'unánmicë xubu, anu cuancëxa. Cuanxun ca anuxun camabi nëtën bana ñuixuancëxa. <sup>10</sup>Usaquin ca Pablonën rabé barin anuxun bana ñuixuancëxa. Pablonëan usaquin ñuixuncëxun ca Asianu 'icë unicama, judíos unicama 'imainun judíosma unicamanribi Nucën 'Ibu Jesús ñuiquian ñuixuncë bana cuacëxa. <sup>11</sup>Cuacëbëtan ca Pablonën anuxun Nucën Papa Diosan 'amicëxun uni itsin 'acëma ñu 'acëxa. <sup>12</sup>Usa 'ain ca amia Pablo ratíquicë chupa 'imainun pañun abia anu buania mëi uni ñucëcamax pëxcúacëxa, pëxcúmainun ca ñunshin 'atimacamaxribi uninuax chiquíacëxa.

<sup>13</sup>Nucën Papa Diosan 'amicëxuan Pablonën usoquin 'aia istancëxun ca an cuaínbëquini niqin uninua ñunshin 'atima chiquíncë judíos unicama rafrinën, Nucën Papa Diosan 'amicëxuan Pablonën 'acësaribi oquin 'ati sináncëxa. Usaquin sinánquin ca uninu 'icë ñunshin 'atima cacëxa:

—Pablonëan unicama ñuixuncë Jesús an 'amicëxun cana mi cain, ënë uninuax ca chiquit —quixun.

<sup>14</sup>Usaquian an ñu 'acë uni raírinëx ca judíos sacerdotenën cushicama achúshi, Esceva cacë, aín bëchicë mëcën achúshi 'imainun rabé 'iacëxa. <sup>15</sup>Usa 'ixuan cacëxunbi ca ñunshin 'atimanën Escevanën bëchicëcama cacëxa:

—Jesús 'imainun cana Pabloribi 'unan. Usa 'ixunbi cana ui caramina 'ai quixun mitsu 'unaniman.

<sup>16</sup>Quixun cai chirínquianx anu 'iruquin ca ñunshin 'atimañu uni an cupinunma atu mëëacëxa. Mëëquian cushíinra mëëcëx ca chupañuma 'aish aín nami téátéabu 'aish xubunuax chiquiti abácëxa. <sup>17</sup>Usoquian 'acëa ñuia ca Efesonu 'icë judíos unicama 'imainun judíosma unicamanribi cuacëxa. Cuati racuéquin ca:

—Nucën 'Ibu Jesús, ax ca cushiira 'icë —quiquin a rabiacëxa.

<sup>18</sup>Usaía 'icëbë uxun ca axa Jesúsmi catamëcë 'itsa unin —usaribi oquin cana 'ën ñu 'atima 'acë —quixun chiquina-cëxa. <sup>19</sup>Usomainun ca an ñubéti 'unáncë unicaman anua ñubéti 'unáncë quiricacama bëxun, camabi unían ismainun nëëancëxa. Usa 'ain ca a quiricacaman cupí cincuenta mil curíquisa 'iacëxa. <sup>20</sup>Usaría 'imainun ca a ñuiquin bana ñuia cuati Jesucristomi catamëti unicamax amiribi amiribi 'itsacëxa.

<sup>21</sup>Usa 'ain ca Pablonën Macedonia me 'imainun Acaya menu pain cuantancëx Jerusalénu cuanti sináncëxa. Jerusalénu cuanti sinani ca quiacëxa: Anu pain 'itancëx cana Roma émanuribi cuanti 'ain. <sup>22</sup>Usaquin sinánxun ca Pablonën an 'aquincë uni rabé, Timoteo 'imainun Erasto, a Macedonia menua cuantánun xuacëxa. Xutancëx ca Asia menua 'icë ëma Efeso, anu 'ëora pain í bëruacëxa.

#### Efesonu 'icë unicamaxa tsuáquirua

<sup>23</sup>Efesonuaxa Pablo cuancëma pan 'ain ca Jesucristo ñuicë bana cuaisama

tani, a émanu 'icë unicamax tsuáquiruacëxa. <sup>24</sup>Usaía 'inun ca Demetrio, an uxua manë unioquin ñu chucúmarama 'ati 'unáncë, an tsuáquirumiacëxa. Demetrio an anuxun diosa Artemisa cacë rabiti xubu iscësa 'ítánun chamaburatsu oquin manë uxua unioçëxa. Unioxun maruquin ca a 'imainun abëtan ñu 'acë unicamanribi 'itsaira curíqui biacëxa. <sup>25</sup>Demetronën ca abëtan usoquin 'acë unicama 'imainun anribia usaribi oquin ñu 'acë unicamaxa, an camicëx timëtia cacëxa:

—Mitsun camina 'unanin, ënë ñu ësoquin 'atancëxun maruquin cananuna anun nun ñu maruti curíqui bitsin.

<sup>26</sup>Usa 'ainbi camina mitsun Pablo isanan an ñuicë banaribi cuatin. An ca Efeso émanushima, Asia menu 'icë émacama oquin, unían a rabinuxun 'acë ñu ax ca aséhabi diosma 'icë quixun caquin, a rabixunma 'anun caquin 'aisamaira uni sinánmiaxa. <sup>27</sup>Usoquian sinánmicëxun ca unin nun nu unioçë uxua manë 'acë xuburatsu bitima 'icën. 'Imainun ca Diananëxa cushi 'ainbi unicaman anuxuan a rabicë xubu cha manuti 'icën. Diana axa Asianu 'icë unicama 'imainun camabi menu 'icë unicaman rabicë 'aishbi ca rabicëma 'iti 'icën.

<sup>28</sup>Usai Demetrio quia cuati ca nishi sharati tsuáquirui quicancëxa:

—Cushiira ca Diana 'icën. Efesonu 'icë unicaman rabicë diosa ca Diana 'icën.

<sup>29</sup>Usari quicëbë ca Efeso émanu 'icë unicama sharati tsuáquiruacëxa. Tsuáquiruquin Macedonia menu 'icë uni rabé, Gayo 'imainun Aristarco, axa Pablobë nicë, a bixun nirínbianx ca anua unicama timéçë xubunu abáquianx atsíancëxa. <sup>30</sup>Atsíncëbëa anu 'icë unicama cai axribi atsíntisa taniabi ca axa Jesucristomi catamëcë unicaman —miribima bitsia atsíanxma ca 'it —quixun Pablo cacëxa. <sup>31</sup>Camainun ca

an 'unáncë Asia menu 'icë 'apu raírinën-  
ribi anu timécanti xubunu atsiánxma  
'inun quixun Pablo camiacëxa. <sup>32</sup>Usa  
'ain ca axa timécë unicamax tsuáquirui,  
raírinëxa bëtsi ñu ñui quimainun  
raírinëxribi bëtsi ñu ñui banai  
sharácëxa. Sharáquinbi ca aín patsanën  
añu 'anux cara timéaxa quixun 'unánma  
'icën. <sup>33</sup>Pablomia 'icësaribiti ca anua  
timécë unicamax anua atubë 'icë judíos  
unicamamiribi nishacëxa. Usaía ami  
nishcëxun ca judíos unicama an  
Alejandro, uisai 'i cara timéaxa quixun  
an anua timécë unicama canun quixun  
cacëxa. Cacëxun ca Alejandronën aín  
mécënan sanánquin aín bana cuanun  
quixun cacëxa. <sup>34</sup>Cacëxbi ca —ax ca  
judío uni 'icë —quixun 'unani nētētima  
rabé horan pain munuma sharati  
quicancëxa:

—Cushiira ca Diana 'icën. Efesonu 'icë  
unicaman rabicë diosa ca Diana 'icën.

<sup>35</sup>Usa 'ain ca sharatia nēténun cacëxbi  
nētētisama taniabi an 'apu quirica  
cuñëoxuncë unin nētémíacëxa.  
Nētémia ca cacëxa:

—Efesonu 'icë unicama, 'ën mitsu  
camainun ca cuat. Ënë ëmanu 'icë  
unicamax ca an anuxun Diana rabiti  
xubu bërúanan a iscësa maxax naínuax  
nipacëcë bërúancë 'icën. Usa ca quixun  
ca camabi menu 'icë unicaman 'unánxa.  
<sup>36</sup>Usa 'ain ca, usama ca quíax uíxbi  
quitima 'icën. Usa 'ain camina nētéti  
'ain. Nētéanan camina sinánxunmaishi  
ñu 'atima 'ain. <sup>37</sup>Mitsúnmi bëcë uni  
rabëtax ca mitsun rabicë diosa ñui  
'atimati banacëma 'icën. <sup>38</sup>Usa 'afnbi ca  
Demetrio 'imainun an abëtan uxua  
manë 'acë ñu 'acë unicaman, unimi  
manántisa tanquin, an uníxa uni itsimi  
manania cuacë unicama cati 'icën.  
Canan ca 'apu raíriribi cati 'icën.  
Cacëbëtanbi ca Demetrio 'imainun abë  
'icë unicamaxa ami manáncë unicaman-

ribi, an uníxa uni itsimi manania cuacë  
unicama cati 'icën. <sup>39</sup>Usa 'ain camina  
bëtsi ñuribi mënóisa tanquin anúan  
'apucama timéti nētën anu timécë  
unicaman cuamainun cati 'ain. <sup>40</sup>Uisai 'i  
caranuna sharati quixun ñucácancëxun  
a ñuiquin cati ca 'aíma 'icën. Usa 'ain ca  
'apumi nishínu 'icësa sináncanti 'icën.

<sup>41</sup>Usaquin catancëxun ca timécë  
unicama cuantánun quixun xuacëxa.

#### Macedonia me 'imainun Grecia menu Pablo cuan

**20** <sup>1</sup>Usaquin cacëxa cuancëbëtan ca  
Pablonën axa Jesucristomi  
catamécë unicama camicëx aia 'esëanan  
bana ñuixuntancëxun —cuanmainun ca  
'ican —quixun atu cabiani Macedonia  
menu cuancëxa. <sup>2</sup>Cuanquin ca a menua  
'icë ëmacamanua 'icë axa Jesucristomi  
catamécë unicama, ëníma Jesúsmi  
cataménun quixun caquin sinánmiacëxa.  
Sinánmibiani ca Grecia 'icëbi Acayaribi  
cacë menu cuancëxa. <sup>3</sup>Cuanx bëbax ca  
anu rabé 'imainun achúshi 'uxë 'iacëxa.  
Anu 'aish ca manë nuntin Siria menu  
cuanti sinánquinbi, judíos unicamaxa  
ami 'esënanía ñuia cuati sinanacëxa.  
Sinanabiani ca Macedonia anu pain bain  
cuancëxa. <sup>4</sup>Cuancëbë ca Berea ëmanu  
'icë uni, Sópater, a 'imainun Tesalónica  
ëmanu 'icë uni rabé, Aristarco 'imainun  
Segundo, 'imainun Derbe ëmanu 'icë uni,  
Gayo, 'imainun Asia menu 'icë unicama,  
Tímoteo, Tíquico, Trófimo, acamax  
Pablobë cuancëxa. <sup>5</sup>Cuanx Macedonia  
menu bëbacëbë ca atux pain Troas  
ëmanuxun nu caini cuani nu ëbiani  
rëcuénuquancëxa. <sup>6</sup>Usa 'ain cananuna  
anun chamiti ñucëñunma 'acë pán anun  
piti nētë inúmitancëx, nuxribi  
Filiposnuax manë nuntin cuanx, mecën  
achúshi nētë 'icëbë Troasnu bëbacën.  
Bëbax cananuna mecën achúshi  
'imainun rabé nētë anu 'iacën.

### Troas ëmanu Pablo 'ia

<sup>7</sup>Anu 'aish cananuna domingo nëtën axa Jesucristomi catamëcë unicamabë pán tucapaxun pi timéacën. Timéan ca Pablonën, imëishinu cuanti 'ain, ñantón-paquin 'uran bana ñuixuancëxa.

Usoquin ca imé naëx 'itámainun 'acëxa.

<sup>8</sup>Usoquin ca Pablonën xubu cata itsi manáinra 'icë, anua lamparín 'itsaira tiríocë 'icë anunu timécë, anuxun bana ñuixuancëxa. <sup>9</sup>Usaquian Pablonën manámi 'icë xubu cata rabé 'imainun achúshi, anuxun bana ñuixuncëbëbi ca bënë uni achúshi, Eutico cacë, ax xubu manámia 'icë xëcuë anu tsotax, 'uxcënan ténancëx 'uxax ëman nipacëacëxa. Nipacëtía bamaia ca bicancëxa.

<sup>10</sup>Bicëbë xubunuax 'ibúquianquin bënë uni 'icúquin bitsi rantin purúnquin ca Pablonën anua 'icë unicama cacëxa: —Ratúaxma ca 'ican, ca uinacëtía.

<sup>11</sup>Catancëx manan 'irutécënxun, pán tucapaxun pianan pëcaratamainun bana ñuixunëti, ca Pablo atu ëbiani cuancëxa.

<sup>12</sup>Cuancëbë ca bënë uni Eutico axa chuáma 'aish asábi 'icë buani cuëenquiani cuancancëxa.

### Troasnuaxa Pablo Miletonu cuan

<sup>13</sup>Usa 'ain cananuna Pablonëan taën cuainsa tanquin, anua bitsi cuanun cacëx, nux pain rëcuëenquiani manë nuntin Asón cacë ëmanu cuancën.

<sup>14</sup>Cuanx bëbaquin Asónua Pablo bibiani cananuna abë nuntin Mitilene cacë ëmanu cuancën. <sup>15</sup>Mitilenuax coonx cananuna Quíó cacë nasí rapasu bëbacën. Bëbax anuax coonx cananuna Samos cacë nasínu bëbacën. Bëbatancëx cananuna anu 'icë ëma Trogilio anuax pain tantiacën. Tanti anu 'inëti cuanx cananuna Mileto cacë ëmanu bëbacën.

<sup>16</sup>Anuxun ca Pablonën Pentecostés cacë nëtë 'iisama pain 'ain Jerusalénu bëbati

sinánquin 'uran Asia menu 'iisama tanquin, Efeso ëma 'urama 'aínbi anu cuantima sináncëxa.

### Efesonuaxa ax Jesucristomi catamëcë unin cushicama Pablonën bana ñuixuan

<sup>17</sup>Usaquin sinánxun ca Miletonuxunbi Efesonua 'icë axa Jesucristomi catamëcë unin cushicamaxa anu unun quixun Pablonën camiacëxa. <sup>18</sup>Camicëx aia ca cacëxa:

—Asia menu utancëx carana mitsubë 'aish uisai 'ëx 'ia quixun camina mitsun 'unanin. <sup>19</sup>'Ëx mitsubë 'ixun cana mitsúnmi 'ë rabiti sinánquinma axa cuëencësabi oi 'iquin Nucën 'Ibu Jesucristo ñuiquin uni bana ñuixuan. Usoquin 'ai cana bëunan mëscúanan judíos unicaman 'ë bëtsi bëtsi ocëx 'aisamaira tëmëran. <sup>20</sup>Usai 'iquinbi cana ënquinma uisai caramina Nucën Papa Dios cuëencësabi oi 'inux upí 'iti 'ai quixun racuëquinma mitsu bana ñuixuan. Usaquin nëtéquinma mitsúxmi timécë ñuixuanan cana mitsun xubucamanuxunribi mitsu bana ñuixuan.

<sup>21</sup>Ñuixunquin cana judíos unicama 'imainun judíosma unicamaribi Nucën Papa Dios cuëencësa oi 'inux sinanatía Nucën 'Ibu Jesucristomi catamënun quixun can. <sup>22</sup>Usa 'ain cana Nucën Papa Diosan Bëru Ñunshin Upitan sinánmicë sabi oi Jerusalénu cuanin, uisai carana anuax 'iti 'ai quixun 'unanimabi. <sup>23</sup>An 'unánmicëxun cana 'unanin, uinu 'icë ëmanu carana cuani anuxun ca Nucën Papa Diosan Bëru Ñunshin Upitan 'ë caia, anuax cana sipuocancë 'ianan unían 'atimocëxun 'aisamaira oquin tëmëranuxun 'ai quixun. <sup>24</sup>Usaquian 'unánmicëxbi cana 'ëx uisai carana 'iti 'ai quixun sinani bënëtiman. Bamanuxunbi Nucën 'Ibu Jesusan cacësabi oquin 'ai cuëenquin sënëonti cana cuëënin, Nucën Papa Diosan ca

nuiباقuin unicama ainan 'inun iémisa tania quixuan camabi unin 'unanún.

<sup>25</sup>Usaquin sinánquinbi cana 'unanin, uicama carana Nucén Papa Diosan uni 'inun bana ñuixuan acaman ca 'è istécènxunma 'aia quixun.

<sup>26,27</sup>Mitsúnmi 'è istécèncèxunmabi cana èsoquin mitsu cain, uisai cara Jesucristo cupí aín unicamax, an mënófabi oi 'iti 'icè quixuan Nucén Papa Diosan 'è 'unánmicè, acama ñuiquin cana mitsuishima camabi èmanu 'icè unicamaribi ñuixuan. Usa 'ain ca 'èn Jesucristo ñuiquin bana ñuixunia cuatibia ami catamécema 'ain 'èn 'uchama 'icèn. <sup>28</sup>Usa 'ain camina mitsun mina ñu 'aisama 'ai bérúancati 'ain.

Bérúancan camina axa Jesucristomi catamécè unicamaribia upí 'inun bérúanti 'ain. Nucén Papa Diosan Bèru Ñunshin Upitan ca usoquinmi axa Jesucristomi catamécè unicama bérúanun mitsu 'imi axa. A unicamax ca axa bana cupí Nucén 'Ibu Jesucristomi catamécè 'aish aín uni 'icèn. <sup>29</sup>Èn cana 'unanin, 'èx cuancèbè ca uni raíri uti 'icèn. Uxun ca axa ami sináncè unicama, Jesucristomi catamèti bana a ènun quixun paránti 'icèn. 'Inúanèan bètsi biquin carnero tsuácacésaribi oquin ca a unin axa ami sináncè unicama Jesús manunun quixun parántisa tanti 'icèn. <sup>30</sup>Èsaquinribi cana 'unanin, axa Jesucristomi catamécè unicamabè timécè unicama bètsi bètsin ca Nucén Papa Dios cuèèncésabi oquin ñuixunquinma, cémè bana ñuixunti 'icèn, a bana quicésabi oi isa 'inun quixun. <sup>31</sup>Usa 'ain camina unin paráncema 'inun upí oquin sináinrati 'ain. Camina sinánti 'ain, rabé 'imainun achúshi barin cana ñantánbi nèténbi nètéquinma bèunan mescúquin mitsu 'éséan.

<sup>32</sup>Béri cana an bérúanun Nucén Papa Dios mitsu ñucáxunin. An ca nuiباقuin

mitsu ami cushinun 'imianan axa ami sináncè unicama 'imicésaribi oquin aséfabi ainan 'aíshmi ax cuèèncésa oíshi 'inun mitsu 'imiti 'icèn. <sup>33</sup>Èn cana curíqui ñucánan chupa uibi ñucácema 'ain. <sup>34</sup>Mitsúnbi camina 'unanin, 'èn mécènanbi ñu mèèxun cana 'èn piti 'imainun 'èn chupa bianan 'èx abè 'icècamaribi bixúan. <sup>35</sup>Usaquin ñu mèècè 'ixun cana mitsu 'unánmia, mitsúnribimi usoquin 'anun, ñuñuma uni ñu 'inánuxun. Usaquin 'ati sinani ca Nucén 'Ibu Jesús èsai quiacèxa: "A unin ñu 'ináncè uni ax cuèèncésamaira oi ca an uni ñu 'ináncè uni ax cuèènia". A bana camina manuquinma sinánti 'ain.

<sup>36</sup>Èsaquin catancèx ca Pablo rantin puruni tsóbuti anu 'icè unicamabè Nucén Papa Diosbè banacèxa. <sup>37,38</sup>Banai sènénia ca —'è camina istécènxunma 'ai —quia oi camáxbi masá nuituti abè 'icúcanani bèunan mescúquin bérúanxa cuanun caquin manè nuntinu 'irumiquin Pablo buáncèxa.

### Jerusalénu Pablo cuan

**21** <sup>1</sup>Buáncèx 'iruax Efesonu 'icè unicama èbiani cuanx cananuna Cos cacè nasínu cuancèn. Anuax coonx cananuna Rodas cacè nasínu cuanx, anuaxribi Pátara cacè èmanu bèbacèn. <sup>2</sup>Bèbaxun cananuna anua axa manè nuntin Fenicia menu cuanti uni raíri mèracèn. Mèrax cananuna a nuntin atubè cuancèn. <sup>3</sup>Cuanxun Chipre nasía mèmíu 'icè inubiani cananuna Siria menu cuancèn. Cuanx cananuna anu 'icè unicaman buáncè aín ñucama a nanpáxunti cupí Tiro èmanu cuancèn. <sup>4</sup>Usai Tironu bèbaxun, axa Jesucristomi catamécè unicama mèrax, cananuna mécèn achúshi 'imainun rabé nètèn atubè anu 'iacèn. Nuxnu anu 'ain ca Nucén Papa Diosan Bèru Ñunshin Upitan sinánmicèxun a unicaman uisai

cara Pablo 'iti 'icë quixun 'unánquin Jerusalénu cuanxma 'inun quixun cacëxa. <sup>5</sup>Usaquian cacëbëbi cananuna a nëtëcama inúcëbë cuancën. A ëmanuax cuancëbë ca axa Jesucristomi catamëcë unicamax aín xanu 'imainun aín bëchicë bëbi nubë masinu cuancëxa. Cuanx cananuna rantin puruni tsóbuax masinuax Nucën Papa Diosbë banacën. <sup>6</sup>Usai 'itancëxun atubë 'icucananquin —cuanmainun ca bëruanax 'ican —quixun atu cai cananuna manë nuntinu 'irucacën. 'Irucëbë ca a unicamax aín 'icënu cuantëcëancëxa.

<sup>7</sup>Anuax cuanx cananuna Tolemaida ëmanu cuancën. Cuanx bëbaxun axa Jesucristomi catamëcë unicama catancëx cananuna achúshi nëtën atubë 'iacën. <sup>8</sup>Anuax pëcaratëcëncëbë cuanx cananuna Cesárea ëmanu bëbacën. Bëbax cananuna Filipenën xubunu abë 'i cuancën. Felipe ax ca an Jesús ñuiquin unicama bana ñuixuncë 'ianan mëcën achúshi 'imainuan rabé uni Jerusalénuxun an piti mëticanun caíscan acama achúshi 'iacëxa. A Felipebë cananuna 'iacën. <sup>9</sup>Aín bëchicë ca rabé 'imainun rabé xanu bënëñuma 'iacëxa. A xanucaman ca Nucën Papa Diosan sinánmicëxun bana uni ñuixuancëxa.

<sup>10</sup>Anu 'itsa nëtë 'icëbë ca an Nucën Papa Diosan sinánmicëxun bana uni ñuixuncë uni achúshi Agabo cacë, ax Judea menuax bëbacëxa. <sup>11</sup>Bëbax nu isi uxun anun Pablo tsitëcërëquicë, a bíax anun tanëacanan anun mëñëacati ca quiacëxa:

—Nucën Papa Diosan Bëru Ñunshin Upí ca ësari quia: Ënën 'ibu ca ësaribi oquin nëaxun Jerusalénu 'icë judíos unicaman judíosma unían binun 'inánti 'icën.

<sup>12</sup>Ësaría Agabo quia cuaquin ca nubëtan Cesárea nu 'icë unicamanribi,

Jerusalénu cuanxma 'inun quixun Pablo cacëxa. <sup>13</sup>Cacëxbi ca Pablo quiacëxa:

—¿Añu cupí caramina usai banai bëunan mëscúquin 'ë masá nuitumin? Jerusalénuxuan Nucën 'Ibu Jesúsnan cupí 'ë nëacancëxbi cana bënëtima 'ain. Usoquin nëanan 'ë 'acancëxbi cana asábi 'iti 'ain.

<sup>14</sup>Usai quia Jerusalénu cuancatsi quia cananuna Pablo sinanamiasmascën. Usa 'ain cananuna quiacën:

—Nucën 'Ibu Dios cuëncësabi oi ca 'iti 'icën.

<sup>15</sup>Usa 'ain cananuna ñu mëñóbiani Cesárea nuax Jerusalénu cuancën.

<sup>16</sup>Cuancëbë ca nubë Cesárea nuax ax Jesucristomi catamëcë unicama raíri cuancëxa. Acaman ca Chiprenuax ucë uni Mnasón, axa 'itsa baritian Jesucristomi catamëcë, a 'unáncë 'ixun aín xubunu anunu 'inun nu buáncëxa.

#### Pablo Jacobo isi cuan

<sup>17</sup>Usa 'ain ca Jerusalénu bëbaia axa Jesucristomi catamëcë unicaman cuëenquin nu biacëxa. <sup>18</sup>Usaquian bicëx 'inëti cananuna pëcaracëbë Pablobë Jacobo isi cuancën. Abë ca axa Jesucristomi catamëcë unicaman cushicamaribi 'iacëxa. <sup>19</sup>Icë —¿uisa caina 'ai?

—quixun catancëx atubë banaquin ca Pablonën uisaira oquin cara Nucën Papa Diosan 'amicëxun, anua judíosma unicama 'icë ëmacamanuxun ñu 'axa quixun ñuixuancëxa.

<sup>20</sup>Usaquian Pablonën ñuixuncëxun ca —asábi ca —quixun caquin Nucën Papa Dios rabiacëxa. Rabitancëxun ca Pablo ësaquin cacëxa:

—Asábi ca. Usa 'ainbi camina 'unanin, 'aisamaira judíos unicamax ca Jesúsmi sinánxa. Sinánxunbi ca ësaquinribi sinania, Moisésnëan usai judíos unicama 'iti cuëñëo bana quicësabi oi cananuna 'iti 'ai quixun. <sup>21</sup>A unicamax ca quia,



min isamina bëtsi bëtsi menua judíos unicama, Moisésnën usai judíos unicama 'iti cuënëo bana quicësabi oi 'iaxma 'inun quixun can. Canan isamina judíos unicaman 'acësaribi oquin bëbu tuá 'unántioxunma 'anun quixunribi can. <sup>22</sup>An usa bana cuacë unicamax ca mi ucë cuati timéti 'icën. ¿Usa 'ain caramina uisai 'iti 'ain? <sup>23</sup>Nun ësaquin cacësabi oquin camina 'ati 'ain. Ënu ca rabé 'imainun rabé judíos uni, an Nucën Papa Dios cacësabi oi 'i sënénquian aín bu tëamitishi 'icën. <sup>24</sup>Ënë uni buani camina abë judíos uni 'icësaribiti 'inun mixribi nashi mëníocati 'ain. Mëníocanan camina a unicamaxa Moisésnën cuënëo bana usai 'iti quicësabi oi 'ianan aín bu tëacë 'inun cupífoquin mëníocamiti 'ain. Mínmí usoia isquin ca judíos unicaman 'unánti 'icën, mix camina Moisésnën usai judíos unicama 'iti cuënëo bana quicësabi oi 'i quixun. 'Unánan ca mimia manáncë bana ax ca cëmë 'icë quixun 'unánti 'icën. <sup>25</sup>Mixmi judío uni 'aish usai judíos unicama 'iti bana quicësabi oi 'iti 'aínbi ca nun sináncëx judíosma unicamax usai 'itima asábi 'icën. Usaquin sinánquin cananuna ësaquin 'axun acama quirica buánmian: Judíos unicama usai 'iti banacama quicësa oquin 'aquinma camina ësaquinshi 'ati 'ain, unínbia unioçë ñu rabiquian 'acë ñuina camina pitima 'ain, 'imainun camina ñuina imi pitima 'ain, 'imainun camina têtsécacë ñuina pitima 'ain, 'imainun ca bëtsi xanubë 'ima uni aín xanubëishi 'iti 'icën.

### **Roma ëmanua Pablo cuan ñuicë bana (21.27-28.31)**

#### **Anuxun Nucën Papa Dios rabiti xubunuxun Pablo bican**

<sup>26</sup>Usaquian abëa 'icëcamabëtan Jacobonën cacësabi oquin, rabé

'imainun rabé uni a buonx ca Pablo judíos unicama 'icësaribiti nashi abë mëníocacëxa. Mëníocanan ca uisa nëtën cara anun mëníocati nëtë sënénti 'icë quixun canan uisa nëtën cara Nucën Papa Dios rabiquin ñuina rëti 'icë quixun anu 'icë sacerdotebëtan mëníoi anuxun Nucën Papa Dios rabiti xubunu cuancëxa.

<sup>27</sup>Anun mëníocati nëtë męcën achúshi 'imainun rabé sënénti 'uramara 'ain ca judíos unicama raíri, Asianuax ucë, acaman Pablo anuxun Nucën Papa Dios rabiti xubunua isacëxa, isquian tsuácarucëxun Pablo biacëxa. <sup>28</sup>Bitsi ca munuma cuënishi quicancëxa:

—Israel unicama, nu ca 'aquin. Ënë unix ca an camabi menu cuanquin judíos unicamamia 'inun quixun unicama ñuixuncë a 'icën. Usa 'ixun ca nun cuati bana Moisésnën cuënëo quicësabi oi 'iaxma 'inun quixun canan, anuxun Nucën Papa Dios rabiti xubu ënë 'atimaquin ñuiquinribi unicama caia. Usa 'ixun ca anuxun Nucën Papa Dios rabiti xubunu judíosma, axa griego banan banacë unicama raíriribi atsínmiaxa. Atsínmixun ca ënë xubu upí 'atimamiaxa —quíax.

<sup>29</sup>Jerusalënuaxa abë nitsia isbaiëxanx ca Efesonu 'icë uni, Trófimo, a Pablonën anuxun Nucën Papa Dios rabiti xubunu atsínmicësa sinani usai quicancëxa.

<sup>30</sup>Usaía quicëbë tsuáquirui abácuatsini uquin ca Jerusalénu 'icë unicaman biquin, Pablo anuxun Nucën Papa Dios rabiti xubu ëman nírínbianquin bënénquinshi xëcuëcama xëpuacëxa.

<sup>31</sup>Usaquin 'ai Jerusalénu 'icë camabi uni tsuáquirucëa ñuia ca comandantenën cuacëxa. <sup>32</sup>Usaquin cuaquin aín suntáru-camacëñun suntárunën cushicama timëtancëxun abáquianquin buanx ca comandante anua unicama 'icë anu bëbacëxa. Bëbaia isquin ca mëëquinbi

Pablo ëancëxa. <sup>33</sup>Usocebë uquin ca Pablo biquin comandantenën ain suntárucama manë risi rabëtan təcëreca-nun quixun cacëxa. Caquin ca ui cara ax 'icë quixun ñucánan añu cara 'axa quixun ñucácëxa. <sup>34</sup>Ñucácëbëbia unicamax bëtsi bëtsi bana ñui sharácëbë tan upí oquin cuaquinma ca comandantenën anua suntáru buccë xubunua buánun quixun cacëxa. <sup>35,36</sup>Cacëxuan buáncëbë, a caxu cuanquin catfcabiani ca unicama sharati tsuáquirui quiacëxa:  
—Ca bamati 'icën.

Usai quia tsuáquirucëbëtan ca unínma 'aia quixun suntárucaman atun xubunua 'icë tapítia 'urama 'ain Pablo 'icúquin birubianquin buáncëxa.

#### Unicamax ami manáncëxuan Pablonën ca

<sup>37</sup>Usoquin buánxuan atun xubunu suntárucaman atsínmicëxunbi ca Pablonën comandante cacëxa:

—¿Bananun caina 'ë 'imitima 'ain?

Cacëxun ca comandantenën cacëxa:

—¿Griego banan banati caina 'unan?

<sup>38</sup>¿Mix caramina Egiptonu 'icë uni an bari itsin, 'apumi nishquin unicama tsuáquirumitancëxun uni 'aquin cuatro mil uni, anu uni 'icëma menu buáncë, ama 'ain?

<sup>39</sup>Usaquin ñucácëxun ca Pablonën cacëxa:

—'Ëx cana judío uni 'ain, Cilicia menua 'icë ëma cha, Tarso, anu 'icë.

¿Usa 'ain caramina 'ën axa tsuáquirucë unicama canun 'ë camítima 'ain?

<sup>40</sup>Cacëxun ca comandantenën —camina cati 'ai —quixun cacëxa. Cacëx tapitinu nixun mecënan sanáncëxa nètëtia ca Pablonën hebreo banan banaquin ësaquin unicama cacëxa:

**22** <sup>1</sup>Ën aintsicama 'imainun caniacëcë unicama, uisai carana 'ia quixun 'ën asërabi mitsu ñuixunmainun ca cuat.

<sup>2</sup>Caía, hebreo banan Pablo banaia cuati ca pascësarua 'inun nètëacëxa. Nètëtia ca Pablonën cacëxa: <sup>3</sup>—'Ëx cana judíos uni, Cilicia menua 'icë ëma Tarso, anuax bacëan 'ain. Usa 'ixunbi cana Jerusalén ënuax caniquin, an uni 'unánmicë uni, Gamaliel, an 'unánmicë xun quirica 'unánquin, nucën raracaman cuatia Moisésnën cuëneo bana upí oquin 'unáncën. 'Imainun ca mitsúxmi 'icësaribiti Nucën Papa Diosan bana quicësabi oquin 'ati cuëëancën. <sup>4</sup>Usa 'ixun cana axa Jesucristomi sináncë unicama bëtsi bëtsi ocën. Bëtsi bëtsi oquin 'anan cana bëbu 'imainun xanuribi nëaxun tëmëramianan sipuanun buáncën. <sup>5</sup>Sacerdotnën cushicaman 'apubëtan ca caniacëcë unicamanribi 'unánxa, atun ca Damasconu 'icë judíos unicama 'inani cuanun quirica 'ë 'ináncëxa quixun. 'Ináncëx cana axa Jesucristomi sináncë unicama Jerusalén ënuxun tëmëraminuxun bitsi cuancën.

#### Pablonëan axa usai Jesucristomi catamëa ñuia bana (Hch. 9.1-19; 26.12-18)

<sup>6</sup>Bain cuani Damasconu bëbai cuanquin, 'ën usai 'iti sináncëma 'ainbi ca bari xamáruti 'urama 'ain, naínuax cushiira pëqui ichúquin nëbëtsioraquin 'ë pëcacëxa. <sup>7</sup>Usaquián pëcacëx menu nipacëxun cana ësaquián 'ë cacë bana cuacën: “Saulo, Saulo, ¿uisoti caramina 'ë bëtsi bëtsi oin?” <sup>8</sup>Ësaquián cacëxun cana cacën: “¿Ui caramina 'ain? Nucën 'Ibu Dios sapi camina 'ain”. Cacëxun ca 'ë cacëxa: “'Ëx cana Jesús, Nazaretnu 'icë, ami bëtsi bëtsi ocë, a 'ain”. <sup>9</sup>Usaquián 'ë cacëbëtan pëquia isquinbi ca axa 'ëbë cuancë unicaman 'ëbëa banaia cuama 'icën. <sup>10</sup>Ësaquián cacëxun cana cacën: “Mix camina 'ën 'Ibu 'ain. ¿Usa 'aish caramina añu 'ën 'ati cuëënin?” Cacëxun ca 'ë cacëxa: “Niruquiáni camina Damasconu cuanti

'ain. Anuxun ca uisa ñu caramina 'ati 'ai quixun mi unin cati 'icën". <sup>11</sup>Usaquin cacëx menuax niruiabia axa pëquicë an bëtëncëx bëxuñu 'ixun iscasmatia, axa 'ëbë cuancë unicaman mëñbianquin buáncëx cana Damasconu bëbacën.

<sup>12</sup>Anu ca uni achúshi, Ananías cacë, an Moisésnën cuëñeo bana quicësabi oquin 'acë 'iacëxa. Usa 'aish ca a unix Damasconu 'icë judíos unicaman, ax ca upí nuituñu 'icë quixun ñuicë 'iacëxa. <sup>13</sup>Usa 'aish ca 'ë isi uacëxa. Uxun ca 'ë cacëxa: Saulo, mix camina 'ën xucën 'ain. Camina amiribishi istëncënti 'ain. Quixuan cacëxuinshi cana a isacën. <sup>14</sup>Iscëxun ca 'ë cacëxa: Nucën Papa Dios, a nucën raracamanribi rabia, an ca mi caíscacëxa, añu cara ax cuëñia quixun 'unánanmi aín Bëchicë aín sinan upíira aribi 'unánan ax banaia cuanun. <sup>15</sup>Usa 'ixun camina min ami iscë ñucama 'imainun usaquian mi cacëxunmi cuacë banacamari bi camabi menu 'icë unicama ñuixunti 'ain. <sup>16</sup>Usaími 'inúan caíscë 'aish camina bënëtishi nirui min 'uchacama tërëñun Nucën 'Ibu Jesúsmi catamëti nashimicë 'iti 'ain.

#### **Judíosma unicama bana ñuixunun Jesusan Pablo xua**

<sup>17</sup>Usa 'ain cana Ananías quicësaí 'itancëx Jerusalénu cuantëcëancën. Cuanx cana Nucën Papa Diosbë banai anuxun a rabiti xubunu cuancën. Anu 'ixun cana namáquin iscësoquin Nucën 'Ibu Jesús isacën. <sup>18</sup>Iscëxun ca ësaquin 'ë cacëxa: Jerusalénu 'icë unicaman ca mínmi 'ë ñuiquin cacëxunbi cuaisama tanti 'icën. Usa 'ain camina bënëti Jerusalénuax cuanti 'ain. <sup>19</sup>Usaquian cacëxunbi cana Nucën 'Ibu Jesús cacën: Ënu 'icë judíos unicaman ca 'unánxa, 'ën cana anua judíos unicama timéti xubucamanu cuanquin, axa mimi catamëcë unicama sipuanuxun buánan

mëëa quixun. <sup>20</sup>Estébanën an mi ñuiquin uni bana ñuixuncë, a maxaxan 'acanmainun cana 'ëx anu 'ixun cuëñquin an Esteban rëcë unicaman chupa bërúan. <sup>21</sup>Usaquin cacëxunbi ca Nucën 'Ibu Jesusan 'ë cacëxa: Camina cuanti 'ain. Cana 'ura 'icë judíosma unicamami bana ñuixunun mi xuti 'ain.

#### **Comandantenëx Pablobë bana**

<sup>22</sup>Usaquian Pablonën ñuixuncëxun pascësarua 'aish sëtëxun cuatibi ca judíosma unicama ñuia quia cuati sharatëcëni quicancëxa:

—Ëñë uni ca bamati 'icën, 'aíma 'inun.

<sup>23</sup>Usai qui munuma banai sharati nishquin ca aín chupabi pëxun niquin me cupúcë bixun manámi mësuquin puacëxa. <sup>24</sup>Usaría unicama 'ia isquin ca comandantenën anua suntárucama bucuçë xubunua Pablo atsínminun quixun aín suntárucama cacëxa. Canan ca, uisa cupí cara a ñui usai sharácania quixuan nu ñuixunun camina Pablo rishquiti 'ai quixun cacëxa. <sup>25</sup>Usaquian comandantenën cacëxuan rishquiminun nëamicëxunbi ca Pablonën anua 'icë capitán cacëxa:

—¿Mitsúnmi románo uni, añu cara 'axa quixun upí oquin cuaxunmashi rishquiti cara asábi 'ic?

<sup>26</sup>Ésaía Pablo quia cuabiani cuanxun ca capitanën ësaquin comandante cacëxa:

—Ëñë unix ca románo 'aish quiricañu 'icën. Usa 'ain camina uisaquin caramina 'aisa tani usoquin 'anuxun upí oquin sinánti 'ain.

<sup>27</sup>Usaquian cacëx anu cuanquin ca comandantenën Pablo ñucáquin cacëxa:

—¿Asérabi caramina mix románo 'aish quiricañu 'ain?

Cacëxun ca Pablonën cacëxa:

—Usa cana 'ain.

<sup>28</sup>Cacëxun ca comandantenën cacëxa:  
—Románo 'aish quiricañu 'inuxun  
cana 'ën 'itsaira curíqui cupíocën.

Quía ca Pablonën cacëxa:  
—'Ën papan Romanu 'icë quiricañu  
'ixun bëchia 'aish cana 'ëx románo 'ain.

<sup>29</sup>Usaía quia cuaquin ca axa a rishqui-  
nux cuaíncëcaman Pablo ëancëxa.  
'Ëncëbë ca comandantenëxribi, románo  
'aísha quiricañu 'icëbi cana Pablo  
nëamia quixun sinani, racuéacëxa.

#### Judíos cushin 'apucaman Pablo ñucá

<sup>30</sup>Usa 'ain ca pëcaracëbëtan coman-  
dantenën añu cupí cara Pablomi judíos  
unicama manania quixun 'unántisa  
tanquin, anúan nëacë manë risí tubunun  
quixun cacëxa. Canan ca sacerdotenën  
cushicama 'imainun judíos unibunën  
cushicaman 'apucama timënun quixun  
aín unicama cacëxa. Cacëxuan an  
cacësabi oquin timëan ca comandante-  
nën Pablo axa timécë 'apucaman isnun  
chiquímiacëxa.

**23** <sup>1</sup>Usa 'ain ca suntárucaman  
bëcëxun isquin Pablonën judíos  
unibunën 'apucama cacëxa:

—Mitsux judíos uni 'aish camina 'ën  
xucéantu 'ain. 'Icë cana mitsu cain, 'ën  
cana ñu 'atima 'acëma 'ai quixun ca  
Nucën Papa Diosan 'ë isía.

<sup>2</sup>Quiáxa quicëbëtan ca sacerdotenën  
cushicaman 'apu, Ananías, an a rapasu  
'icë unicaman Pablo cuëtáshcanun  
quixun cacëxa. <sup>3</sup>Caia ca Pablonën cacëxa:

—Unían, upí ca quixun mi sináncë  
'aíshbi camina mix usama 'ain. Nucën  
Papa Diosainra ca 'ëmi 'amicësa usoquin  
mi 'ati 'icën. Moisésnën cuënëo bana  
quicësabi oquin uisa caramina 'ë oti 'ai  
isti cupíshi camina anu tsoan. ¿A bana  
quicësabi oquin 'ë ñucáxunmabi  
caramina 'ë mënun quixun uni cain?

<sup>4</sup>Caia oquin ca a rapasu 'icë unicaman  
Pablo cacëxa:

—¿Usaquin caramina Nucën Papa  
Diosnan 'icëbi min sacerdotenën  
cushicaman 'apu cain?

<sup>5</sup>Cacëxun ca Pablonën cacëxa:  
—'Ën aintsicama, Moisésnën cuënëo  
bana ca quia: “Min aintsicama 'apumi  
camina 'atimati banatima 'ain”. Usa  
'aínbi cana ax ca sacerdotenën cushica-  
man 'apu 'icë quixun 'unánquinma  
usaquin can.

<sup>6</sup>Usaquin catancëxun ca Pablonën  
anua timécë 'apucama, a raírinëxa  
saduceo uni 'imainun raírinëx fariseo  
uni 'icë 'unáncëxa. 'Unánquin ca  
munuma banaquin cacëxa:

—'Ën aintsicama, 'ëx cana fariseo uni  
'ain, fariseo unin bëchicë cana 'ëx 'ain.  
Usa 'ixun cana bama 'aish ca Cristo  
utëcëncëbë uni baísquiti 'icë quixun  
sinanin. 'Ën usaquin sináncë 'ain ca 'ëmi  
manáncania.

<sup>7</sup>Ësaía quia cuati acamaxbi cuëbica-  
nantancëx ënananquin ca fariseo  
unicaman bëtsi oquin sinánmainun  
saduceo unicamanribishi bëtsi oquin  
sináncëxa. <sup>8</sup>Saduceo unicaman ca  
—bama 'aish ca uni baísquitima 'icë  
—quixun sinánan —ángel 'imainun ca  
ñunshínribi 'aíma 'icë —quixun sinania.  
Sinánmainun ca fariseo unicaman  
—bama 'aish ca Cristo utëcëncëbë uni  
baísquiti 'icë —quixun sinánan —ángel  
'imainun ca ñunshinribi anu 'icë  
—quixun sinania. <sup>9</sup>Usa 'aísha camáxbi  
cuëbicanani sharámainun ca fariseo uni  
raíri, an Moisésnën cuënëo bana  
'unáncë, an niruquin munuma banaquin  
cacëxa:

—Nun iscëx ca ënë unix añu ñubi  
'acëma 'icën. Sapi ca ñunshin banaia  
cuaxa, ángel banaia sapi ca cuaxa. An  
'imicëxuan nu bana ñuixuncëxunbi ënë  
uni 'atimoi atununa Nucën Papa Diosmi-  
ribi nishi, usa 'ain cananuna 'atimotima  
'ain.

<sup>10</sup>Usaría 'aisamairai cuëbicanáncëbë ca comandante, unicaman Pablo 'ati sinani racuéacëxa. Usai 'iquin ca comandantenën —unicama nëbëtsinuabi bibianquin camina Pablo anunu 'icë xubunu buánti 'ai —quixun aín suntárucama cacëxa. Cacëxun ca suntárucaman anua atux 'icënu buánxun atsínmiacëxa.

<sup>11</sup>Usaquin 'oon ñantánbucëbëtan ca Nucën 'Ibu Jesusan a rapasu niracëquin Pablo cacëxa:

—Masá nuituti bënëaxma ca 'it. Jerusalén ënuxunmi 'ë ñuiquin cacësaribi oquin camina Roma ëmanuxunribi 'ë ñuiquin unicama bana ñuixunti 'ain.

#### **Pablo 'acatsi quiax unicama 'esénan**

<sup>12</sup>Usaquin Nucën 'Ibu Jesusan Pablo can pëcaran ca judíos unicama raírinëx timéax 'esénani ësai canancëxa: Pablo 'axunma cananuna pima 'ianan añu ñubi xëatima 'ain. Nun nux quicësabi oquin 'acëma 'icë ca Nucën Papa Diosan nu uisa cara oti 'icë usoquin nu 'ati 'icën. <sup>13</sup>Axa usai 'esénancë unicama ax ca cuarenta unibëtan sënëna 'iacëxa. <sup>14</sup>A unicaman ca anu cuanxun sacerdotenën cushicamacëñun caniacëcë unicama ësáquin cacëxa:

—Nux cananuna, Pablo 'axunma cananuna añu ñubi pima quiax canan. Nun nux quicësabi oquin 'acëma 'icë Nucën Papa Diosan nu uisa cara oti 'icë usoquin nu 'anun cananuna quia. <sup>15</sup>Usa 'ain camina 'apu raíribëtan paránquin mitsun ësáquin comandante cati 'ain: An ñu 'acë a upíra oquin 'unánxun cananuna Pablo ñucátëcëntisa tanin. Nun nu ñucátëcënnun camina pëcaracëbëtan min suntárucama bëmiti 'ain. Mitsúnmi usaquin cacësabi oquian comandantenën cacëxun aín suntáruca-man bëia cananuna Pablo 'ati 'ain.

<sup>16</sup>Usai 'esénaniabi ca Pablonën chirabacën tuacën cuacëxa. Cuabianxun ca suntárunën xubunu atsínxun Pablo ñuixuancëxa. <sup>17</sup>Ñuixuncëxun cuaquin cuënnun ca Pablonën capitán achúshi cacëxa:

—Ënë xu camina comandantebë ca banatisa tania anu buánti 'ain.

<sup>18</sup>Quixuan cacëxun bibianquin buánxun ca capitánen comandante cacëxa:

—Sipunua 'icë Pablo an ca cuënnun 'ë caxa, ënë tuá camina comandantebë ca banatisa tania anu buánti 'ai —quixun.

<sup>19</sup>Cacëxun mëinbianquin 'uri buánxun ca comandantenën a tuá ñucáquin cacëxa:

—¿Añu ñuiquin caramina 'ë caisa tanin?

<sup>20</sup>Cacëxun ca cacëxa:

—Judíos unicaman ca Pablomi 'esénan-quin sinánxa, pëcaracëbëtanmi, atun isa aín ñu 'acë upí oquin istëcënnun, judíos 'apucamanu Pablo buántëcënnun cëmëquin mi camicatsi quixun. <sup>21</sup>Usaquin cacëxunbi camina an mi cacësabi oquin 'atima 'ain. Axa Pablomi 'esénancë uní ax ca cuarenta unibëtan sënëna 'icën. Acaman ca 'anuxun unëxun Pablo cainia. Èsai ca quiaxa: Pablo 'axunma cananuna añu ñubi pima 'ianan añu ñubi xëatima 'ain. Nun nux quicësabi oquin 'acëma 'icë ca Nucën Papa Diosan nu uisa cara oti 'icë usoquin nu 'ati 'icën. Usaquin Pablo 'acatsi quixun ca minmi cacëxuan min suntáruca-man Pablo buántishi unëxun cainia.

<sup>22</sup>Quixuan cacëxun ca cuantánun xuquin, comandantenën Pablonën chirabacën tuá cacëxa:

—A ñuiquinmi 'ë cacë bana ënë camina uibi ñuixuntima 'ain.

#### **Comandantenëan Felixnu Pablo buántanun aín suntárucama xua**

<sup>23</sup>Cacëxa a tuá cuancëbëtan ca capitán rabé cuënnun comandantenën cacëxa:

—Doscientos taën nicè suntáruceñun camina setenta caballonèn nicè suntáruceñun doscientos masíbun tuíncè suntárucama béanquitancèxa imé naëx 'iisama pain 'aian Cesáreanu cuanun mēniocamiti 'ain. <sup>24</sup>Imainun camina anúan Pablo cuanun bētsi caballoribi mēnioti 'ain, anúnmi unínma 'aia bēruánxun, Pablo gobernador Felix anu buánun.

<sup>25</sup>Usaquín aín capitán rabé catancè xun ca comandantenèn Felix buánminu-xun ésaquin quirica cuēnēocèxa:

<sup>26</sup>“Éx Claudio Lisias 'ixun cana Felix, mixmi 'apu 'aish sinánñuira 'icè, mi quirica buánmin, camina bití 'ain. ¿Uisa caina 'ain? <sup>27</sup>Judíos unicaman bixun 'aia taniabi cana ènè uni, ax ca románo 'icè quixun 'unánquin, 'èn suntárucama buánxun bian. <sup>28</sup>Añu cupí cara ami manancia quixun 'unántisa tanquin cana judíosnèn 'apucamaxa timécenu Pablo buan. <sup>29</sup>Buánxun ñucácèxunbi ca Pablonèx isa usai judíos unicama 'itia Moisésnèn cuēnēo bana quicēsabi oi 'ima quixun 'è caxa. Cacèxun iscèxbi ca an 'acè ñu a cupí Pablo 'ati 'aíma 'ianan a cupí sipuatibi 'aíma 'iixa. <sup>30</sup>Judíos unicamaxa a 'acatsi quiax ami 'esénania ñuia cuaquin cana bēnénquinshi minua cuanun Pablo xutin. Xuanan cana axa ami manáncè unicamaribi añu cupí cara ami 'esénania quixuan mi canun quixun minu xutin. Ènèishi cana mi cain”.

<sup>31</sup>Ésoquian cuēnēocè quirica buánquin ca comandantenēan cacēsabi oquin, suntárucaman bibianquin Pablo imé Antípatris cacè émanu buáncèxa. <sup>32</sup>Buón pēcaracèbè ca caballonèn nicè suntárucamainshi Pablo buántamainun taën nicè suntárucamax anua 'icè Jerusalénu cuantécēancèxa. <sup>33</sup>Cuanta-mainun Pablo buanx ca caballonèn nicè suntárucamaxèshi Cesárea émanu bēbacèxa. Bēbaxun anu Pablo buánquin

ca a ñuiquin cuēnēocè quirica Felix 'ináncèxa. <sup>34</sup>Ináncèxun a ñuiquin 'acè quirica istancèxun ca Felixnèn Pablo bēisquin ñucáquin cacèxa:

—¿Uinu 'icè uni caina 'ain?

Cacèxun ca —'èx cana Cilicia menu 'icè uni 'ai —quixun Pablonèn cacèxa.

<sup>35</sup>Cacèxun ca Felixnèn cacèxa:

—Axa mimi manáncè unicama ucēbētan cana mixmi quia cuati 'ain.

Caxun ca Herodesnèn xubunuxun bēruánun quixun suntárucama cacèxa.

#### Felixnèn ñucácèxuan Pablonèn ca

**24** <sup>1</sup>Mécèn achúshi nētè 'icèbè ca sacerdotenèn cushicaman 'apu, Ananías, abè caniacècè uni raíri 'imainun Tértulo cacè uni, an banati 'unáinracè, acamax Cesárea émanu cuancèxa. Cuanx bēbax ca Pablomi manánux Felixnu riquiáncèxa. <sup>2</sup>Riquian, suntárunèn Pablo bēcēbētan, ca Tértulo-nèn Felix ésaquin cacèxa:

—Mixmi 'apu 'ain cananuna upitax bucuín. Sinánñuira 'ixun camina min nuxnu upitax bucunun upí oquin bana mēnióin. <sup>3</sup>Mix camina usa 'ai quixun sinánquin cananuna camabi émanuxun camabi nētèn, asábi ca quixun sinani, upitax bucuín. <sup>4</sup>Usa 'ain camina mix upí nuituñu 'ixun, nun 'itsaira ñuixun-quinma bana 'itsamashi mi ñuixunmai-nun, nun cacèxun cuati 'ain. <sup>5</sup>Ènè unix ca nun iscèx an camabi menua judíos unicama bētsi bana ñuixunquin ubíoquin tsaúquirumicè 'ianan nazareno cacè unicaman cushi a 'icèn. <sup>6</sup>Usa 'ixun judíosma uni anu atsnímixun anuxun Nucèn Papa Dios rabiti xubu 'atimamiti 'icèbi cananuna Moisésnēan cuēnēo nun cuati bana quicēsabi oquin 'anuxun biixan. <sup>7</sup>Bicèbi ca comandante Lisiasnèn aín suntárubè cuanxun nu bicuaēn-xanxa. <sup>8</sup>Nu bicuantancèx ca axa Pablomi manáncè unicamainsa minu

uxun a ñuiquin mi cati 'icë quiax quixanxa. Usa 'ain camina caisa tanquin Pablo ñucáti 'ain. Ñucácëxa quia cuaquin camina minbi nuxnu a ñui quicë banacamax ca asérabi 'icë quixun 'unánti 'ain.

<sup>9</sup>Usaquian Tértulonën Felix can, ca abë ucë judíos unicamanribi Tértulo quicësabi oi ca asérabi 'iaxa quixun cacëxa. <sup>10</sup>Ësaquian cacëxun cuatancë xun ca Felixnën Pablo axribi bananun quixun aín mecënan sanánquin tanxuncëxa. Tanxuncëxun ca Pablonën cacëxa:

—Minmi 'itsa baritian ënë menuxun uni itsi ñuia mimi uni manáncëxun cuacë 'icë cana racuëtima cuëënquin uisai carana 'ia quixun mi cain. <sup>11</sup>Usa 'ain camina asérabi cara 'ën mi cacë bana 'icë quixun 'unántisa tanquin bëtsi uni ñucáti 'ain. Anuxun Nucën Papa Dios rabinux 'ëx Jerusalénu cuaënxancë ca mecën rabé 'imainun rabé nëtësa 'icën. <sup>12</sup>Anu 'icë ca anuxun Nucën Papa Dios rabiti xubu 'imainun anu judíos unicama tímëti xubucama 'imainun ëmacamanuxunribi abë cuëbícanaanquin 'ën unicama tsuáquirumia uinu 'icë unínbi iscëma 'icën. <sup>13</sup>Imainun ca ënë unicamaxa quicë bana ënëx ca asérabi 'icë quixuan an mi cati uni 'aíma 'icën. <sup>14</sup>Usa 'ain cana mi cain, Nucën Papa Dios a 'ën raracaman rabia, a cana 'ënribi rabin. Aín bana, Moisésnën cuëñëo 'imainun an Nucën Papa Dios quicë bana uni ñuixuncë unicamanribi cuëñëo, a banacamax ca asérabi 'icë quixun cana 'unan. Usa 'aish cana a banacama quicësabi oía uá aín Bëchicë amia ax 'ëbë sináncë unicamabë ami catamëtin, judíos unicama raírinëxa ami sinántisama tancëbëbi. <sup>15</sup>Atúan sináncë saribi oquin cana, bama 'aish ca uni upfcama 'imainun uni 'atimacamaxribi baísquti 'icë quixun sinanin. <sup>16</sup>Usaquin sináncë 'aish cana Nucën Papa Diosmi

'uchaima 'ianan uisa unimibi 'uchaima 'iisa tanin. Usai 'inuxun cana camabi nëtën ñu 'atima 'aquinma ñu upíshi 'ain.

<sup>17</sup>Usa 'ain cana 'itsa barin bëtsi bëtsi menu 'itancëx Jerusalénu utëcëan. Uquin cana nun aintsí ñuñumacama 'inánun quixuan uni raírinën 'ë bëmicë curíqui bëan. Bëanan cana 'ën curíquiribi anuxun Nucën Papa Dios rabiti xubunuxun 'inánun bëan. <sup>18</sup>Bëxun 'inánun cana judíos unicama 'icësaribiti nashi mëníocan. Anun mëníocati nëtë sënëncëbë cana 'ën bëcë curíquicama 'inani anuxun Nucën Papa Dios rabiti xubunu cuan. Anua ca axa Asianuax ucë judíos unicaman 'ë mëraxa. Axa 'ëbë tsuáquiruti 'itsa uni ca anu 'aíma 'iaxa. <sup>19</sup>Asianuax ucë unicama ax 'ëmi manántisa tani ca ënuxun mi 'ë ñuiquin cai utsíanxa. <sup>20</sup>Usa 'ain ca atúxa ucëma 'ain, axa Tértulobë ucë ënë unicaman mi cati 'icën, Jerusalénuxuan judíos 'apucaman 'ë ñucácëbëtan cara uisa ñu 'acë 'ë isaxa quixun. <sup>21</sup>Caquin ca, 'apucaman cuamainun, bama 'aish ca Cristo utëcëncëbë unicama baísquti 'icë quixun 'ën sináncë 'ain camina 'ëmi manáncani quiax 'ëx quixancë bana mi ñuixunti 'icën.

<sup>22</sup>Usaía Pablo quia cuaquin ca Felixnën, Jesúsmi catamëti ca uni Nucën Papa Diosnan 'iti 'icë quixun 'unáncë 'ixun nëtë itsin mëníonuxun, Tértulo 'imainun abë ucë unicama ësaquin cacëxa:

—Comandante Lisias ax ucëbëtan cana Pablo ñuimi quicë bana ënë mëníoti 'ain.

<sup>23</sup>Catancëxun ca Felixnën aín capitán cacëxa:

—Chiquíti rabanán camina Pablo bërúanti 'ain. Bërúanquinbi camina aña cara 'aisha tania a 'amianan axa abë nuibanancë unicaman a istisa tania ismianan aña ñu cara cuëñëia a 'axunun 'amiti 'ain.

<sup>24</sup>Usa 'ain ca nētē itsin Felix, judía xanua biá, Drusila cacē, abē utēcēan-cēxa. Uxun ca Cristomi catamēti ca uni Nucēn Papa Diosnan 'iti 'icē quixun ñuia cuaisa tanquin Pablo camiacēxa.

<sup>25</sup>Camicēx uxuan, Jesucristomi catamētia uni, aín 'uchacama tērēncē 'aish Nucēn Papa Dios cuēēncēsabi oi 'iti bana ñuixuanan 'atima ñu 'atēcēinsa tanquinbi tēnēti banaribi ñuixuanan aín ñu 'atima 'acē cupía unin paē tanquin tēmērati bana ñuixuncēxun cuati ratúquin ca Felixnēn Pablo cacēxa:

—Camina cuanti 'ain. A 'ēn 'ati ñu 'aíma 'ain cana amiribishi mi camitēcēnti 'ain.

<sup>26</sup>Usaquin cacēxa cuan ca Felixnēn —'ēn chiquínun ca Pablonēn 'ē curíqui 'inánti 'icē —quixun sínancēxa. Usaquin sínánquin camicēxa cuancēbē cuancēbē ca Pablobē 'itsai banacēxa. <sup>27</sup>Usaquin rabé baritia inúnmi 'apu 'aishbi chiquíquin ca Felixnēn judíos unicamabē upí 'iisa tanquin Pablo sipunubi éancēxa. Felix chiquícēbē ca bētsi uni Porcio Festo cacē, ax 'apu 'iacēxa.

#### Festonēn Pablo ñucá

**25** <sup>1</sup>Usa 'ain ca 'apu 'inux cuanx Festo Judea menu bēbacēxa. Bēbax ca rabé 'imainun achúshi nētē 'icēbē Cesárea émanuax Jerusalénu cuancēxa. <sup>2</sup>Anua 'icē ca judíos sacerdotenēn cushicama 'imainun judíos 'apucamanribi Pablomi manánquin Festo cacēxa, <sup>3</sup>ésaquin, —Nux cuēēncē sabi oquin camina Pabla Jerusalénu mín unin bēnun camiti 'ain. Bain aia 'acatsi quiax 'ésēnanxun ca Pabla bēnun quixuan caminun quixun judíos unicaman Festo usaquin cacēxa.

<sup>4</sup>Cacēxunbi ca Festonēn cacēxa:

—Pablo ca Cesáreanu sipuocē 'icēn. 'Ēx cana 'itsama nētēinshi 'ēnuax anu cuanin. <sup>5</sup>Usa 'ain ca mitsun cushicamax

'ēbē Cesáreanu cuanti 'icēn. Cuanxun ca a unían ñu 'atima 'acē 'ain, uisa ñu cara 'axa quixun nu cati 'icēn.

<sup>6</sup>Catancēx ca mēcēn rabé nētēsa 'icēbē Festo Jerusalénuax Cesárea émanu cuancēxa. Coonx pēcaracēbē, anua uníxa unimi manania cuacē uni tsóti, anu tsóbuxun ca Pablo bēcánun quixun camiacēxa. <sup>7</sup>Camicēxun bēcēbē ca Jerusalénuaxa ricuatsíncē judíos unicamax a nēbētsiorati, ēnē unin ca 'atima ñuira 'axa quiacēxa. Usaía quicancēbēbi ca Pablo ñuia, usai quicancē bana ax ca asérabi 'icē quiáxa ax quti uni raíri 'aíma 'iacēxa. <sup>8</sup>Usa 'ain ca Pablonēn amia manáncancēxun ésaquin Festo cacēxa:

—'Ēn cana Moisésnēan usai judíos unicama 'iti cuēnēo bana quicēsabi oi 'iaxma 'inun judíos unicama cacēma 'ain. Usa 'aish cana 'ēxribi a bana quicēsabi oi 'ian. 'Ianan cana anuxun Nucēn Papa Dios rabiti xubunu judíosma uni atsínmicēma 'ain, atsínmima 'ianan cana Romanu 'icē 'apu, César, aín bana tanxunma 'anun uni cacēma 'ain.

<sup>9</sup>Quia ca Festonēn judíos unicamabē upí 'iisa tanquin Pablo cacēxa:

—¿Mi ñuia quicancē bana ēnē 'ēn anuxun mi mēfoxunun caina Jerusalénu cuainsa tanin?

<sup>10</sup>Cacēxun ca Pablonēn cacēxa:

—'Ēx románo uni 'icē ca Romanu 'icē 'apu, Césarnēn 'imicē an uníxa románo unimi manania cuacē uni ainshi 'ē ñuia uni quicē bana mēníoti 'icēn. Usa 'ain camina 'ēx románo 'afan 'ēmi uni manania minbi mēníoti 'ain. Minbi camina 'unanin, judíos unicamami 'ēx 'uchacēma 'ain ca 'ēn 'acē ñu a aín 'apucaman mēníoti 'aíma 'icēn. <sup>11</sup>Axa quicēsabi oquin nun 'ati bana quicēsa oquin 'acēma 'icēa unin 'ē bamamiti ca asábi 'itsíanxa. Usa 'aínbi ca uisa ñubi



'uchacëma 'icë atúxa 'ë ñui quicë bana asérabima 'ain, uinu 'icë unínbi atúan 'anun judíos unicama 'ë 'inántima 'icën. Usa 'ain cana Romanu 'icë 'apu Césarnëmbia uisa cupí cara uni 'ëmi manania quixun isti cuëënin.

<sup>12</sup>Usaquian cacëxun ca an a 'aquincë unicamabë banatancëxun Festonën Pablo cacëxa:

—Césarnëmbi uisa cupí cara uni mimi manania quixun isti cuëëncë cupí camina Césarnu cuanti 'ain.

**'Apu Agripanën Pablo ñucá**

<sup>13</sup>Itsama nëtë 'icëbë ca 'apu Agripabë Berenice Cesárea ëmanu Festo isi cuancëxa. <sup>14</sup>Cuanx anu 'itsa nëtë 'ia ca Festonën Pablo ñuiquin cacëxa:

—Ënu ca sipuacë 'icëa Felixnën anubi ëbiancë uni achúshi 'icën. <sup>15</sup>Jerusalénu 'icë ca sacerdotenën cushicamabëtan judíos caniacëcëcaman a ñui ami manánquin 'ë caxa, 'ën a uni 'aminun quixun. <sup>16</sup>Cacëxunbi cana can: Románo 'apucaman ca, amia uni manáncë uni a uisa 'ixunbi, ca bamati 'icë quixun caima, axa ami manáncë unicaman abë banaquin a uni añu ñu cara 'axa quixun cacëma pain 'ain. <sup>17</sup>Usa 'ain cana atúxa Jerusalénuax ënu uóncë nëtë pëcaracë bëtan, anua an uníxa unimi manania cuacë uni tsóti, anu tsóbuxun Pablo bëcanun quixun camian. <sup>18</sup>Camiquin cana, 'atima ñuira sapi ca Pablonën 'axa quixun sinan. Sinánquin camicëxuan Pablo bëánbi ca 'ën sináncësa oi axa ami manáncë unicamax quicëma 'icën. <sup>19</sup>Quimabi ca ësai cuni quíaxa, nuxnu usai 'iti bana quicësabi oi 'ima 'ianan ca Pablonën, uni achúshi Jesús cacë, ax isa bamaxbi baísquiacëxa quixun ñuia quíax. <sup>20</sup>Usa 'ain cana uisa carana ënë uni oti 'ai quixun sinántancëxun, ¿mi ñuia quicancë bana ënë anuxun mi mëníoxunun caramina Jerusalénu

cuainsa tani? quixun Pablo ñucan.

<sup>21</sup>Ñucátancëxun cana, César Augusto-nën ca 'ëmia uni manáncë bana istancëxun uisa cara oti 'icë quixun 'ë cati 'icë quixun 'ë cacë cupí, anun Césarnu xuti nëtë sënëntamainuan sipunubi 'inun quixun can.

<sup>22</sup>Usaquian cacëxun ca Agripanën Festo cacëxa:

—'Ënribi cana a unían bana ñuia cuaisa tanin.

Quiáxa quia ca Festonën cacëxa:

—Iméishibi camina axa quia cuati 'ain.

<sup>23</sup>Usaquian coon pëcaracëbë ca suntárunën cushicama 'imainun a ëmanu 'icë unin cushicamabë Berenice 'imainun Agripa afn ñun curánanën mëníocacuatsini uacëxa. Ucëbëtan ca Festonën Pablo bënun quixun afn suntárucama cacëxa. <sup>24</sup>Cacëxuan Pablo bëcëbëtan ca Festonën axa ucëcama ësáquin cacëxa:

—'Apu Agripacëñun cana axa ënu nubë timécë unicama cain, ënu ca a uni ñuia judíos unicamax, Jerusalénu 'imainun Cesáreanuaxribi, ami manani munuma banaquin, ax ca bamati 'icë quixun 'ë cacë ax 'icën. <sup>25</sup>Aínbi ca 'ën sináncëx a cupí bamati uisa ñubi 'acëma 'icën. Usa 'afnbi cana axbi, César Augustonënbi ca 'ëmia uni manáncë bana istancëxun uisa cara oti 'icë quixun isti 'icë quixun 'ë cacë cupí Césarnu xuti sinan. <sup>26</sup>Sináncëxbi ca a ñuiquin, usai ca ënë uni 'iixa quixun cati bana 'aíma íaxa. Usa 'ain cana mitsúnmi ñucánuan a bënun quixun can. Agripa, mix nun 'apu 'ixun camina a ñucáti 'ain. 'Imainun ca ënu 'icë unicamanribi a ñucáti 'icën, uisa ñu cara 'axa quixun. Ñucácëxa quia cuaxun cana añu cara 'axa quixun caquin nun 'apuíra César quírica buánmiti 'ain. <sup>27</sup>Añu ñu 'aisama cara 'axa quixun

ñiuxunxunmashi cana Césarnu sipuacé uni xutima 'ain. Xuáxbi cana nuituñuma 'ixun añu ñu 'acéma 'icébi a uni xucésa 'iti 'ain.

Usai cana 'ia quixuan Pablonën Agripa ca

**26** <sup>1</sup>Festonën cacëxun ca Agripanën Pablo cacëxa:

—Mixribi camina banati 'ain.

Usaquin cacëx ca camabi unin cuamainun aín mecënan sanani ësai Pablo quiacëxa:

<sup>2</sup>—Agripa, 'emia judíos unicamax manáncé banacama ñuiquin uisai carana 'ia quixun mi cai cana cuëñin.

<sup>3</sup>Min camina judíos unicamaxa usabi 'icé 'aish, usai 'ia 'unanin. 'Imainun camina añu ñu ñui cara quia quixunribi 'unanin. Usa 'ixun camina 'ën mi camainun bënëquinma cuati 'ain.

<sup>4</sup>Judíos unicaman ca uisai 'i carana 'ën nētēnuax cania quixun 'unanán uisai carana Jerusalénuaxribi 'ia quixun 'ë 'unánxa. <sup>5</sup>Usa 'ain ca atun 'unáncé 'ixun, 'ëx cana 'itsa baritian fariseo uni 'ai quixun caisa tanquin mi cati 'icën. Nux fariseo 'aish cananuna nux judíos unicama raíri 'icësamairai Moisésnën usai judíos unicama 'iti cuëñeo bana quicësabi oi 'ain. <sup>6</sup>An nucën raracama cásabi oquin ca Nucën Papa Diosan uni bamacama baísquimiti 'icé quicé banax ca asérabi 'icé quixun cana 'ën sinanin. Usaquin 'ën sináncé cupí ca ëñë unicamax 'ë ñui 'ëmi manánxa. <sup>7</sup>Nucën rara Israel, aín bëchicëcamax ca mecën rabé 'imainun rabé 'iacëxa. Aín bëchicé caman rëbúnquinën ca anúan Nucën Papa Diosan uni bamacama baísquimiti nētë cainia. Anúan aturibi baísquimicé 'iti nētë ca uti 'icé quixun sinánquin ca nēténbi imébi ami sinánquin Nucën Papa Dios rabia. Usa 'ain cana mi cain, usaribiti 'ëx 'icé cupí ca ëñë unicamax 'ëmi manania. <sup>8</sup>Mitsúnribi camina,

Nucën Papa Diosan ca uni bamacama baísquimiti 'icé quixun sinanin. ¿Usa cat?

**Ami catamëcëma 'ixuan Pablonën Jesucristomi catamëcë unicama bëtsi bëtsi o**

<sup>9</sup>Catancëxun ca ësakinribi Pablonën cacëxa:

—'Ën cana sináncën, 'ën Jesús Nazaretnu 'icé ami catamëcë unicama bëtsi bëtsi oti isa Nucën Papa Diosan iscëx upí 'icé quixun. <sup>10</sup>Usaquin sinánquin cana Jerusalénuxun a unicama bëtsi bëtsi oquin tēmëramianan, sacerdotenën cushicaman 'ë cacësabi oquin axa Jesúsmi catamëcë uni 'aisamaira sipuacën. Sipuaila unin atu 'acëbëtan cana, asábi ca quixun sináncën. <sup>11</sup>Itsa oquin cana amia sinaniabi Jesucristomi catamëti ëña, ami 'atimati bananun quixun aín unicama bëtsi bëtsi ocën. Anua judíos unicama timéti xubucamanubi cuanquin cana usoquin 'acën. Usonan cana ñunshinacëquin bëtsi bëtsi menu 'icé ëmacamanuribi cuanquin, anu 'icé axa Jesucristomi catamëcë unicama bëtsi bëtsi ocën.

**Uisai cara Jesucristomi catamëacëxa quixuan Pablonën ñuitécëan**

<sup>12</sup>Catancëxun ca ësakinribi Pablonën cacëxa: i —Damasco ëmanuxunribi usaribi oquin 'anux cana sacerdotenën cushicaman usoquin 'anun quixun 'ë 'axuncé quirica buani cuancën. <sup>13</sup>Cuanquin cana bari xamarucëbë ñafnuax pëqui, barían pëcacësamaira oi ichuquin nëbëtsioraquin axa 'ëbë cuancë unicamacëñunbi 'ë pëcacëxun isacën. <sup>14</sup>Pëcacëx cananuna camáxbi menu nipacëacën. Nipacëxun cana hebreo banan ësai quia cuacën: “Saulo, Saulo, ¿uisoti caramina 'ë bëtsi bëtsi oin? Ami

tatíqui chacati nishquin i tapun, taën 'aquinmi paë tancësa, usaribiti camina mibi 'in. Usaquin 'ë 'ai 'ëmi sinántisama tani camina mixbi 'atimóracatin". <sup>15</sup>Ësai quia cana cacën: "¿Ui caramina 'ain? Nucën 'Ibu Dios sapi camina 'ain". Cacëxun ca 'ë cacëxa: "Ëx cana Jesús, ami bëtsi bëtsi ocë, a 'ain. <sup>16</sup>Ca nirut. Minmi 'ë ñuiquin, unicama canan bërími 'ë iscë ñuianan, minmi 'ën 'aia isti ñucamaribi ñuiquin, unicama canun cana mi cain. <sup>17</sup>Usa 'ixun cana 'ë ñuiquinmi bana ñuixunun judíos unicama 'imainun judíosmacamanu mi xutin. Usaquinmi 'aia cana unían bëtsi bëtsi onan bamamisa taniabi mi bërúanti 'ain. <sup>18</sup>Minmi 'ë ñuixuncëxa atux ñu 'atima 'atishi sinani bëánquibucënu nicësa 'aishbi sinanaquin ñu upíshi 'ati sinánun cana mi xutin, ñunshin 'atimanën 'apu Satanásnën 'ibuacë 'aishbi sinanatía Nucën Papa Diosnan 'inun. Usai 'ëmi catamëcë 'aisha aín 'uchacama téréncë 'inun cana atunu mi xutin. Usa 'ain ca an mëñosabi oi atux aín unicamabë Nucën Papa Diosnan nëtënu 'iti 'icën".

#### Jesusan cacësabi oía Pablo 'ia

<sup>19</sup>Pablonën ca ësaquinribi Agripa cacëxa: 'Apu Agripa, cana mi cain, usaquian Jesusan nañunxun 'ë cacëxun cana aín bana paréquinma an cacësabi oquin 'acën. <sup>20</sup>Aquin, Jesús ñuiquin, Damasconu 'icë unicama ñuixuntancë xun cana Jerusalénu 'icë unicama ñuixuanan Judea menu 'icë ëmacamanuxunribi bana ñuixuan. Ñuixuanan cana judíosma unicamaribi ñuixunquin ësaquin can: 'Atimaquin sináncë 'aishbi sinanati camina Nucën Papa Diosnan 'iti 'ain. Usai ami sinánquin camina ñu 'aisama 'aquinma ax cuëëncësabi oquinshi 'ati 'ain, mix camina ainan 'ai quixuan camabi unin 'unánun.

<sup>21</sup>Usaquin 'ën bana uni ñuixuncë cupí ca judíos unicaman anuxun Nucën Papa Dios rabiti xubunuxun bitancëxun 'ë 'aisa tanxa. <sup>22</sup>Atúan 'ë 'aisa taniábia Nucën Papa Diosan 'ë 'aquinia 'ë 'acëma 'ixun cana 'ën 'acësabi oquin uni aín cushibu 'imainun cushimacamaribi, Nucën Papa Dios ñuiquin bana ñuixunin. 'Ën unicama ñuixuncë bana ax ca bëtsima, Moisés 'imainun an Nucën Papa Dios quicë bana uni ñuixuncë unicamanribia, usai ca 'iti 'icë quixun ñuia bana abi 'icën. <sup>23</sup>A banax ca ësai quia: Tëmëratancëx ca Cristo bamati 'icën. Bamatancëxa baísquia 'ain ca usaribiti camabi uni bama 'aishbi Cristo utécëncëbë baísquiti 'icën. Usai baísquia 'ixun ca Jesusan judíos unicamaishima judíosma unicamaribi sinanati ami catamëtía aín sinan upí 'inun 'imiti 'icën.

#### Cristomi sinánun quixuan Pablonën Agripa cá

<sup>24</sup>Usaía Pablo an ñu 'acëcama ñui quicëbë ca Festo munuma banai quiacëxa:

—Pablo, camina ñunshían. 'Itsairami quirica 'acë cupí camina ñunshían.

<sup>25</sup>Cacëxunbi ca Pablonën cacëxa:

—Festo, 'ëx cana ñunshíncëma 'ain. 'Ën ñuicë bana ënëx ca sinánñuma uníxa quicësama 'icën, ax ca cëmëi quicëma 'icën. <sup>26</sup>Apu Agripa ënën ca 'ëx a ñui quicë ñucama ënë upí oquin 'unánxa. Unían isnunma ñu 'acëma 'ixun cana 'ën, an ca asérabi 'ën ñuicë ñucama 'unánxa quixun 'unanin. Usa 'ain cana racuëquinma ënë ñucama a ñuixunin.

<sup>27</sup>Usaquin Festo catancëxun ca Pablonën Agripa cacëxa:

—¿An Nucën Papa Dios quicë bana uni ñuixuncë unicaman cuënëo banax cara asérabi 'icë quixun caina sinanin?

'Ēn cana 'unanin, asérabi ca a bana 'icē quixun camina sinanin.

<sup>28</sup>Cacēxun ca Agripanēn Pablo cacēxa:

—Bēnēnquinshi camina 'ē Cristonēn uni 'imitisa tanin.

<sup>29</sup>Quia ca Pablonēn cacēxa:

—Nucēn Papa Dios cuēēcēsabi oi cana mishima an 'ēx quia cuacē unicamaxribia, 'ēx 'icēsaribiti, bēnētishi Cristonēn uni 'iti cuēēnin. Bēnētishi 'iananbia abi munu sinanati Cristonan 'iti cana cuēēnin. Mix 'ēx 'icēsaribiti Cristonan 'aishmi, 'ēx 'icēsaribiti manē risin tēcērēcacēma 'iti, cana cuēēnin.

<sup>30</sup>Usaquian Pablonēn cacēx ca Agripa 'imainun Festo 'imainun Berenice 'imainun abēa anu tsōcēcama ax niruacēxa. <sup>31</sup>Nirūquiani 'uri cuanx ca canani quiacēxa:

—Ēnē unían 'acē ñu 'atima ca 'aíma 'icēn. Usa 'aish ca a cupí sipuanan bamamiti an 'acē ñu 'aíma 'icēn. <sup>32</sup>Usai quixun ca Agripanēn Festo cacēxa:

—Chiquíntisa 'aishbi ca ēnē unix Romanu 'icē 'apu, Césarnēinsa ēnē ñu mēnioxunun anu cuancatsi quiaxa.

#### Roma ěmanua Pablo cuan

**27** <sup>1</sup>Usaquin anua César 'icē Italia menu nu xuti sinántancēxun ca Agripabētan Festonēn, Pablocēñuan sipuacē uni rafriribi, an buánun quixun Julio cacē capitán a cacēxa. Julio ax ca Augusto cacē suntárucama achúshi 'iacēxa. <sup>2</sup>Usa 'ain cananuna parúnpapa cuēbí cuanx, Adramitio ěmanuaxa ucē manē nunti, axa Asia menu cuanti, anu 'irucēn. Nubē ca Macedonia menu 'icē ěma Tesalónica, anua 'icē uni Aristarco, axribi cuancēxa. <sup>3</sup>Usaquiani coonx cananuna Sidón cacē ěmanu bēbacēn. Anu bēbaxun ca abē upí 'ixun Julionēn Pablo a ěmanua 'icē axa abē nuibanancē unicama isanan abē bananan, atun xubunuxun pitánun quixun cacēxa. <sup>4</sup>Usa

'ain cananuna Sidónuax cuaniabia suñun anúnu cuancē amiax uquin bēcacēx, caxutanma nu buania quiax, nu mēmíua 'icē Chipre nasí inubiani amotan cuancēn. <sup>5</sup>Cuanx cananuna Cilicia me ratábíanxun Panfilia meribi ratábíanx Licia menua 'icē ěma Mira cacē anu bēbacēn.

<sup>6</sup>Mira ěmanuxun ca a capitanēn Alejandría ěmanuax ucē manē nunti isacēxa. Isun ca anúnu nux Italianu cuanun aín 'ibubētan mēnócēxa.

<sup>7</sup>Mēnócēbē cuanx 'itsa nētē munu cuanquin cananuna Gnido cacē ěma isacēn. Isbiani cuaniabia anúnu cuancē amiax uquin nētēquinma suñun bēcacēx cananuna Salmón ěma inubiani Creta cacē nasí a rapasu cuancēn. <sup>8</sup>Cuanx cananuna numi 'iquian suñun bēcacēx cuētsinan munu cuanx, Buenos Puertos cacē ěma, Lasea cacē ěma cha 'urama 'icē, anu bēbacēn.

<sup>9</sup>Anu bēbaquiani cuancēbēa, mita rēnimēbúcēbē ca parúnpan cuanti 'aisama 'iacēxa. Usa 'ain ca Pablonēn axa nubē cuancē unicama ěsaquin cacēxa: <sup>10</sup>—'Ēn sináncēx ca usabi cuanti 'aisama 'icēn. Usabi cuani cananuna nunti 'imainun ñucama nētémianan nuxribi cēñúti 'ain.

<sup>11</sup>Cacēxbi ca an manē nunti niquicē unicaman cushi 'imainun nunti 'ibúxribi anu 'uran 'iisama tanmainun Julionēxribi Pablonēn bana cuaisama tani cuancatsi quiax bēnéacēxa. <sup>12</sup>Usa 'ain ca mita inúmi anu 'iti cuēēnquinma, unicama aín patsanēn ěsaquin sináncēxa:

—Ēnuax cuanx cananuna Fenice ěma, Creta nasí aúa bari cuabúcē, au cuanx mita inútamainun anu 'i cuanti 'ai quixun cananuna tanti 'ain.

#### Parúnpapa tucánquia

<sup>13</sup>Usaquin sináncēbēbia aín tsipúmíax suñu munuishi bēquicēbētan ca an

manë nunti niquincë unicaman —cananuna cuanti 'ai —quixun sináncëxa. Sinánbianquin ca Creta nasí cuëtsinan nu buáncëxa. <sup>14</sup>Cuancëbëbi ca suñúan matámiax bëquiácëxa. <sup>15</sup>Usai 'iquian cuainsama oquin manë nunti tuíncëbë tan cananuna anbia nu buántanun quixun sináncën. <sup>16</sup>Suñúan bëquiquin buáncëx cananuna nasí chucúma, Cauda cacë, a rapasu cuani ami catamëacën. Ami catamëquin cananuna nunti chamaratsu bëchunan buaniabi anun təcërëcacë itsi a biquin anun bëacën. <sup>17</sup>Bëxun cananuna manë nunti chanu 'aruacën. 'Arutancëxun ca an manë nunti niquincë unicaman manë nunti cushioquin aín amo camabi runucaxun nëacëxa. Nëatancëxun ca sináncëxa, Sirte cacë masí 'urama sapi cananuna 'ai quixun. Uinu 'icë unin cara a masi amatia, ax ca anu pëánquiax ëchiquitima 'icë quixun sinani ca anu cuainsama tancëxa. Usa 'ain ca racuëti amiquisama tanquin, chupa ami suñu bëquicë, an nunti niquincë unin buánpacëxa. Buánpaquin ca suñúinshia nu buántanun quixun sináncëxa. <sup>18</sup>Usaquiani coónbia suñúan nètécëbëtanma ca an manë nunti niquincë unicaman ñu buáncëcama raíri parúnppa nëbëtsi puacëxa. <sup>19</sup>Usaquin 'ón cananuna nunribi nuntinua 'icë ñucama parúnppa nëbëtsi puacën. <sup>20</sup>Usobiani cuanquin cananuna 'itsa nètën bari isíma, 'isparibi isíma, 'ianan suñúanën parúnppa bëchúancë, ashi isquin —ënuax cananuna bamati 'ai —quixun sináncën. <sup>21</sup>Usa 'ain 'itsa nètën picëma 'ain ca Pablonën atu nëbëtsinuax niruquin unicama cacëxa: —'Ën mitsu cacësabi oi Buenos Puertosnubi bërúax cananuna asábi 'ianan nun ñucama pucëma 'itsfan. <sup>22</sup>'Aínbi camina masá nuitutima

chuámashi 'icanti 'ain. Achúshi uníxbi cananuna bamatima 'ain, manë nuntíxë shi ca nanëti 'icën. <sup>23</sup>Ënë imé cana ainan 'ixun 'ën a rabicë, Nucën Papa Diosan xucëxa ucë ángel isan. <sup>24</sup>Iscëxun ca 'ë caxa: Pablo, camina racuëtima 'ain. Mi cupí ca micëñun axa mibë manë nuntinu 'icë unicamaribi bacamiquiti 'icëbi Nucën Papa Diosan iémiti 'icën. Iémicëx cuanx camina Romanu 'icë 'apu, Césarnu bëbati 'ain. <sup>25</sup>Angelnën 'ë cacë sinani camina chuámarua 'icanti 'ain. 'Ën cana 'unanin, Nucën Papa Diosan 'imicëx ca ángelnën 'ë cacësabi oi 'iti 'icën. <sup>26</sup>Usa 'aínbi ca manë nuntíxëshi nasínu 'irui anu ránquiti 'icën.

<sup>27</sup>Usa 'ain cananuna rabé semana 'icëbë suñúanëan amo amo oquin buáncëx, parúnppa Adria cacë, anu 'iacën. Anuxun ca imé naëx an nunti niquincë unicaman —sapi cananuna menu bëbai —quixun sináncëxa.

<sup>28</sup>Sinánxun ca parúnppa nëmin tanquin —ca treinta y seis metros 'icë —quixun isacëxa. Isax 'uri cuanxun tantëcënquin ca —ca veintisiete metros 'icë —quixun isacëxa. <sup>29</sup>Isax ca maparami 'ia manë nunti tuquiti sinani racuëquin aín tsipúnuxun rabé 'imainun rabé manë cha, tèsë itsin təcërëcaxun, manë nunti anubi bëspúnun nipácëxa. Imé naëx nipátancëxun ca pëcaranun quiax bënëquin caíancëxa. <sup>30</sup>Caínquin ca an nunti niquincë unicaman manë nunti rëbunuxun tèsë itsin təcërëcaxun manë nipácësa 'itánun, nunti chucúmara a anun menu cuanuxun nanpácatsí quixun sináncëxa. <sup>31</sup>Usoquian a unicaman 'aia oquin ca Pablonën Capitán Juliocëñun aín suntárucama cacëxa:

—Ënë unicama manë nuntinu bërúcëbëma camina mitsux bacamiquiti 'ain.

<sup>32</sup>Pablonën cacëxun ca suntárucaman anun nunti chucúma təcërëcacë

itsicama tēaxun, bacan buántanun nipácēxa.

<sup>33</sup>Usa 'ain ca pēcarati 'urama 'ain Pablonēn camaxunbia pinun quixun ēsaquin cacēxa:

—Rabé semana camina ñu pima 'ianan 'uxcēma 'ain. <sup>34</sup>Uinu 'icē uníxbi ca nētétima 'icēn. Camina usabi 'inixun 'acatin. Usa 'ain camina min nami cushinixun piti 'ain.

<sup>35</sup>Usaquin caquin ca Pablonēn pán bixun, acaman ismainunbi —asábi ca —Nucēn Papa Dios catancēxun, tucapaxun piacēxa. <sup>36</sup>Usaquin caquian piia isquin ca masá nuitucē a nētéquin camaxunbi piacēxa. <sup>37</sup>Manē nuntinua 'icē unicamax cananuna doscientos setenta y seis uni 'iacēn. <sup>38</sup>Acaman ca uiti cara piisa tania pitancēxun, manē nuntia xanúntanun trigo sacocama parúnpanu puacēxa.

#### Manē nunti nanéa

<sup>39</sup>Usa 'ain ca pēcaracēbētan me isquinbi uinu cara quixun an nunti niquincē unicaman 'unánma 'icēn. 'Unánquinmabi ca parúnpapa tsintúncē nua masi isquin anu manē nunti 'aruti sináncēxa. <sup>40</sup>Sinánxun ca anun tēcērēcācē itsi tēaquin manēa nipácē a parúnpanubi ēancēxa. Ēanan ca anun puntēbianquin buánti manē nunti tsipúnua 'icē inti, a anun tēcērēcācē itsicama tubuacēxa. Tubutancēxun ca manē nunti rēbunu nitsíncē iimi, ami 'iquian suñun manē nunti buánun quixun chupa buánruacēxa. <sup>41</sup>Chupa buánrucēbē bēqui, ami 'i cushiquin buánxun, ca suñun baca xobucē rabé nēbētsia 'icē masinu ráncaisama oquin manē nunti 'aruacēxa. Usa 'ain ca ráncaisama 'ain ami 'i cushi xuquiquin bacan manē nunti tsipun tucapacēxa. <sup>42</sup>Tucapacēbētan ca sipuacē unicama mēñuquianx abáti rabanan suntáruca-

man 'acatsi quiacēxa. <sup>43</sup>Acatsi quiabi ca aín capitán Julionēn Pabloribima 'aia quixun sinánquin, sipuacē unicama 'axunma 'anun quixun aín suntárucama cacēxa. Canan ca an mēñuti 'unáncēcāmax paían mēñuquianx 'irumainuan, <sup>44</sup>an mēñuti 'unáncēma unicamaxribi manē nunti panatan mēñuquianx caman 'irutanun quixun cacēxa. Capitán Julionēn cacēsabi oi mēñuquiani cuanx ca camáxbi caman 'irui cēñúruacēxa.

#### Malta cacē nasínua Pablo 'ia

**28** <sup>1</sup>Usai camáxbi bacamiquibi iéxun cananuna —Malta cacē nasí ca ēnēx 'icē —quixun a isacēn. <sup>2</sup>A nasínu 'icē unicaman ca nu nuibaquin, 'uí 'imainun matsi 'ain, ami nux sēnamē nun quixun tsi tīcaquin ērénruacēxa. <sup>3</sup>Ērénrucēbētan ca Pablonēn mēchan xanúncē bixun, tsi rēquirucēnu niacēxa. Nicēbē tsian xarocēxun tanbētsini uquin ca Pablo runun mēchāncēxa. <sup>4</sup>Usoia isi ca a nasínu 'icē unicamax ratuti ēsai canancēxa:

—Ēnē unix ca asérabi an uni 'acē uni 'icēn. Bacamiquibi iéaxbi ca aín 'ucha cupí bamati 'icēn.

<sup>5</sup>Canancēbētanbi ca Pablonēn runu mētúasquiquin tsinu niacēxa. Usofbi ca Pablo uisafbi 'iama 'icēn. <sup>6</sup>Usai 'ia isquin ca aín mēcēn ca uáti 'icē quixun anu 'icē unicaman sináncēxa. Sinánan ca —ca bamati 'icē —quixun sináncēxa. Sinánxun 'uran caíncēxbia uatima 'ianan bamaiaa oi ca bētsi oquin sinani —ēnē unix ca dios achúshi 'icē —quiacēxa.

<sup>7</sup>Anunu 'icē a 'urama ca a nasínu 'icē Publio cacē uni aín tucuricu aín me 'iacēxa. Usa 'ain ca a unin bitancēxun aín xubunu 'inun quixun nu cacēxa. Cacēx anu rabé 'imainun achúshi nētēn abē 'ia ca pimianan nu 'aquiancēxa.

<sup>8</sup>Nux anu 'ain ca Publionēn papa

'insinan 'ianan chixutanribi 'i, racacë 'iacëxa. Usa 'icëa ñiua cuati ca Pablo a isi cuancëxa. Cuanxun ca Nucën Papa Diosbë banatancëxun aín męcënan ramëquin pëxcüacëxa. <sup>9</sup>Usocebëa anu aia ca Pablonën a nasíuna 'icë uni ñucëcamaribi pëxcüacëxa. <sup>10</sup>Usocebëtan ca a nasíu 'icë unicaman numi sinánquin nu 'aquiancëxa. 'Aquianan ca nuxnu cuancëbëtan, manë nuntinu nun pibiantí ñucamaribi nu 'aruxuancëxa.

### Pablo Romanu bëba

<sup>11</sup>Usa 'ain cananuna rabé 'imainun achúshi 'uxën Malta nasíu 'iacën. 'Itancëx cananuna anuxun míta inúmia aín 'ibu anu 'ain, Alejandríanuxuan bëcë manë nuntí anun cuanux anu 'iruacën. A manë nuntin rëbunu ca uni rabëtan bëmánan tanxun 'acë i 'iacëxa, ax ca Cástor 'imainun Pólux caquin anëcë 'iacëxa. <sup>12</sup>Malta nasíuax a nuntinu 'iruquiani cuanx cananuna Siracusa cacë émanu bëbacën. Bëbax cananuna anu rabé 'imainun achúshi nětën 'iacën. <sup>13</sup>'Itancëx cuanquin me ratábiani, parúnppa cuëbíushi cuanx cananuna Regio cacë émanu bëbacën. Bëbonx suńúan caxucüax uquin nu bëcacëx cuanx cananuna rabé nětë 'icëbë Puteoli cacë émanu bëbacën. <sup>14</sup>Bëbaxun cananuna anuxun axa Jesucristomi catamëcë uni raíri mërácën. Mërácë xuan abë 'inun cacëx cananuna anu achúshi semana 'iacën. Achúshi semana 'itancëx cananuna Roma émanu bain cuancë. <sup>15</sup>Usa 'ain ca nuxnu cuania cuabëtsini axa Jesucristomi catamëcë uni raíri Romanuax ricuatsini Apio Foro cacë émanuax nubë mëranani uacëxa. 'Imainun ca raírinëxribi Tres Tabernas cacë émanuax nubë mëranancëxa. Acamabënu mëranancëbëtan ca Pablonën Nucën Papa Dios —asábi ca —caquin upí oquin sináncëxa. <sup>16</sup>Usari 'i

cananuna Roma émanu bëbacën. Bëbacëbëtan ca capitán Julionën an bëcë sipuacë unicama a guardianën cushi 'ináncëxa. 'Inánan ca Pablo bëtsi xubunua 'inun canan an bërúanun quixun suntáru achúshi cacëxa.

### Romanuxuan Pablonën bana ñiuxuan

<sup>17</sup>Romanu bëbax, rabé 'imainun achúshi nětë 'itancëxun ca Pablonën judíos uní aín cushicamaxa a isi unun quixun camiacëxa. Camicëx aía timëtia ca Pablonën cacëxa:

—'Ën aintsicama, cana mitsu cain, 'ën cana judíos unicama uisa ocëma 'ain, uisa oíma cana nun chaitiocëcama 'iásabi 'ian. Usai 'iabi ca Jerusalénuxun judíos unicaman an sipuanun quixun romános unicama 'ë 'inánxa. <sup>18</sup>'Ináncë xun 'ë ñucáxun ca 'unánxa, 'ën ñu 'acë 'aíma 'ain ca a cupía 'ë 'ati 'aíma 'icë quixun. Usa 'ain ca 'ë chiquíntisa tanxa. <sup>19</sup>Chiquíntisa taniabi ca judíos unicaman 'ëa chiquínxunma 'anun caxa. Usaquian caia cana 'apucama can, Romanu 'icë 'apu, Césarnën ca 'ëmia manáncë banacama mëníoti 'icë quixun. 'Ëmia atux manáncë banacama a ñiuxunibi cana Césarmi judíos unicama ñui manántima 'ain. <sup>20</sup>Usa 'ixun cana mitsu isanan mitsubë banatisa tanquin, 'ëmi isi unun quixun mitsu camian. Judíos unicaman sináncësaribi oquin cana —bama 'aish ca uni baísquti 'icë —quixun sinanin. 'Ën usaquin sináncë cupí cana manë risi ënën təcërecacë 'ain.

<sup>21</sup>Usaía quia ca anua 'icë judíos unicaman Pablo cacëxa:

—Nun cananuna Judea menuxuan bëmicë quirica mi ñiuiquian 'acë achúshiratsubi bicëma 'ain. 'Imainun ca anuax ucë judíos unicamax mi ñuiquin, min isamina ñu 'atima 'ai quixun nu cacëma 'icën. <sup>22</sup>Cananuna 'unanin,

mecama oquin ca axa Jesúsmi sináncë unicama ami nishquin unin ñuia. Usa 'ain cananuna minmi a uisaira cara a ñucama 'icë quixun ñuia cuaisa tanin.

<sup>23</sup>Usa 'ain ca a nētēan Pablonēn bana ñuia cuacatsia quicë a nētēn 'aisamaira uni anua Pablo 'icēnu uacëxa. Aía timëtia ca bari xamárutamainun ñuixuanan xupíopaquinribi bana ñuixuancëxa. Bana ñuixunquin ca uisari cara uni Nucēn Papa Diosnan 'iti 'icë quixun canan —Moisés 'imainun an Nucēn Papa Dios quicë bana uni ñuixuncë unicamaxribia, axa uti Cristo a ñui quiásabi oi ca Jesús uacëxa —quixun ñuixuancëxa. <sup>24</sup>Pablo quia cuaquian raíri unicaman —a banax ca asérabi 'icë —quixun cuamainun ca raírinēn —a banax ca asérabima 'icë —quixun cuaisama tancëxa. <sup>25</sup>Usai 'i ca raírinëxa —asábi ca —quimainun uni raírinëxribi —usama ca —quicëbētan, camaxunbi bētsi bētsi oquin sináncëxa. Usaía 'ia ca Pablonēn ësaquin cacëxa:

—Nucēn Papa Diosan Bēru Ñunshin Upitan sinánmicëxuan Isaíasnēn nucēn raracama cá banax ca asérabi 'icēn. A banax ca ësai quia:

<sup>26</sup>Camina anu cuanxun atúan cuanun ësaquin judíos unicama cati 'ain: Mitsun pabitan 'ēn bana ñuia cuaquinbi camina uisai cara quia

quixun 'unántima 'ain. Mitsun bērun 'ēn 'aia isíbi camina 'ēx cushiira 'aínbi 'ēmi sinántima 'ain. <sup>27</sup>Atun nuitu mēu 'unántisama tanan ca judíos unicaman atun pabitan cuaquinbi uisai quicë cara quixun 'unántisama tania. Atun bērunbi 'ēn 'aia isquinbi ca 'ēx cushiira 'aínbi 'ēmi sinántisama tania. 'Ēmi sinanatia cana atu 'ēn uni 'inun iémitsian. Usa 'aínbi ca 'iisama tanxa.

<sup>28</sup>Camina 'unánti 'ain, 'ēn mitsu ñuixuncë bana, Jesucristomi catamētishi ca uni Nucēn Papa Diosnan 'iti 'icë quiax quicë, a bana ñuixunia ca judíosma unicaman cuaxa. Usa 'aish ca atux a bana quicësabi oi 'iti 'icēn.

<sup>29</sup>Usaquian Pablonēn cacëx ca judíos unicamax Pablonēan ñuicë banacama a ñui qui atúxbi cuëbicananquiani atun xubunu cuancëxa.

<sup>30</sup>Usa 'ain ca Pablo aín xubunu 'iquin xubu 'ibu cupíoi anu rabé baritia 'iacëxa. Anu 'ixun ca axa a isi ucë unicama nuibaquin biacëxa. <sup>31</sup>Biquin ca uisari cara uni Nucēn Papa Diosnan 'iti 'icë quixun ñuixuanan uisai cara Nucēn 'Ibu Jesucristomi catamēti 'iti 'icë quixun ñuixuancëxa, uinu 'icë unfnbia ubfocëma 'ixun.